

萬 有 文 庫

第二集七百種

王 雲 五 主 編

元 文 類

(四)

蘇 天 爵 編

商 務 印 書 館 發 行

元 文 類

(四)

蘇天爵編

國學基本叢書

元文類卷之二十四

碑文

丞相東平忠憲王碑

元明善

皇帝嗣寶歷御宸極拜大司徒柏柱爲中書左丞相明年制贈乃祖孔溫兀答推忠効節保大佐運功臣太師開府儀同三司上柱國追封魯國王諡忠宣木華黎體仁開國輔世佐命功臣太師開府儀同三司上柱國追封魯國王諡忠武賜碑額曰元勳世德廟食東平別賜故中書右丞相贈推忠同德翊運功臣太師開府儀同三司東平忠憲王開國元勳命世大臣之碑碑建大都良鄉之通達猗歟盛哉是舉也其思烈祖創業之艱念功臣宣忠之亟勉丞相奮庸之恭歟臣承詔猥當執筆謹按東平王世家忠憲王諱安同姓扎剌爾氏五世祖是爲忠宣王親連天家世不婚姻太祖皇帝起兵與乃蠻人戰我師敗績七騎走利追兵尾及困乏絕食忠宣多力走水次縛致二歲臺駝炙其肉啖太祖太祖馬憊六人相顧忠宣遂以己馬濟太祖步射賊而死子五人第三子曰忠武王是爲忠憲王高祖忠武與博爾朮博爾忽赤老溫佐太祖定天下號爲四傑太祖戰失利單走澤中天大雪忠武與博爾朮張馬羈蔽太祖臥旦起視跡二人之足不移太祖從三十騎行礪谷間遇羣盜突射忠武三發三殪徐撤馬羈障太祖叱騎戰賊賊問知忠武名乃解去克烈主王可罕忌太祖嚴兵襲我我得其謀太祖與忠武等悉精銳迎擊王可罕敗走死

諸部以次服。太祖卽大位。官制簡。止置萬戶二。乃以忠武爲左萬戶。從破金師二十萬于野狐嶺。北師由紫荊口入。忠武專征遼東西諸郡。諸郡悉平。詔授太師。國王。都行省。承制行事。賜券傳國永世。太行迤南。盡委經略。金主奔汴。忠武建牙雲燕。南平趙魏。東定齊魯。西擊晉秦。中原之地。盡爲國守。四十年間。無役不從。無戰不在。破國覆邑。惜殺禁剽。風降景附。懷仁歸義。癸未三月。薨于聞喜。遺命以未滅金胤爲恨。子曰李魯。忠憲王曾祖也。嗣國王奉詔討夏。攻銀肅二州。斬甲首數萬。禽大將塔海。詔分諸功臣邑門。功第一。食東平郡。李全盜據益都。帥師圍全。全窮出降。山東安。戊子三月。薨于雁山。子七人。塔思嗣國王。忠憲王祖考也。夙以忠孝自許。奮曰。大丈夫受恩明主。要須決機兩陣之間。取功名以報國家。庶不墮我先烈。太宗皇帝攻鳳翔。將兵戍潼關。從攻河中。追斬守將。從戰金師于三峯山。破四十萬人。斬行省完顏合達。樞密移剌蒲兀。朝行在所。上顧之曰。先帝肆天功。建鴻業。諸國悉皆臣妾。獨爾東南。鴟張一隅。朕欲援桴鼓衆。親繫羸王。爾意何居。起對曰。臣不逮先臣武。然奉天子威靈。汎掃淮浙。取彼山川。歸我版籍。臣敢不以死自力。政爾不煩。大駕蹂卑溼之地。上喜曰。塔思終能成我大志。從皇子曲出南征。拔宋棗陽。侵郢。陷光州。略安慶。己亥三月。薨。第二子曰霸都魯。忠憲王父也。憲宗皇帝命佐世祖軍。由蔡伐宋。馳檄諭江淮人。帥師與世祖會鄂渚。憲宗崩。內難方訏。世祖以武靖總師。留戍而還。及踐大寶。嘗曰。朕居此。以臨天下。霸都魯之力也。蓋昔者與論形勢之地。武靖曰。帝者必居中。撫八極。朝覲會同。道里惟均。中都南俯吳越。北接朔漠。左控燕齊。右挾韓晉。大王必欲佐天子。一大統。非此不可。至是定都于燕。故有此旨。未幾。薨于軍。大德八年。制贈推誠宣力翊衛功臣。太師。開府儀同三司。追封東平王。諡武靖。夫人弘吉烈氏。昭睿順。

聖皇后之兄也。追封東平王夫人。子男四人。長卽忠憲王。次定同。次霸虎帶。次和同。嗣國王。女二人。長適國戚木蘇。次適太傅淮安忠武王伯顏。恭惟忠憲王。自中統初年。世祖皇帝。命掌環衛之政。令位百僚上。太夫人入朝。皇后一日。上適叩及忠憲。太夫人起。奏曰。妾不敢自薦。妾子。以欺罔聖聽。安同年少。公輔器也。上曰。以何期之。太夫人曰。朝回必求魁公。論天下事。未嘗目一輕淺。謂然也。以是上默。四年。反者平。執叛黨千餘人。論之如法。上問曰。朕欲悉死此黨。時年十六。對曰。兩主爭國。彼安知有陛下。且甫定神器。不推曠蕩之恩。顧奮私憾。殺無罪人。何以安反側。上驚曰。少年何以得老成語。卿言誠開朕懷。千人皆生。至元二年。拜光祿大夫。中書右丞相。別食四千戶。辭曰。叢爾宋竊號江南。方宏聖略。奮神武。以臣謬膺宰相。獻笑三方。宋孱生侮。上改容有閒曰。熟思無以踰卿。其勿辭。奏請燕王省。可中書大政。奏召大儒許衡。衡至。詔議中書事。衡辭以疾。忠憲親候於邸。語移時。甚契。及還。籌思累日不釋。上時召衡諭之曰。安同練事未熟。善左右之。卿所練語。使達朕。衡對曰。丞相資識聰敏。雅有定操。稽古獻議。卽解要領。臣敢不竭愚罄。有四年。奏曰。碩德如姚樞輩。三二人可議中書省事。上曰。此輩固宜優禮。五年。阿合馬議立尙書省。乃先奏忠憲三公。詔諸儒議。樞密商挺倡言曰。安同國之柱石。一日不可出中書。進三公。是崇以虛名。奪其實權也。衆起和之。事挫不行。六年。大兵伐宋。先規襄樊。廟謨也。七年。奏曰。臣近言尙書省宣奏如制。其大政令。大章程。聽與臣議。然後得聞。今尙書臣違詔徑行。上曰。阿合馬恃朕信用。敢爾自專。勅尙書如前詔。八年。陝西行省臣言。歲饑盜熾。若不顯戮。無以威衆。奏曰。盜犯強竊。當罪重輕。一切處死。法何以立。罪入死者待報。從之。十年。奏以玉冊玉寶。上皇后弘吉烈氏。以玉冊金寶。立燕王爲皇太子。兼中書令。判樞密院。

十一年。劾奏阿合馬欺國害民有徵數事。又奏各部及大都路官。阿合馬奏擬非人。乞加黜汰。十二年。詔行中書省樞密院事。從皇子北平王出鎮北圍。遂留極邊。十年不與朝廷通。二十一年三月。從北平王歸。上召入勞之。留語臥內。四鼓而出。冬十一月。復拜中書右丞相。進金紫光祿大夫。詔天下。監察御史陳天祥。劾奏右丞盧世榮。略曰。人思至元初治。不能忘也。去春。丞相安同。還自北邊。天下聞之。室家相慶。咸望復膺柄用。治期可立而得。果承恩命。再領中書。貴賤老幼。喜動京師。時政之治與不治。民心之安與不安。繫丞相之用與不用爾。又如大夫玉速鐵木兒。丞相伯顏。朝廷專任三相。事事咨而後行。無使纖人從旁沮撓。能者進能。善者行善。誠厚天下之大本。理天下之大策。又安用掎克在位。倚以爲治哉。其年世榮敗。中書條上世榮所爲掎克諸事。詔皆罷之。奏漕司諸官。上曰。平章右丞。固取朕裁。餘皆卿事。願欲一一相煩。有失寄託初意。因奏曰。比覺聖意欲倚近習爲耳目者。臣猥列台司。所行非道。從其彈射。罪從上賜。奈何近習伺間抵隙。援引姦黨。曰某人與某官。以所署事目。付中書曰。準勅施行。臣謂銓選自有成憲。若此廢格不行。必有短臣於上者。幸陛下察之上。曰。卿言甚是。妄奏者入上其名。二十四年。上決意立尙書省。奏曰。臣力不能回天。乞不用桑葛。別相賢者。猶或不至虐民誤國。不聽。二十五年。見天下大務一入尙書省。屢上中書印。不許。明年。宰相止掌環衛。又十年正月十九日。以疾薨于京師樂安里第。春秋四十有九。上悼惜久之。曰。人言丞相病。朕謂不然。果喪良輔。詔重臣監護喪事。家老一無所受。素車樸馬。歸葬。只闌秃之先塋。忠憲王纛然若山。莫捫其高。湛然若淵。莫測其深。其粹如玉。其精如金。其嚴如秋。其溫如春。夷險安危。死生榮辱。確乎中處。一皆不動。年十八入相。薦引端良。責成職任。漢士如史丞相天澤。姚左丞相。

許左丞衡。商參政挺。竇學士默。尤傑者也。立御史臺以正紀綱。立太常寺以崇禮樂。剷除苛虐。開布寬平。抑奢尚儉。薄征厚施。由是朝廷清明。海內寧壹。倉庫滿盈。年穀屢豐。天子嘉之。曰。安同爲相。朕寢乃熟。時向承平。方與諸儒經畫典制。贊理樞機。以宗社尊安爲己任。以民物阜豐爲己責。一政失平。一物失所。慘然不樂。改而後已。公退。府南開一閣。延進賢士大夫。講論古今治道。評品人物得失。聲應接不倦。而請謁絕跡於清門。居第一堂一廚。或請創兩廡。粗備燕息者。乃曰。身足於庇完矣。餘室何用。神觀端嚴。望而尊敬。每旦暮出入。過者拱立目送。曰。是吾安相也。及薨。木介三日。天下聞之。識與不識。無不驚哀。至有失聲者。曰。賢相死矣。吾復何望。薨後十年。御史臺及集賢諸儒。請加贈諡。以昭明德。制下。乃有今爵。封諡。以及父武靖王夫人。怯烈氏。封東平王夫人。子兀都台。嗣掌環衛。成宗皇帝。拜銀青榮祿大夫。大司徒。領太常寺。大德六年正月十一日薨。年三十有一。武宗皇帝。制贈輸誠保德翊衛功臣。太師。開府儀同三司。上柱國。追封東平王。諡忠簡。婦篤思刺氏。封東平王夫人。男孫一人。卽今丞相。女孫一人。適淮安忠武王之孫。樞密副使囊家帶之子。同僉樞密院事。相嘉頌利。丞相幼從太夫人鞠育。稍長。兼事華學。凝然端大。已兆偉度。年十二。事武宗。嗣掌環衛。仁宗皇帝。拜資善大夫。太常禮儀使。俄遷榮祿大夫。大司徒。太常如故。又進階金紫光祿大夫。加開府儀同三司。延祐七年。拜中書平章政事。六月。陟百揆。自初仕。介特不阿。剛廉有制。衆已有忠憲王之望。及作相。上輔聖主。下率羣僚。恪司彝憲。壹徇至公。明嚴峻潔。苞苴自絕。方爾謀叶八座。道卽天工。共成聖元無大之業。臣稽首論曰。忠憲王夔累葉之勳。抱絕倫之德。膺世祖紹統之初。際聖代建極之盛。天度夙成。英猷大肆。遠徵近禮。廣詢博采。鴻儒獻其所蘊。智士竭其所至。治化油然。

以隆風俗。淡焉以厚。至元之初。何減漢文之世。俾得展能專理。期之致寧。收效所書。蓋不止此。然房喬杜晦。顯烈寡傳。第功絜德。爲唐宗臣。若忠憲王者。有立于前。或承于後。論相歸賢。固當稱首。古所謂社稷之臣也。嗟乎。其始出鎮也。誰歟。其再罷相也。誰歟。議者不能不歸罪阿合馬桑葛也。之二罪魁。孰與並立。良相之去朝也宜矣。世之公道。正如青天白日。雲煙有時。蒙蔽真風元氣。盪滌幹旋。廓乎清明。可跂而睹。忠憲王之表表在天下是已。若夫紀竹帛。銘鍾鼎。光在邦家。不得騰實同里。而垂休華夏。播烈蠻夷。未必不在斯文。其辭曰。

正統天斬。不永以畀。猗維帝元。眷命無已。烈烈太祖。衆始一旅。四傑起輔。如龍如虎。敵師陸梁。走撻之楚。諸部大人。崩角啓處。侃侃忠武。秉鉞專征。薄伐遼靄。至于海城。戮頑植愿。百邑告寧。乃趙乃魏。自燕南兵。齊魯歸明。血戰晉并。斬關入秦。咸鳳莫京。取厥鯨鯨。耄倪不驚。金人扼河。踟躕偷生。有據上游。帝建九旂。有開輿圖。帝撫八州。於穆世皇。噉出東方。爰相忠憲。抒誠進良。兩相廿年。萬彙皆昌。徵車四馳。元老奏康。更褒迭進。無材不揚。文物其章。化道之祥。而圖也大。而見也定。而行也公。而守也正。巍然山立。賞淑罰慝。風行萬國。定知誰力。忠憲之職。世皇之德。繫今丞相。相明天子。天子倚毗。臣無有比。何以熙載。第思盡己。地紀天經。日月重明。民安物阜。海寓晏清。布寫公方。持守盈成。維祖規模。維孫儀刑。在履之貞。在繼之靈。文武三相。聖輔三帝。光輝接日。勳庸蓋世。維元世萬。維帝葉千。維無窮年。尙徵相賢。尋河可源。凌岱可巔。苟稽高遠。靡趾方邊。景行其全。不在斯鑄。不在斯鐫。奚永夫傳。質之自天。風雲與宣。文鼈負石。炳耀山川。

丞相淮安忠武王碑

元明善

天以正統命帝元太祖皇帝奮起朔方博爾朮木華黎博兒忽赤老溫四傑輔之滅克烈滅乃蠻滅夏滅金乃有天下三分之二宋承中華之運西距蜀楚東際吳越盡有荆揚益三州之野世祖皇帝紹運撫圖肆弘大略發兵二十萬授丞相伯顏不三年而滅宋聖文神武固勞造化儔功偉烈實由折衝四傑開之於其前一相擴之於其後國家接五帝三王之緒保無疆歷服至于億萬維年而功臣生分爵國死配廟廷有以也夫謹按太傅淮安忠武王諱伯顏姓八隣氏蒙古部人曾祖考朮律哥圖以其兵從太祖討定諸部嘗爲千夫長贈推忠贊治功臣太尉開府儀同三司柱國追封淮安郡王諡武定祖考阿剌嗣官平忽禪有功得食其地從憲宗皇帝征蜀卒于軍贈推誠佐理翊運功臣太傅開府儀同三司上柱國追封淮安王諡武康考曉古台佐宗王旭烈開西域執國事以沒贈崇仁迪慶翊戴功臣太師開府儀同三司上柱國追封淮安王諡武靖至元初年王奉使天子世祖見其貌偉聽其言厲曰非諸侯王臣也其留事朕遣介還報建謀發令才恆出廷臣上由是上愈益賢之勅中書右丞相安同女弟昭睿順聖皇后女姊之女王若曰爲伯顏婦不慚爾氏矣拜光祿大夫中書左丞相一時君相慶明朝野晏清號爲極治七年改同知樞密院事十年持節奉玉冊立燕王爲皇太子十一年復拜左丞相總襄陽兵伐宋上曰曹彬不嗜殺人一舉而定江南汝其今體朕心古法彬事毋使吾赤子橫羅鋒刃王受命馳至襄陽諸軍纂嚴禡師啓行薄鄧州洪水溢塗人病於涉王曰吾且飛渡大江而憚此潢潦耶度使一騎前導諸軍畢濟郢城恃江爲固而兵精食足耀兵不攻潛由平江堰盪舟而過郢將將二千人追我王以百騎殿郢人不敢逼平章阿朮公適至郢人走王手斬其帥趙文義以徇戰禽沙洋守將壓新城而軍列沙洋俘誠城下不應

城陷。佩沙洋降將黃順金符。上爲招討使。炫其榮於宋人。以故江陵諸郡相繼送款。遣別帥受之降。阿朮公使右丞阿里海牙來期渡江。不答。明日又來。又不答。阿朮公自來。王曰：「此大事也。」主上委吾二人。餘可知吾實乎。潛刻期而去。將自沙蕪口入江。宋制置使夏貴將精兵守之。乃陽言明日圍漢陽。夏貴來援。我遣奇兵襲奪沙蕪口。大兵咸會江北岸。宋戰艦屬江中。餘三十里。我以白鷁千艘。爭陽邏堡。夏貴分兵拒戰。命阿朮公挽舟逆上。載死士三千夜渡。是年十二月也。明旦王戰夏貴。江上兵奪陽邏堡。逸夏貴。諸將請曰：「貴大將而逸之可乎？」王曰：「陽邏之捷。吾將遣使前告宋人。而貴走代吾使也。貴今來矣。未幾果以廬州歸我。師旣渡江。將佐咸賀。王曰：「天子威靈。阿朮武勇。將校用命。吾何力焉。」王陳師鄂城下。鄂恃漢陽將戰。焚其蒙衝。火照城中。明日鄂人及漢陽人皆下。留阿里海牙守之。規取荆湖。王與阿朮公等東兵興國。斬黃南康。江州望旗輒靡。殿帥范文虎以安慶。張都統以池州來。二月都督賈似道舟師十萬。陳丁家洲。我士賈勇索戰。軍容甚盛。似道聞鼓聲先遁。其師遂潰。獲都督府符印。斬虜無算。太平寧國建康無爲鎮巢皆送箠籥。請城主行省。至建康時江東大疫。居民乏食。乃開倉振飢。發醫起病人。大歡喜曰：「此王者之師也。」有詔時方暑熾。不利行師。候秋再舉。王上奏曰：「百年逋寇。已扼其吭。風馳電擊。取之恐後。少爾遲回。奔播江海。遺患留悔矣。」上語使者曰：「詔爾丞相。朕不從中制也。」十二年七月詔王入朝。進右丞相。辭曰：「阿朮功多。臣宜居後。」以阿朮爲左丞相。賜從戰功臣爵賞有差。躬受廟謨。會諸將於淮安。同左丞相圍揚州。未下。十月王馳至鎮江。分軍三進。參政阿剌罕以右軍出建康道。參政董文炳以左軍出海道。王以中軍出常州道。咸會臨安。攻常州。守將劉師勇遁。諸將請追之。王曰：「勿追。師勇所過。城守者膽落矣。」蘇湖秀州。

先師果降。阿剌罕、文炳皆來。駐臨安北。宰臣陳宜中發使來請降。日及期。宜中逃海。軍進皋亭山。宋主遣其臣齎國璽奉表納土。命董文炳入宋宮。取宋主。居之別室。封府庫歸之。有司宋滅。十三年三月也。放散兵衛。罷易官府。錢塘沙上三日海潮不至。宋人以爲天助。宋主求見。王曰。未入朝禮。無相見也。留左丞董文炳鎮臨安。經略閩越。四月。獻宋主趙焜。謝后。全后。于上都。上御大安殿。降封焜爲瀛國公。遣大臣告成功於太廟。上勞王。王再拜謝曰。奉陛下成算。阿朮效力。臣具員而已。何有功能。詔以陵州、藤州、增食戶爲六千。同知樞密院事。十四年。宗王失烈吉畔。詔王將兵討之。與賊夾水而陣。久之不戰。令牧馬具食。賊疑而怠。俄引兵渡水擊賊。失烈吉走死。十八年。詔從皇太子撫軍北鎮。諭太子曰。伯顏才兼將相。行全忠孝。故命汝從。王太子次舍。必與論天下事。待有加禮。別吉里迷失者。嘗誣王以死。是年得誅罪。勅王臨視。王與之酒。愴然不顧。而回。上問其故。對曰。彼罪自致。臣若臨刑。人將不知天誅之公也。上賞其量。二十二年。宗王阿只吉失律。詔王代總北軍。遠斥候。謹隄防。足兵食。明賞罰。不肯要功生事。將校大和。敵人遠避。二十四年。宗王乃顏將反。報者還。詔王覘之。多載衣裘以往。至其境。輒賜驛人。乃顏讎王。王以大義語。乃顏。乃顏陽應。而陰欲執王。酒闌趨出。與其從者潛分三道以逸。驛人得衣裘故。爭獻馬以遞。遂脫追騎。以其實聞。佐上親征。奏李庭、董士選帥漢軍。得以漢法戰。金剛奴塔不帶進。逼乘輿。漢軍力戰。賊不能陣而走。及禽。乃顏王之謀。晝居多。二十六年。加金紫光祿大夫。知樞密院事。總北軍。討叛王明里鐵木兒。大戰敗之。明日。搜其伏兵。追斬二千餘級。馳書開諭明里鐵木兒。其人奉書以泣。有譖王于上者。詔以御史大夫月兒魯那演代之。居王大同。以俟。後命未至。軍三驛。王遣使語大夫曰。所至姑止。待我翦此寇。卿來。

不後時。海都帥大兵以入寇。進我退。如是而南。七日。衆帥怒曰。寇至則走。何不武若是。果懼戰。胡不授軍大夫。而誤國事也。王曰。海都入吾境。持重而殿。邀之則遁。誘使深入。一戰可禽。諸軍必欲速戰。戰非吾憚。果失海都。誰任其咎。衆曰。請任之。王麾軍邀擊。敵兵大敗。殺虜幾絕。惟海都脫走。乃召大夫至軍。授印而去。三十年十二月。驛召至大同。上不豫。明年正月。宮車晏駕。遣使召成宗于撫軍。王總百官。以定國論。兵馬使請日在鳴。暮鍾日出。鳴晨鍾。問其故。對曰。防變起也。王曰。汝將爲賊耶。其如平日。宰臣請誅盜內府銀者。曰。幸赦。而盜不可長也。王曰。盜何時無。今以誰命誅人。其守正體大多類此。四月。成宗卽皇帝位。于上都大安殿。時親王有違言。王按劍陳祖宗寶訓。述所以立成宗之意。辭色俱厲。諸王股栗。趨殿下拜。五月。加開府儀同三司。太傅。錄軍國重事。依前知樞密院事。上意欲王入中書。時相忌之。王呼相語曰。幸送兩罌美酒。我與諸王飲於宮前。餘非所知也。江南行三樞密院。行省臣累陳非便。樞密臣庇之。有詔問王。王已病。張目對曰。罷行樞密。兵柄一歸行省。於國事爲完。三院遂罷。是歲十二月。薨于京師甘棠里第。春秋五十有九。遣重臣來贈勅。百官送葬。送者盡哀。葬于白只刺山之先塋。夫人別宿真。卽扎刺爾氏。封淮安王夫人。再娶斗奴氏。生三男子。買的正議大夫。僉樞密院事。囊加台。通奉大夫。樞密副使。朶真普。未仕。俱卒。副樞娶丞相興元王孫中政使買苟之女。生一男子。一女子。男相嘉頌利。正議大夫。同僉樞密院事。女適資德大夫。大都留守晃兀兒不華。王薨。成宗贈宣忠佐命開濟功臣。太師。開府儀同三司。追封淮安王。諡忠武。仁宗皇帝。賜鈔十萬貫。昇江浙省臣廟祀。臨安皇上勅建碑于都城之郊。賜額曰。開國元勳佐命大臣之碑。命臣明善製其刻文。臣聞忠武王天質高厚。風神靜明。英偉端大。剛介莊廉。當大任而不恐。

遇大論而善斷。言笑有時。喜愠莫測。恆負天下之重。以神器奠安爲務。仁視羣品。無間親疏。義使英材。無比適莫。故四海公論。翕然歸之。其平宋也。將二十萬。猶將一人。賞罰信。紀律彰。大將稟命。仰之若神明。降人投誠。依之猶父母。未嘗妄戮一卒。未嘗妄殘一物。貨財不足。移其心。聲色不足。惑其志。師入臨安。禮賢黜罪。市肆不易。雞犬無驚。歸馬蕭然。囊惟衣被。畢事還朝。口不言功。連出總師。無役不最。嗚呼。碩德元才。生由間氣。良相名將。見諸行事。乃知宇宙之間。功名之表。自有大人也。弼成正統。騰耀始日。力扶寶運。播烈終年。請卽是而作頌。頌曰。

世祖聖神。地翕天開。陽施陰闕。鼓盪風雷。駕馭羣才。鞭笞九垓。糞掃兇菑。祥慶有來。糾糾雄豪。英英俊髦。樂世之遭。陋時之逃。或秉樞機。或建旗旄。纓冠自獻。文奮武招。維忠武王。胥會明良。雄圖遠韻。聖度恢張。制曰伊賢。當吏天子。左官諸侯。奚爾器使。乃命之相。乃命之將。爰資弼亮。爰資開盪。嗟茲中土。鼎峙三主。旣殄其二。一也無武。天生聖人。賚之良臣。頸組厥君。稽顙軍門。東涉扶桑。西跡虞淵。北盡窮髮。南極玄蠻。咸受正朔。襲我衣冠。委勳不居。歸衛帝廬。出總北師。馬騰士娛。輿目睢盱。望入中書。鉅材乃儲。翊運是須。肅將天威。劍而登殿。揚命羣王。羣王自悞。策帝御天下。拜登譙。是日微王。慶會幾變。始知世祖神幾先見。故抑王庸。留垂後憲。稽其一德。始終交盡。抒誠兩朝。力殫無靳。進官三公。心不增隆。追爵一王。道不加崇。維王達節。高抱孤忠。維王獻能。茂建元功。紀勳竹帛。鑄銘鼎鍾。並日不滅。與國無窮。勅臣作頌。勒之貞石。昭示萬國。永著臣則。

元文類卷之二十五

碑文

丞相順德忠獻王碑

劉敏中

故太傅右丞相贈推誠履正佐運功臣太師開府儀同三司上柱國順德忠獻王答剌罕既薨之五年皇慶改元之秋上詔中書故丞相答剌罕弼亮三朝功多不可以不顯其相地盧溝通達旁勒碑焉且詔臣敏中撰文臣竊惟有國致治難得賢爲尤難是以古之聖王得一賢則信任之尊顯之使得以盡其能又必褒崇之表異之示不可忘其勞若太常之紀盟府之藏鼎彝之勒麟閣雲臺之像不一而足重得賢之難也我元聖聖相承天佑生賢相臣將臣炳烈相望人才之得於斯爲盛若夫懷遠圖而略近功先大綱而後小數蘊江海之量負山嶽之重不威而令行不言而人服處難而無所惑履變而不可專端委雍容而朝廷奠安天下受其賜則忠獻王其人乎上之所以眷眷焉不忘而王之所以荷此表異之渥也宜矣嗚呼聖人言君使臣以禮臣事君以忠于茲焉見之臣謹按王諱哈剌哈孫朔方人其族爲幹羅那氏襲號答剌罕曾祖考諱啓昔禮贈推忠佐命宣力功臣太師開府儀同三司上柱國追封順德王諡忠武祖考諱博理察贈協忠翊亮定遠功臣太師開府儀同三司上柱國追封順德王諡忠毅考諱囊加台贈宣忠效節保大功臣太師開府儀同三司上柱國追封順德王諡忠愍曾祖妣哈刺真氏祖妣完者氏妣脫

魯哈納氏。並封順德王夫人。忠武重厚有英才。遇太祖皇帝於飛龍見躍之際。知可汗將襲之。趣告帝爲備。果至。我兵縱擊大破之。尋并其衆。以功擢千戶。錫號答刺罕。時官制惟左右萬戶。次千戶。非勳戚不與。答刺罕譯言一國之長。帝謂侍臣。彼家不識天意。故來相害。是人告我。殆天所使。我許爲自在。答刺罕矣。因賜御帳什器。及宴飲樂節。如宗王儀。是後所下郡國。由奉聖大同。至陝西西域土番雲南遼東。未嘗不從。摧堅蹂強。以死力自効。壬辰。太宗皇帝略地河南。忠武問出太行。反擊燕有功。會病薨。子十二人。其三。忠毅也。以勇銳服衆。從睿宗皇帝取汴蔡滅金。丙申。錫分邑順德。病薨。二子。次爲忠愍。果毅有謀。以近侍從。憲宗皇帝伐蜀。多勞績。戊午。薨于軍。於是王甫及歲。而識悟異凡兒。目不視戲。稍長。善騎射。尤習國書。聞儒者談輒喜。至元壬申。世祖皇帝錄勳臣後。一見異之。命襲號答刺罕。長宿衛百人。夙夜共職。惟謹。嘗從獵。馬躓傷面。上直如常。帝命醫視。眷益重。明年秋九月。帝御萬壽山。王侍。賜金段。諭曰。汝先世勳大。朕且大用汝。又明年春。丁母夫人憂。哀毀踰禮。是冬十月。帝獵三不刺歸。語皇太子曰。答刺罕非常人。比可善遇之。乙亥。江左平。賜廉欽二州。益其邑。乙酉。拜大宗正。賜珠衣一襲。時郡縣囚盜詐者。上宗正決。屬當遣使決死囚諸道。王重按獄詞。小不具。悉令覆勘。奏決者僅六十人耳。尋赦下。所活數百人。大同民羣鬪毆鷹房三人死。近臣以變聞。帝怒。亟遣王治。止坐其首鬪者。京師有以偽造楮幣連富民百餘家。王盡釋之。保定諸郡旱。民當輸米。京師多以輕資就糴。有司撫爲姦。欲沒其產。賞告者。王得其情。皆縱去。曰。舍貴就賤。民便事集。又何罪爲。柄臣擅威福益橫。知王惡已忌之。數曲爲邀致。竟不一往。其家僮冒禁殺牛。有司莫敢詰。王致以法。益忌。謀撓王以多事。奏請江南囚。亦隸大宗正。莅決。王曰。彼間民教令未孚。若一切

繩之。恐生亂。帝是之而止。辛卯。帝念湖廣失治。欲遣近臣往。莫宜王。臺臣奏答刺罕在宗正。決獄平。卽去。恐難其人。帝曰。彼地朕嘗駐蹕。治非斯人不可。王遂行。隨賜以玉帶。授榮祿大夫。湖廣省平。章政事。湖廣南瞰交趾。占城。西掖蜀。西南接南詔。東連吳會。境壤且萬里。而八番兩江。蠻獠布溪峒間。虺蛇起伏。跳跟小戾。則相讎殺。攻剽無時。故治視他省劇甚。王至。審利病度先後。簡僚佐。撫兵民。威行德流。善遂頑革。錢粟刑獄。井井有條。自宋時有巨盜嘯黨。出沒湖湘。殆二十年不可制。王選士村以方略。悉擒誅之。江州隸江西省。有獵民餌官府恣虐。凡剽船江中。羣盜皆與爲根穴。交通。王知狀。徑縛以來。百救莫施。卒寘於死。遠近震悚。俄置行樞密院。兵民政分。勢不相營。姦寇伺發。溪峒以閔。壬辰。王入覲。列其不便罷之。帝問王。人言廉訪官反撓吏治。朕已令視之。卿謂若何。王曰。憲司職糾姦弊。貪吏所疾。妄爲謗耳。帝以爲然。及還。邊將征交趾。出其境。王戒曰。無擾吾民。有奪民魚菜者。杖其千夫長一軍。肅然。乃上奏曰。往年遠征無功。民瘡痍未蘇。乃復有事。非國善謀也。又發湖湘富民屯田。廣西爲圖。交趾計。王以徙民瘴鄉。事固難成。必且怨叛。遣使密奏。吏抱券請署。不答。俄使還報罷。民大悅。已而廣西元帥府請募南丹戶五千屯田。襟要。謂士不死瘴癘。餽餉有餘。蓄實空荒之地。爲邕管之蔽。制諸蠻。控交趾。其利有六。王喜。與之牛種農器。置長統焉。聞諸朝。到于今便之。湖廣舊無夏稅。柄臣援唐宋末世爲徵。王曰。衰弊之政。聖朝可行邪。竟奏罷。常澧辰等州大水。漂民廬。多死者。王亟發廩爲之賑慰。凡災皆如之。甲午春正月。世皇登遐。王謹斥候。戒不虞。境內寧肅。大德戊戌九月。朝成宗皇帝于上都。帝嘉其績。授光祿大夫。左丞相。行省江浙。視政。凡七日。綱舉七十餘事。民風吏習。翕然爲變。入爲中書左丞相。加銀青榮祿大夫。杭之耆庶。伏地攀泣。馬不得

前王既當鈞軸。益以天下自任。每退食。延見四方賓使。訪以物情得失。吏治否臧。人材顯晦。年穀豐歉。采可行行之。凡論議先以國典。參以古制。揆以時宜。必當而後已。其可否事。猶元化之運。順無留滯。惟不言利。不喜變更。一以節用愛民。重名爵爲務。京師先未有孔子廟。而國學寓他署。王喟曰。首善之地。風化攸出。不可怠。乃奏營廟學。嘗躬爲臨視。既成。朝野瞻聳。選名儒爲學官。奏遣近臣子弟入學。而四方來學者益衆。又郊禮久未遑。王總羣議奏行之。辛丑。同列以或者議。倡言世祖皇帝以神武開一統。功蓋萬世。陛下未有伐國拓地之舉。以彰休烈。西南夷八百婦國弗率。可命將往征。王謂山嶠小夷。去中國遼絕。第可善諭向化。苟將非其人。未見所利。弗聽。竟奏發湖廣兵二萬人。丁壯役餽輓數十萬。將失紀律。果無功而還。諸蠻要擊。飢疫相仍。比至。將士存者纔十一二。會赦。有司議釋將罪。王曰。徼名首贖。陷失士馬。非常罪比。不誅無以謝天下。奏誅之。癸卯。秋。拜中書右丞相。加金紫光祿大夫。王常言治道先守令。至是。選掄益詳。時號得人。定官吏贓罪十二章。及丁憂。婚娉盜賊等制。禁獻戶及山澤之利。每歲春。大駕幸上都。王必留守。其重可知已。時帝疾連歲。權移中闈。羣邪交扇。勢焰翕忽。王以身維之。姦不得逞。事以無撓。丙午。加開府儀同三司。監修國史。直僚屬奏修三朝皇后及宗室功臣傳。冬十有一月。帝弗豫。王入侍醫藥。出總宿衛。且理幾務。諸藩王欲入侍疾。王拒之。丁未。春正月。宸御晚駕。時武宗皇帝撫兵居北。王封府庫。稱疾臥闕。下理幾務如故。中闈以姦臣謀絕北道驛。欲行祔廟禮。王格其事。密記授使。聞走。踰兩驛。始得傳。馳報武宗。諸懷詐者。數欲害王。王不爲動。內外懷懷。視王以安。會今上皇帝皇太后。至自懷。姦臣希中旨。謀爲不軌。三月。王贊今上皇太后。擒滅其黨。發使迎武宗。四月。今上皇太后如上都。王繼往。五月。武宗卽大

位。加太保。開府儀同三司。錄軍國重事。中書右丞相。監修國史。賜以憲廟所御白貂裘寶帶。未幾。加太傅。賜第。見其子脫歡。近侍和林。控北邊。始置宣慰。時諸部落降者百餘萬口。乃罷宣慰。詔王以太傅爲左丞。相行省事。賜楮幣十五萬緡。黃金贏十二鎰。白金二千五百兩。帛四百端。乳馬六十疋。皇太后賜楮幣五萬緡。帛二百端。至和林。獲盜米商衣者。卽斬以徇。攘竊屏息。行旅爲便。分遣使發廩賑降口。復奏請錢七千三百萬緡。帛稱是。易牛羊給之。又給網數千。令取魚食。遠者厄大雪。金山命諸部置傳車。相去各三百里。凡十傳。餽米數萬石。牛羊稱之。又度地立兩倉。積米以待來者。全活不可勝紀。有飢乏不能達和林。往往以其男女弟姪。易米以活。皆贖歸之。和林歲糴軍餉。恆數十萬。主吏視利。繆出納囊橐。滋弊久矣。立法以遏其源。稱海屯田廢弛。重爲經理。歲得米二十餘萬斛。益購工治器。擇軍中曉耕稼者。雜教部落。又浚古渠。溉田數千頃。穀以恆賤。邊政大治。至大改元。戊申。帝賜大帳。如親王制。諸藩稟命戎事。則以宴之。仍賜酒米百斛。皇太后今上咸有賜焉。天下傾耳以俟復召。是冬十一月。遘疾。召其屬曰。吾不起矣。不得報國矣。汝曹各自勉。此間金穀。勿貽朝廷慮。其屬以聞。帝驚愕。命醫偕其子脫歡行。以閏月某日。薨于和林所居之正寢。春秋五十又二。天雨水冰連日。帝大傷悼。遣近臣慰諭其子。賜賻錢五萬緡。今上賻錢二萬五千緡。勅大興尹買葬地。昌平陽山南之原。曰。使天下後世知吾賢相耳。乃胥議爲石塚。柩至。以是月二十有九日葬焉。近而朝著遠而士民。以及四方。慟哭流涕。嗟悼懷慕。及奠于冢者。無有已也。明年己酉八月。有封諡之命。先配孫都氏。繼室扎刺兒氏。昭列氏。扎刺兒氏。怯列氏。並追封順德王夫人。一子卽脫歡。由近侍爲太子賓客。今上御極。遷御史中丞。進大夫。官榮祿大夫。襲號答刺罕。博貫經史。特立正言。得風

憲體。皇慶改元壬子。制加王曾祖考而下三世爵諡。大夫之母完者氏。封順德太夫人。王爲人神宇靖偉。簡重寡言。不見喜愠。望之儼然。知其爲公輔器。其在宗正也。從世皇北巡。平宗王亂。初入叛境。王率三百騎。猝與敵遇。徐整騎突出敵背。連殺矢殫數人。敵披靡遁。帝壯之。其中書也。引儒生討論墳典。至堯舜禹湯文武之爲君。皋夔稷契伊傅周召之爲臣。歎曰。人生不知書可乎。乃館士教其子學。由是而觀。王之文武志略。本乎天性。奮身逢時。發於至誠。故其事業之見于世。剛明正大。歸巍煒燁如此。嗚呼。古所謂大臣者。王爲無愧矣。臣旣述其事。乃繫之以詩曰。

漢有文成。難制將變。元有忠武。患去未見。掖聖承天。偉績共貫。忠武有孫。維王忠獻。維嶽降靈。維王以生。雲風類從。近列以升。穆穆世皇。羣材權衡。孰大予任。王予是稱。利器所施。宗正焉始。挺然鸚立。獄平政理。朝有巨姦。王不以齒。有媚不答。姦氣爲褫。帝念湖廣。控馭匪宜。陟之鼎司。曰汝往釐。霜肅露濡。化行若馳。鳥蠻海夷。悅服熙熙。移杭未旬。入總大。民有怙恃。事有龜鏡。惡者自懲。善者相慶。百度齊聲。咸統于正。成宗上仙。回邪譁張。勢挾中闈。構謀非常。王翊潛龍。寘彼斧斯。伊霍之重。賴其胥匡。武皇嘉之。康錫三接。朔方往撫。有聞赫赫。一夕隕星。山圯棟折。遄歸之望。竟莫爾愜。天子曰嘻。斯何人斯。何紓予思。其碑而辭。大書深刻。九達是向。尙千萬年。監此良相。

駙馬昌王世德碑

張士觀

至治元年十二月癸亥。制贈駙馬昌王阿失高祖季禿。爲推忠宣力佐命開國功臣。太師。開府儀同三司。駙馬都尉。上柱國。追封昌王。諡忠武。高祖妣公主帖木倫。公主果真。並追封昌國大長公主。曾祖鎖兒哈。

宣忠保大翊運開國功臣、太師開府儀同三司、駙馬都尉、上柱國、追封昌王、諡忠定。曾祖妣公主不海罕。追封昌國大長公主。祖扎忽兒陳、推誠靖遠佐運贊治功臣、太師開府儀同三司、駙馬都尉、上柱國、追封昌王、諡忠靖。祖妣公主也孫真、追封昌國大長公主。父忽鄰、効忠保德輔運佐理功臣、太師開府儀同三司、駙馬都尉、上柱國、追封昌王、諡忠宣。妣公主伯牙倫、公主卜蘭奚、並追封昌國大長公主。公主益里海、涯、追封皇姑、昌國大長公主。既頒卹典，又詔翰林、文諸石、臣士觀祇奉明詔。按世系、王族爲亦啓列氏。以小字阿失行。忠武蚤逢興運，從太祖皇帝起朔方，同諸豪傑飲水于黑河，要結盟誓，經啓疆宇。初太祖遣使四方，詢訪人情。至忠武所，時忠武止畜一牝羊，烹其羔迎勞使者。又以使者馬瘠，易以己之良馬，使回併烹牝羊餞之。使者復命，具以忠武誠款對。上嘉之，遂以皇妹帖木倫公主下嫁。實生忠定。帖木倫公主歿，繼尙皇女果眞公主。嘗從征，乃蠻翊衛左右，未始少離。上閱其勞，以所獲戶民多賜其部。我師旣破長城，右遣國王木華黎經略北京，左遣忠武規取阿八合，亦馬合等城，所得漢民卽賜忠武。且諭旨曰：「諸部各遣子弟入侍，時火魯刺帶哈兒八台違旨，命忠武提兵千人誅之，以令衆。復以所隸百姓賜之。」迨上征河西，扈蹕戎行，備著勤勞。師未旋，鼎湖上仙，甫旬日，忠武亦卒。太宗震悼不已，曰：「李禿事我皇考，宣力良多，今已云亡，送還本土，遂葬於乞只兒，仍禁其地三年。如國家制，忠定繼起，擢爲萬戶。尙宗女不海罕公主，總戎南征，攻嘉州破之，師還卒于道。忠靖從定宗皇帝討平萬奴有功。尙宗女也孫眞公主，忠宣先尙。憲宗女伯牙倫公主，以失列吉叛，屢著戰功，繼尙宗女卜蘭奚公主，征乃顏，扈從乘輿，忠勤備至。世祖憐之，賜名霸突，霸突譯云驍勇也。維亦啓列氏，世篤忠貞，積慶流祉，至王益大，王生資英果，年十五已能從。」

征乃顏躬履行陣。至今不懈。卻敵奏功者屢矣。是以尙宗女撒兒塔陳公主。歲辛丑。與都瓦戰。射中其足。敗之。成宗錄其功。以皇女益里海涯公主下嫁。是生今上皇后。及晉王妃亦隣真八刺。繼尙憲宗女孫買的公主。武宗卽位。襲爲萬戶。賞賚優渥。頒金印。封昌王。仍置王府。迨仁宗朝。賜文豹。及海東青白鸚。歲以爲常。今上卽位。賜楮幣二萬定。西馬及七寶帶各一。太皇太后繼賜楮幣萬定。子七人。曰失刺渾台。尙宗王木南子。東亦勒真公主。撒兒塔陳公主出也。曰監藏八刺。曰阿刺納失里。買的公主出也。曰塔海。曰汝奴朶兒只。監賊朶兒只。臣竊惟由漢以來。言世家者。必曰袁氏之四世五公。高密之重侯。累將。載在方策。以爲美談。王家由高曾以來。載德象賢。忠事我朝。至於奕世封王。一門尙主。國家所以崇德報功。斯亦至矣。其寵貴視袁氏鄧氏。宜無少讓。而隆名偉績。則又過之。以之銘鍾鼎。書竹帛。其誰曰不然。臣士觀謹再拜稽首而獻銘曰。

於皇聖元。受命于天。羣雄入彀。載造坤乾。忠武崛起。儷景同翻。翼佐王烈。執銳被堅。矯矯忠定。奮其才賢。光依日月。躬屬囊韃。四征弗庭。所向無前。在定宗世。擊豎擾邊。乃命忠靖。扈蹕周旋。與謀幃幄。奏捷戎軒。忠宣繼之。不懈益虔。卻敵伐戎。智勇兼全。篤生昌王。于蕃于宣。靖氛沙漠。忠力益殫。惟帝念勞。追卹其先。何以寵之。國姻世聯。何以貴之。王爵世延。詔紀金石。誓肩河山。特以表忠。千載永傳。

曹南王世德碑

虞集

中書右丞相臣某等言。陛下入正大統。道汴。共命山東。河北。蒙古。軍都萬戶府都萬戶也速迭兒。以其兵從至京師。以功拜河南等處行中書平章政事。於法官一品。當贈三代官封也。速迭兒曾大父撥徹。大父

也。柳干，父阿剌罕，嘗爲大將，戰功多，又多死王事軍中，宜追封以第一等爵。制曰：可。有司以詔書議贈所當得官，按地定封。於是故贈定威佐運功臣榮祿大夫司徒上柱國曹國公諡忠定撥徹加贈定威佐運功臣光祿大夫司徒上柱國追封曹南王諡如故。故蒙古漢軍都元帥贈宣忠靖遠功臣光祿大夫中書右丞相上柱國曹國公也。柳干加贈宣忠靖遠佐運功臣金紫光祿大夫中書右丞相上柱國追封曹南王。仍諡桓毅。故光祿大夫中書左丞相贈協謀佐理功臣太師開府儀同三司上柱國曹國公諡武定阿剌罕加贈竭誠宣力定遠佐運功臣太師開府儀同三司上柱國追封曹南王。改諡忠宣。曾祖母塔拜祖母滅列母脫端闊闊倫皆先封曹國夫人改封曹南王夫人制下有勅國史臣集其以曹南王世家行事歲月著文于碑。臣受詔謹按撥徹蒙古扎刺兒台氏太祖皇帝初起朔方豪傑之士雲起響應而從之爲之腹心爪牙者必皆有深智遠識有勇而善謀是以東征西伐無不如志以成萬世之業者天爲之生才而聖神善用之故也。撥徹自其幼年已在宿衛爲火而赤火而赤者服御弓矢常侍左右者又爲博而赤博而赤者親烹飪以奉上飲食者也。蓋非篤慎強敏見知而親信任使者不得預是以屬軍所向無不在行數以徇戰掠地著功受賞太宗皇帝卽位仍以其職從征行隴北陝西之役攻城壁取郡縣率先戰士竟死之也。柳干繼爲火而赤博而赤膺其父之職也以太宗之命事岳里吉太子爲番衛之長歲乙未闕出忽都禿太子出師伐金遂侵宋有旨出從戰戰有功拜萬戶方是時察罕以太祖所拔重臣爲大將位望崇甚而也。柳干以天下馬步禁軍都元帥爲察罕之副總領諸翼蒙古漢軍馬統領屯戍大軍南面之征最爲重兵矣於是取陝西掠河東踐河南歲乙卯擣光壽大帥察罕歿憲宗皇帝命也。柳干代之拜諸

翼軍馬都元帥統大軍攻淮東西諸城。歲戊午。帥師至揚州。數出戰。遂以戰死。阿剌罕以諸翼蒙古軍馬都元帥統其父之軍。從世祖皇帝南伐。宋憲宗崩。世祖北還。卽皇帝位。從至末黎。伯顏李剌之地。阿里不哥。阿藍鯨兒。渾都海。興兵爲亂。不受詔。命討之。阿剌罕以其所部蒙古軍擊之。北至西門禿之地。遂追之。至河西。功成而還。中統建元之歲。賞功賜黃金五十兩。二年。濟南帥李壇以山東反。大發兵討之。阿剌罕總其衆。次老倉口。以進戰。明年。濟南破。壇誅。山東平。師還。又明年。賞功賜黃金虎符一。銀印一。以舊官將其軍。至元初。大軍伐宋。五年。師圍襄樊。力戰數有功。十一年。取宋大軍渡江。阿剌罕以其師取鄂州。泝江陵下。至京口。所至郡縣降其軍。慰撫其民。明年。拜昭毅大將軍。統其師發建康。道溧水。溧陽。指獨松關。抵杭州上方。道與宋將吳某等戰。斬之。斬首七千級。又與宋將祝亮戰。擒亮。并其裨校七十二人。斬首三千餘級。又與宋兵戰。斬首七千餘級。又斬逐其援兵。退走數十里。宋將奉使吳某。都統丁某。總制趙某。來迎戰。敗之。斬首三千級。擒總制谷某。又擒宋將張公。及其裨校。斬首二千級。六月。卽軍中拜中奉大夫。行中書省參知政事。是年。宋亡。明年。丞相伯顏以宋主入覲。九月。阿剌罕帥東渡。渡浙。取越。明。台。溫。衢。婺。處。及閩中諸郡。追宋宗室秀王某。道數戰皆敗之。降其運使趙某。提刑趙某。五百餘人。至福州。與宋軍轉戰四十餘里。斬步帥觀察使李世達等於陣。殲其軍。獲秀王及其家屬將吏百八十餘人。降其部曲淮卒三千人。於是江南悉平。十二月。有詔以中奉大夫。中書參知政事。授金虎符。行江東宣慰使。郡縣新附。民心未安。威信所孚。莫不悅服。十四年。入覲。上嘉其功。進拜資善大夫。中書左丞。仍留宣慰江東。十八年。入覲。方是時。海內悉已平定。舟車所至。莫不服從。而日本叢爾海島之間。彌固自保。有可以致討爲言。天子從。

之。迺賜玉帶弓矢。命爲中書左丞相行省事。統蒙古諸翼軍馬四十餘萬。往征之。師次明州。且渡海矣。歿焉。既歿。而子也速迭兒幼。拜降也。速迭兒之兄也。襲世職爲萬戶總其軍。後以功僉書江淮行樞密院事。進拜江浙行省右丞。福建行省右丞。河南行省平章政事。仍領其先世萬戶軍馬。既歿也。速迭兒以元貞元年。世其職。受昭勇大將軍。左手蒙古軍萬戶。延祐三年。覃恩特加昭毅大將軍。泰定三年。進昭武大將軍。皆以萬戶總其軍如故。後二年。今上皇帝南還京師。慨然懷撥亂之志。將有大正於天下。道過汴梁。今太保伯顏公。方鎮汴省。八月庚子。召也速迭兒帥其兵以行。乙巳。兵大集。士卒感激。赴義車馬器械精備。勇氣自倍。丁未。命爲本省參知政事。師行。庚戌。進平章政事。仍兼山東河北蒙古軍都萬戶府都萬戶。九月庚申。同知樞密院事。仍兼都萬戶。壬申。皇帝卽位大明殿。建元天歷。明日。拜知樞密院事。授以樞密院印。仍領其萬戶事。甲戌。禿滿達兒自遼東引兵寇通州。令也速迭兒帥諸翼軍馬出禦之。丙子。王禪等之兵軍於北皇后店也。速迭兒移兵合擊敗之。己卯。哈刺赤。渾都帖木兒。阿刺帖木兒之兵。軍昌平縣東白浮村。帥師合擊敗之。壬午。昔寶赤大都之兵。軍於昌平縣東北。又帥師合擊敗之。凡來寇之兵。悉已敗。總兵者。或執或敗走。北面悉平。癸未。太師右丞相會諸將於龍虎臺下。奏凱於朝。有敕命也速迭兒守居庸之北關。壘石以爲固。十月己亥。拜榮祿大夫。知樞密院事。依前兼管都府事。統領諸翼蒙古軍馬。使出師禦寇兵之西入者。師次廣平磁州之武安縣。敗獲總兵者也。先帖木兒等。而西南諸郡。以次告平。庚子。召還。十一月丁亥。樞密院奉勅散諸軍。行院官還京師。明年二月。以舊官復拜山東河北蒙古軍都萬戶府都萬戶。五月。上之上都也。速迭兒仍帥其所統兵。從十月癸卯。皇帝若曰。也速迭兒。屬囊鞬以備干城。

恪恭職事。朕用嘉之。其以爲河南行中書省平章政事。十一月丙寅。以所統兵。置大都督府。命兼山東。河北。蒙古軍大都督。秩從二品。刻銀印賜之。己巳。有封贈之命。嗚呼。上之所以待功臣將帥。寵錫榮耀。不亦甚乎。臣嘗聞之。自昔國家所貴。有勳舊之臣者。以其君臣之契深。宗社之事諗。逆順向背之道。素定於見聞。而愛敬之誠。自有不能已者。故其得備戎行。氣決志憤。以能成功也。世祖皇帝。既定海內。以蒙古一軍。留鎮河上。與民雜耕。橫互中原。故將委忠君於國人。備非常於他日。其所以爲子孫計者。深且遠矣。今上皇帝。以天縱之資。歷造昧之久。奮名義。以致討夙逆。應天人而歸履大位。固歷數之所在也。若曹南王家。自開基以來。已入備禁衛。出死行陣者。三世矣。今平章以其世守之舊兵。奉中興之大業。以致真王之封食。所居之邑。聲振大藩。受軍民之寄。福祿方未艾也。嗚呼。偉哉。敢再拜稽首而爲之銘。詩曰。昔在太祖。受命自天。聖子神孫。師武用宣。世祖赫赫。一是萬國。虎臣孔多。貴有世績。忠定之興。承國肇基。迺執干戈。迺奉鼎彝。不寧方來。先後奔奏。盡瘁殞身。以昌厥後。有竭桓毅。益信以崇。帝討王誅。無往不從。金氣旣衰。宋亦就蹙。兼弱攻昧。我帥我督。截彼淮浦。其流湯湯。蹀血以終。厲我國殤。克繼父祖。忠宣之武。天錫之功。世皇是輔。肅肅南征。絕江擣城。左纛振旅。馳追不庭。世皇御天。於鑠如日。式園不遺。聲教迺訖。于時出師。有專有分。江漢之間。忠宣所軍。蒙衝載兵。遡江薄海。列郡風靡。有順無悔。旋指江東。進師合攻。關柵兒嬉。孰當吾鋒。斬將連營。覆卒盈野。迺會元戎。于城之下。變變孱孱。解壘入朝。掠其餘疆。曾不崇朝。旣定甌越。成功來告。命以相臣。持節東道。治以歲成。位以序升。入覲天子。龍光是承。天子曰嘻。蠢彼海裔。爾相予左。帥士以濟。臨涯揚舲。海若弭靈。天不愆遺。亟置將星。忠宣所統。國人之勇。留戍羅絡。齊魯梁宋。

鼓旗閒閒。武帳在中。旣世其官。又世其功。今我聖皇。中興以正。錫鑾在塗。萬騎前乘。誰其將之。不二之臣。彼壘于郊。摧之爲塵。聖皇賞功。寶玉鷹馬。還長其鎮。爲國召虎。頌頌爾軍。何以表之。爾建大府。都督之旗。爾家于曹。有桑有土。昔公今王。三世之祜。豐碑列功。備書三王。咨爾多士。勸忠勿忘。

元文類卷之二十六

碑文

高昌王世勳碑

虞集

至順二年九月某日皇帝若曰。予有世臣帖睦兒補化。自其先舉全國以歸我太祖皇帝。實贊興運。勳在盟府。名著屬籍。世續令德。以勸相我國家。至帖睦兒補化。佐朕理天下。爲丞相。爲御史大夫。文武忠孝。厥績懋焉。昔其父葬永昌。大夫往上冢。其伐石樹碑。而命國史著文而刻焉。臣集頓首受詔。退而考諸高昌王世家。蓋畏吾而之地。有和林山。二水出焉。曰禿忽刺。曰薛靈哥。一夕有天光降于樹。在兩河之間。國人卽而候之。樹生癭。若人妊身。然自是光恆見者。越九月又十日。而癭裂得嬰兒五。收養之。其最穉者曰卜古可罕。旣壯。遂能有其民人土田。而爲之君長。傳三十餘君。是爲玉倫的斤。數與唐人相攻戰。久之。乃議和親。以息民而罷兵。於是唐以金蓮公主妻的斤之子葛勵的斤。居和林別力跋力答。言婦所居山也。又有山曰天哥里干答哈。言天靈山也。南有石山曰胡力荅哈。言福山也。唐使與相地者至其國。曰和林之盛彊。以有此山。去壞其山以弱之。乃告諸的斤。曰旣爲婚媾。將有求於爾。其與之乎。福山之石於上國無所用。而唐人願見。遂與之。石大不能動。唐人使烈而焚之。沃以醇酢。碎石而輦去。國中鳥獸爲之悲號。後七日。玉倫的斤薨。自是國多災異。民弗安居。傳位者數亡。乃遷諸交州而居焉。交州今火州也。統別失八

里之地。北至阿木河。南接酒泉。東至兀敦。甲石哈。西臨西番。凡居是者。百七十餘載。而我太祖皇帝。龍飛於朔漠。當是時。巴而木阿而忒的斤。亦都護在位。亦都護者。其國主號也。知天命之有歸。舉國入朝。太祖嘉之。妻以公主。曰也立安敦。待以子道。列諸第五。與者必那演。征罕勉。力鎖潭。回回等國。將部曲萬人。以先啓行。紀律嚴明。所向克捷。又從太祖。征你沙卜里。征河西。皆有大功。薨。次子玉古倫赤的斤。嗣爲亦都護。玉古倫赤的斤。薨。子馬木刺的斤。嗣爲亦都護。將探馬軍萬人。從憲宗皇帝。伐宋合州。攻釣魚山。有功。還軍火州。薨。至元三年。世祖皇帝。命其子火赤哈兒的斤。嗣爲亦都護。海都帖木迭兒之亂。畏吾而之民。遭難解散。於是有旨。命亦都護收而撫之。其民人在宗王近戚之境者。悉遣還其部。始克安輯。十二年。都哇卜思巴等。率兵十二萬。圍火州。揚言曰。阿只吉奧魯只諸王。以三十萬之衆。猶不能抗我。而自潰。爾敢以孤城嬰吾鋒乎。亦都護曰。吾聞忠臣不事二主。且吾生以此城爲家。死以此城爲墓。終不能爾從。城受圍。六月不解。都哇系矢以書射城中。曰。我亦太祖皇帝諸孫。何以不我歸。且爾祖嘗尙主矣。爾能以女歸我。我則休兵。不然則亟攻爾。其民相與言曰。城中食且盡。力已困。都哇攻之不止。則淪胥而亡。亦都護曰。吾豈惜一女。而不以救民命乎。然吾終不能與之相面也。以其女也。立亦黑迷失別吉。厚載以茵。引繩墜諸城下。而與之。都哇解去。其後入朝。上嘉其功。錫以重賞。妻以公主。曰巴巴哈兒。定宗皇帝之女也。又賜寶鈔十二萬。定以賑其民。還鎮火州。屯於州南哈密力之地。兵力尙寡。北方軍猝至。大戰力盡。遂死之。子紐林的斤。方幼。詣闕請兵北征。以復父讎。上壯其志。賜金幣鉅萬。妻以公主。曰不魯罕。太宗皇帝之孫女也。主薨。又尙其妹。曰八卜叉公主。有旨。師出河西。候與北征大軍齊發。遂留永昌焉。會吐蕃脫思麻作亂。

詔以榮祿大夫平章政事領本部探馬等軍萬人鎮吐蕃宣慰司威德明信賊用斂跡其民以安武宗皇帝召還嗣爲亦都護賜之金印復署其部押西護司之官仁宗皇帝始稽故實封爲高昌王別以金印賜之設王傅之官其王印行諸內郡亦都護之印則行諸畏吾而之境八卜叉公主薨尙公主曰兀刺真安西王阿難荅之女也領兵火州復立畏吾兒城池延祐五年十一月廿一日薨子二人長曰帖睦兒補化次曰錢吉皆八卜叉公主出也帖睦兒補化大德中尙公主曰朵兒只思蠻闕端太子孫女也至大中從父入覲備宿衛又事皇太后於東朝拜中奉大夫大都護陞資善大夫又以資善出爲鞏昌等處都總帥達魯花赤奔父喪於永昌請以王爵讓其叔父欽察台不允嗣爲亦都護高昌王至治中與喃答失里同領甘肅諸軍且治其部泰定中召還與寬徹不花威順王買奴宣靖王闊不花靖安王分鎮襄陽尋拜開府儀同三司湖廣行省平章政事今上皇帝歸正大統召之至汴以左丞相留鎮旋趨至京師戮力削平大難鎮湖廣時左轄相媚而害政人所弗堪至是有旨執而僇之乃更爲申揆於上曰是誠有罪然不至死再三言之得釋其不念舊惡以德量贊襄類如此天歷元年十月拜開府儀同三司上柱國錄軍國重事知樞密院事明年正月以舊官勳封拜中書左丞相三月加太子詹事十月拜御史大夫大夫之拜左相也追念先王之遺意讓其弟錢吉嗣爲亦都護高昌王臣惟高昌祖之所自出事甚神異其子孫相傳數十代至于今克治其土豈偶然哉火赤哈兒的斤百戰以從王事捐骨肉以救其民後卒死之其節義卓然如此至其子與孫再世三王盛德之報也大夫世胄貴王清慎自持戶庭之間動中禮法平易以近民正己以肅物仁義之功沛如也及其臨大政決大議憂深思遠而聲容凝重若泰山然用能彌綸大經

以佐成雍熙之盛。所謂社稷之臣也哉。表其碑曰。世勳爲宜。敢再拜系之以詩曰。

維皇太祖建極定邦。知幾先徠。偉茲高昌。列圖率賦。寶玉重器。稽首受命。以表誠至。太祖曰。嘻。天啓爾衷。有附匪疏。以究爾功。囊韃介冑。十千維旅。以從四征。斥廣疆宇。從我王事。靡解朝夕。邦之世臣。食其舊邑。舊邑高敞。介乎強藩。爲暴突來。虔劉以殘。保障扞城。我禦我備。敵爲弗順。我死無貳。崇墉言言。寇來實繁。力殫守堅。責我師曷。有齊季女。出女紆難。義有絕愛。皇用咨歎。寇退民完。天子慨之。輦帛載金。悼斯漑之。城郭室家。旣還旣復。庶其寧我。皇錫之福。于廬于處。狂囂倚之。矢盡衆殲。執節死之。維時賢嗣。泣血入告。請揚天威。以報無道。天子壯之。俾軍于西。撫爾民人。授之鼓鞶。有闕西羌。弗靖以撓。移節往治。旋就駟擾。武皇纘武。瞻爾舊服。節旄印綬。仍護其屬。乃稽王封。在時仁宗。旗纛舒舒。刻章以庸。迺永昌。幕府斯建。將星宵隕。亦旣卽遠。宰木陰陰。閱歷歲時。顧瞻徘徊。邦人之思。大夫嗣德。克敬以讓。三命彌恭。世爵用享。佩玉瓊琚。靖共以居。躬行孝嚴。服御不渝。肅肅雖離。有察有容。親親尊尊。允德允功。天子還歸。大義攸正。大夫在行。民信以定。旣安旣寧。治久告成。大夫司憲。百度孔明。袞裳赤舄。進見退息。傲于無虞。匪泰伊怵。大夫申申。明哲以孚。嘯歆有懷。永昌之墟。天子有詔。大夫省墓。勒文載碑。世勳是祚。維王孫子。永言思之。豈惟子孫。百辟其儀之。

句容郡王世績碑

虞集

國家治平之業。所以尊安而久固者。禮樂刑政。一本於朝廷。而執干戈以衛社稷於四境之外者。則亦必有桓毅過人之勇。直亮不回之節。以兼爪牙腹心之任。而又世世祖父子孫相承一志。然後可以內爲天

子之所信倚外爲強敵之所懼服。故處常則有不可犯之勢。遭變則建非常之功。嗚呼！其所關係豈輕也哉。天歷元年，皇帝撥亂反正，以太平王右丞相燕帖木兒有建謀力戰之功，思其祖父之績，乃敕史臣製文紀事，勒諸貞石，以示不朽焉。謹按欽察之先武平北折連川，按答罕山部族也。後遷西北，卽玉黎北里之山居焉。土風剛悍，其人勇而善戰。自曲年者，乃號其國人曰欽察，爲之主而統之。曲年生唆末納，唆末納生亦訥思。太祖皇帝征蔑乞思火都，火都奔亦訥思，遣使諭取之，弗從。及我師西征，亦訥思老不能理其國，歲丁酉，亦訥思之子忽魯速蠻自歸於太宗，而憲宗受命帥師，已及其國。忽魯速蠻之子班都察舉族來歸，從討蔑乞思有功。世祖皇帝西征大理，南取宋，其種人以強勇見信，用掌芻牧之事，奉馬湏以供玉食。馬湏尙黑者，國人謂黑爲哈刺，故別號其人曰哈刺赤。日見親近，妻以哈納郡王之女弟訥論。中統初元，討阿里卜哥之亂，班都察與其子土土哈皆有功。班都察卒，土土哈領其父事，是爲句容郡武毅王。海都之叛，皇子北平王帥諸王之師，鎮祖宗興龍之故地。至元十四年，叛王脫脫木失列吉入寇，諸部曲見掠先朝大武帳亡焉。土土哈王憤之，誓請決戰。三月，敗其將朵兒赤延於納蘭不刺，以所掠諸部還。四月，只兒瓦剌搆亂，應昌脫脫木以兵應之，與我軍遇，將決戰，先得其斥候數十，脫脫木懼而引去，遂滅只兒瓦剌。六月，逐其兵於禿刺河。八月，又敗之幹歡河，得所亡大帳，還諸部之衆於北平。我師北伐，詔率欽察驍騎千人以從。十五年正月，追失列吉踰金山，擒扎忽台以獻。又敗寬赤哥等軍，俘獲甚衆，冬入朝，召至榻前，親慰勞之，賜以白金百兩。海東白鶻一，國家侍內宴者，每宴必各有衣冠，其制如一，謂之只孫，悉以賜之。且有詔曰：祖宗武帳，非人臣所得御，卿能歸之，故以與卿。軍中宴，諸帥則設之，欽察人爲民戶，及

隸諸王者。別籍之戶。給鈔二千貫。歲給粟帛。擇其材者備禁衛。十九年。拜昭勇大將軍。同知太僕院事。明年。改同知衛尉院事。領羣牧司事。給霸州文安縣田四百頃。命哈刺赤屯田。益以亡宋新附軍八百。二十一年。賜金虎符。以河南等路蒙古軍子弟四千六百隸之。二十二年。拜鎮國上將軍。樞密副使。二十三年。置欽察衛。遂兼其親軍都指揮使。聽以族人將吏備官屬。六月。海都兵入寇。奉詔與大將朵兒朵懷禦之。二十四年。諸王乃顏叛於東藩。陰遣使來結。也不干勝刺哈。王獲諜者。得其情。密以聞諸朝。請召勝刺哈以離之。他日。勝刺哈爲宴會。邀二大將。朵兒朵懷將往。王曰。事不可測。遂不往。勝刺哈計不得行。未幾有。詔召勝刺哈。王曰。此東藩之人。由東道。是其欲也。將不可制。言於北安王。命之西行。或言也不干將反者。軍吏請奏而圖之。王曰。不可緩也。身爲先驅。引大兵前。窮晝夜之力。渡秃兀刺河。與也不干戰。大敗之。世祖方親征。聞之。詔王沿河東行。盡收其餘黨。以還。道遇也鐵哥。其軍萬騎。擊走之。大獲乃顏畜牧。俘畔王哈兒魯等。獻之。康里欽察之人。先隸諸叛王者。悉來歸。置哈刺魯萬戶府。是歲。王子劄兀兒奉詔從太師。月兒律在軍。戰於百塔山。有功。拜昭勇大將軍。左衛親軍都指揮使。佩金虎符。出則被堅執銳。以率虎熊之士。入則操刀匕。以事割烹。執矟杓。以進。渾飲。親幸委任。已見如此。時成宗方撫軍。詔以王從十一月。征乃顏餘黨於哈刺。誅兀達海。盡降其衆。二十五年也。只里王爲叛王火魯哈孫所攻甚急。五月。王從成宗移師援之。敗諸兀魯灰。還至哈刺溫山。夜渡貴列河。敗叛王哈丹之軍。盡得遼左諸部。置東路萬戶府。以鎮之也。只里有女弟塔倫。遂以妻王。二十六年。海都軍叛金山。抵杭海嶺。皇孫晉王帥兵禦之。敵先據險。我師不利。王獨以其軍陷陣入戰。翼晉王出。明日。追騎大至。伏兵殿之。七月。世祖親巡北邊。召見王慰之。

曰。昔太祖與其臣之同患難者。飲班朮河之水。以記功。今日之事。何愧昔人。卿其勉之。海都等戰既數敗。又知上親征。遂引兵去。車駕還都。大宴。上謂王曰。朔方人來。聞海都言。戰者人人如土。土哈吾屬何所容身哉。論功行賞。先欽察之士。以建康廬饒舊籍。租戶千爲哈刺赤戶。又以俘獲之戶千七百。賜之官。一子以督賦。而創兀兒在宿衛。亦帥其軍。扈從。至於和林。兀卑思之山。拜昭武大將軍。欽察親軍都指揮使。左衛親軍都指揮使。兼太僕少卿。二十八年。王奏哈刺赤之軍。數已盈萬。足以備用。詔賜珠帽。珠衣。玉帶。金帶。名鶻。縑數萬匹。帥其人北獵。漢塔海邊。寇聞之。不敢動。二十九年。掠地金山。虜海都之戶三千。有詔進取乞里吉思。明年春。次欠河。冰行數日。盡取其衆。留兵鎮之。奏功。拜龍虎衛上將軍。賜行樞密院印。海都聞之。領兵至欠河。又敗之。擒其將李羅察。成宗皇帝即位。詔之曰。北邊事重。其免會朝。賜白金五百兩。冬。召入朝。有加賜。別賜其軍士鈔一千二百萬。元貞元年春。還守北邊。三年秋。諸王從海都者。皆來降。邊民驚動。王帥兵金山之玉龍海。備之。資饋畢。給民用。不擾。親導岳木忽等王以朝。上解御衣以賜。大德元年。拜銀青榮祿大夫。上柱國。同知樞密院事。欽察親軍都指揮使。如故。還邊。二月。至宣德府。薨。年六十一。是年有詔。創兀兒世其父官。領北征諸軍。後亦封。句容郡王。王帥師。隴金山。攻八鄰之地。八鄰之南有大河。曰蒼魯。忽其將帖良臺。阻水而軍。伐木柵岸。以自庇。士皆下馬。跪坐。持弓矢以待。我軍矢不能及。馬不可進。王卽命吹銅角。舉軍大呼。聲振林野。坐士不知所爲。爭起就馬。王麾師畢渡。湧水泊岸。木柵漂散。因奮師馳擊五十里。而後止。盡得其人馬。廬帳。還次阿雷河。與李伯拔都之軍相遇。李伯拔都者。海都所遣。援八隣者也。阿雷之上。有山甚高。李伯陣焉。山高峻。馬不利於下馳。急麾軍渡河。蹙之。李伯馬下坂多顛。躓。

急擊敗之。追奔三十餘里。李伯僅以身免。二年。北邊諸王都哇徹禿等。潛師急至。襲我火兒哈禿之地。火兒哈禿亦有山甚高。其師來據之。王選勇而能步者。持挺刃。四面上奮擊。盡覆其軍。斂遁者無幾。三年。入朝。上解衣賜慰勞。優渥。拜鎮國上將軍。僉樞密院事。欽察親軍都指揮使。左衛親軍都指揮使。太僕少卿。還邊。是時武宗在潛邸。領軍朔方。軍事必諮於王。及戰。王常爲先。付託甚重。四年秋。畔王禿麥翰魯思等犯邊。王迎敵於闊客之地。及其未陣。王以其軍直搏之。敵不能支。逐之踰金山。乃還。五年。海都之兵。又越金山而南。止於鐵堅古山。因高以自保。王以其軍馳當之。旣得平原地。便於戰。乃并力攻之。敵又敗績。戰之三日。都哇之兵西至。與我大軍相持於兀兒禿之地。王又獨以其精銳。馳入其陣。戈甲戛擊。塵血飛濺。轉旋三周。所殺不可勝計。而都哇之兵幾盡。武皇親見之。曰。力戰未有如此者。事聞。上使御史大夫禿赤。知樞密院事塔刺海。也可扎魯。火赤禿忽魯。卽赤納思之地。聚諸王軍將。問戰勝功狀。於是親王以下。至於諸軍。咸以爲王功第一。無異辭。於是武皇命王尙雅忽禿楚王公主察吉兒。賞以尙衣貂裘。使者以功簿奏。上出御衣。遣使臨賜之。詔曰。邊圉事重。少留鎮之。七年秋。入朝。上親諭之曰。自卿在邊。累建大功。事蹟昭著。周飾卿身。以兼金。猶不足以盡朕意。遂賜御衣一黃金百兩。白金五百兩。鈔十萬貫。拜驃騎衛上將軍。樞密副使。欽察親軍都指揮使。左衛親軍都指揮使。太僕少卿。賜其親軍萬人。鈔四千萬貫。九年。都哇察八兒明里帖木兒等諸王。相聚而謀曰。昔太祖艱難。以成帝業。奄有天下。我子孫乃弗克靖。以安享其成。連年動兵。相殘殺。是自傷祖宗之業也。今撫軍鎮邊者。吾世祖之嫡孫也。吾與誰家爭哉。且前與土土哈戰。旣累不勝。今與其子創兀兒戰。又無一功。惟天惟祖宗。意可見矣。不若遣使請命罷兵。通一家。

奸使吾士民老者得其養。少者得其長。傷殘疲憊者得其休息焉。則亦無負太祖之所望於子孫者矣。使至。上深然之。於是明里帖木兒等罷兵入朝。特爲置驛以通往來。十年拜榮祿大夫。同知樞密院事。尋拜光祿大夫。知樞密院事。欽察左衛指揮。太僕少卿。皆如故。從武皇於渾麻出之海上。成宗崩。訃至。入告武皇曰。殿下親世祖之嫡孫。以先帝之命居祖宗之故地。以鎮撫朔方。且十餘年矣。海都約木忽兒。明里帖木兒。自世祖時各爲叛亂。今皆來歸。前後叛亡俘虜。悉復其舊。皆殿下之威靈也。臣先父土土哈。受知世祖恩深義重。臣之種人強勇精銳。臣父子用之無戰不克。殿下急宜歸定大業。以副天下之望。臣請率其衆。備驂乘之士。武皇納其說。卽日南邁。五月達上都。武宗皇帝卽位。賜王尙服七黃金。五百兩。白金五千兩。鈔二十五萬貫。先帝所御大武帳一。秋拜平章政事。仍兼樞密。欽察左衛。太僕。還邊。冬加封榮國公。授銀印。出制辭以命之。至大二年入朝。封句容郡王。賜金印一。黃金二百五十兩。白金一千五百兩。鈔一萬貫。上曰。世祖征大理時。所御武帳。及所服珠寶之衣。今以賜卿。其勿辭。翌日。又以世祖所乘安輿。賜王。上曰。以卿有足疾。故賜此。王叩頭泣涕固辭。而言曰。世祖所御之帳。所服之衣。固非臣所敢當。而乘輿尤非所宜蒙也。貪寵過當。臣實不敢。上顧左右曰。他人不知辭此。別命有司置馬。輦賜之。俾得乘至殿門下。仁宗在東宮。有衣帽金寶之賜。還邊。仁宗皇帝卽位。入朝。特授光祿大夫。平章政事。知樞密院事。欽察親軍都指揮使。左衛親軍都指揮使。太僕少卿。延祐元年也。先不花等諸王復叛。亦忒海迷失之地。王方接戰。有敵將一人。以戟入陣。刺王者。王擗其戟。揮大斧碎其首。血髓淋漓。殞於馬首。乘勢奮擊。大破之。二年與也先不花之將。也不干忽都帖木兒戰。麥干之地。轉殺周匝。追出其境。鐵門關。秋又敗其大軍。扎亦兒之

地上聞之。遣使賜勞有加。四年。上念王之功。而憫其老也。召之。命商議中書省事。知樞密院事。每見必賜坐。上食必賜食。待之以宗室親王之禮。王常曰。老臣受朝廷之賜厚矣。吾子孫不以死報國可乎。至治二年。薨。年六十三。臣聞古之言將者。曰謀與勇。惟王父子。沉機大略。固不可測。而其軍堅悍。懷疾有所攻。戰應聲而起。神變倏忽。奮無迴顧。智者不暇慮。勇者不及舉。而已敗衄無餘矣。此其所以致勝也。而又數世之傳。一軍之士。同稟忠義而不變。同赴患難而不辭。此其成大功。享大名。而膺國家之深信。異寵者歟。謹按王世家。忽魯速蠻。贈推忠効順功臣。金紫光祿大夫。司徒柱國。句容郡王。諡剛毅。妻帖古該。句容郡王夫人。班都察。贈推誠宣力保義功臣。太尉。開府儀同三司。上柱國。句容郡王。諡忠定。妻秃倫察。句容郡王夫人。土土哈。贈宣忠定遠佐運功臣。太尉。開府儀同三司。句容郡王。諡武毅。妻曰太塔你扎只刺真也。曰兀買八里真也。曰囊加真。翁吉刺真也。曰阿八倫。翁吉刺真也。曰塔倫也。只里。王女弟也。皆封句容郡王夫人。子八人。長曰塔察兒。定遠大將軍。北庭元帥。次曰太不花。御位下博兒赤。三曰劄兀兒。四曰別里不花。武略將軍。欽察親軍千戶。五曰帖木兒不花。武德將軍。建康廬饒等處哈刺赤戶達魯花赤。六曰歡差。武略將軍。欽察親軍千戶。七曰岳里帖木兒。武德將軍。僉武衛親軍都指揮使。司兼大都屯田事。八曰斷古魯班。昭勇大將軍。欽察親軍都指揮使。劄兀兒之妻。察吉兒公主。楚王女也。曰也先帖你塔塔兒真也。曰也仙忽都魯。宗室也。只里女弟。曰哈刺真塔塔兒真也。子七人。長曰小雲失不花。武略將軍。欽察親軍千戶。蚤卒。次曰燕赤不花。資德大夫。大司農卿。三曰燕帖木兒。太平王。答刺罕右丞相。四曰撒敦。榮祿大夫。宣徽院使。五曰燕秃哈兒。闐遺少監。蚤卒。六曰答里太禱。宗禮院使。七曰潑皮罕。幼卒。女四人。長曰忙。

哥台。適失禿兒駙馬弟。太忽禿魯。次曰完澤台。適相哥八刺王。三曰訥只罕。適沙藍朵兒只王。四曰月魯帖你。適阿魯灰帖木兒王。臣集拜手稽首而作銘曰。

維皇太祖受天明命。龍旗建旂。神旅用振。雲雷險屯。盤桓奮興。邇伐遠攻。羣方畏懲。既定大業。以遺子孫。分地有疆。羅絡森峙。維支之彊。宗子本根。孰披則離。孰固以存。赫赫世祖。大集厥成。天覆日臨。無往不庭。顧茲臣庶。嚮屬無外。天未悔禍。屬近而悖。挺爲暴彊。弄兵嬉狂。弗念弗懷。勞我父兄。我無藏怒。往正迷德。維時虎臣。無禦不克。虎臣維何。欽察世家。克長克君。爲國爪牙。相厥種人。均勇同悍。爾蒐爾帥。累百盈萬。牧則善駕。飲潼孔腴。衽金以居。鳴箭以趨。鳴箭咽咽。壯士心折。卷甲齊驅。千憤一映。孰爲叛夫。于旅于廬。王先伐謀。隨以勦屠。勿取寧止。不虞奄至。潰不暇奔。況及鬪死。父子百戰。從于宗藩。或拔或援。我圉永完。天不與畔。思禍知悔。力困于外。心服于內。來言來歸。矢辭大同。洒濯拜稽。以朝成宗。王護其來。徒御不驚。肅肅邊人。同我太平。桓桓武皇。實善將將。定策驂乘。王猷用壯。紀功則隆。論賞則豐。帝胄作嬪。五世王封。世忠世勇。列聖所使。千載之傳。國有信史。句容之墟。接于太平。今王之疆。天子所營。其功非常。報亦殊特。勒勳北郊。昭示萬國。

太師太平王定策元勳之碑

馬祖常

皇帝御興聖殿。制詔中書省臣曰。惟太師太平王中書右丞相臣燕帖木兒。以忠孝世臣。戴予中興。功在社稷。其令臣祖常文於碑。以昭示無極焉。臣聞帝王受命。天必儲瓌偉絕世之資。將相之才。與之會遇。以成大業。如我太祖世祖英傑智謀之士。聯袂充庭。以爲一世之用者。豈非天哉。天歷元年戊辰。皇帝將正

大位。天人合應。丞相臣燕帖木兒。以八月四日甲午。率勇士十七人。兵皆露刃。建大義於禁中。迺誓於衆。曰。武宗皇帝。有聖子二人。孝恭仁文。天下大統當歸之。今爾一二臣。敢紊邦紀。有不順者。斬。手。梓。平。章。烏。伯。都。刺。伯。顏。察。兒。縛。之。分。命。勇。士。執。諸。疑。貳。者。咸。下。獄。待。罪。籍。府。庫。錄。印。符。空。百。司。皆。入。內。以。聽。命。其。日。屬。學。士。臣。明。里。董。瓦。等。乘。遽。迎。皇。帝。于。中。興。路。密。以。意。諭。河。南。省。臣。而。稱。臣。勸。進。者。接。踵。於。道。左。矣。癸。卯。弟。撒。敦。子。唐。其。世。皆。棄。其。妻。孥。來。皇。帝。以。是。月。之。甲。辰。發。中。興。以。丁。巳。至。京。師。比。至。浹。旬。之。間。兩。以。左。右。矯。稱。使。者。南。來。者。云。駕。已。次。近。郊。諸。王。及。河。南。省。臣。萬。戶。各。以。兵。從。民。勿。譁。驚。北。來。者。云。皇。帝。大。兄。且。至。於。是。中。外。翕。悅。而。衆。志。定。矣。九。月。庚。申。諸。侯。王。王。禪。將。北。軍。軍。榆。林。西。丞。相。出。師。彼。未。及。陣。趨。撒。敦。馳。入。營。壁。衆。潰。追。之。懷。來。戊。辰。敵。入。千。門。鎮。關。撒。敦。赴。之。戰。薊。東。敗。之。十。有。三。日。壬。申。上。即。皇。帝。位。于。大。明。殿。受。百。官。朝。甲。戌。進。開。府。儀。同。三。司。上。柱。國。錄。軍。國。重。事。中。書。右。丞。相。監。修。國。史。知。樞。密。院。事。賜。黃。金。五。百。兩。白。金。二。千。五。百。兩。中。統。楮。幣。一。萬。錠。金。織。雜。采。二。千。疋。白。鶻。一。青。鶻。一。文。豹。二。承。詔。將。大。軍。東。出。薊。討。禿。滿。迭。兒。平。章。即。日。就。道。乙。亥。宿。三。河。夜。二。鼓。偵。者。報。王。禪。兵。奪。居。庸。關。略。大。口。丙。子。裹。糧。趨。榆。河。未。戰。聞。大。駕。出。宮。將。親。督。將。士。亟。請。見。上。奏。事。曰。凡。軍。事。一。以。付。臣。願。陛。下。班。師。撫。安。黎。庶。上。旋。還。宮。明。日。丁。丑。指。揮。使。忽。都。不。花。塔。海。帖。木。兒。同。知。太。不。花。陰。構。變。未。發。事。覺。械。三。人。送。闕。下。斬。之。己。卯。與。王。禪。前。軍。戰。榆。河。勦。之。追。殘。兵。於。紅。橋。北。阿。刺。帖。木。兒。槍。刺。馬。前。盤。馬。斫。之。刀。中。左。臂。即。曲。和。尙。斫。忽。都。帖。木。兒。亦。中。臂。二。人。皆。驍。捷。將。也。會。日。晡。就。宿。戰。所。庚。辰。上。聞。之。遣。使。賜。御。衣。一。襲。慰。勞。甚。渥。兩。軍。隔。紅。橋。水。爲。營。辛。巳。合。兵。慶。戰。白。浮。之。野。大。敗。之。手。刃。七。人。夜。二。鼓。盡。呼。裨。將。阿。刺。帖。木。兒。孛。倫。赤。岳。來。吉。使。將。百。騎。上。

風大譟亂以鉦鼓箭射營中敵自蹂躪至旦始悟壬午天霧王禪等得棄甲北走癸未兵復集我軍列白浮行伍立如植木敵不敢犯至夜又命撒敦出其後南向八都兒脫脫木兒出其前北向鼓譟大呼吹銅角雜人馬聲彼營軍不知計又皆夜相射旦乃西走入都兒者華言猛士也甲申襲王禪兵于昌平北上遣賜上尊酒諭旨曰丞相無與敵戰親冒矢石脫不虞奈宗社何以大將旗鼓督戰可也丞相曰凡戰臣先之敢後者臣論以軍法是日斬首數千級降者萬餘人乙酉去衣屨徒跣求生者又萬餘人王禪遂單騎亡入北山發也速魯兒也不倫撒敦追之是日還至昌平南敵將竹溫台闊克攻破虎北口掠石槽民丙戌先令撒敦進以大兵會諸侯王兵轉戰四十里至牛頭山獲孛羅帖木兒蒙古蒼失牙失帖木兒撒兒討溫四大將縛兩手載於馬鞍獻上天子斬之降者萬人餘兵四散夜遣撒敦脫脫木兒遮虎北口要其歸途丁亥諸侯王也先帖木兒及禿滿迭兒驅萬人薄我畿甸跳梁通州城下十月己丑朔日晡彼方憩馬我軍直擣之不及抽一矢東渡潞水而逃庚寅各面水陳兵不戰辛卯宵遁我軍渡潞水襲之癸巳再與諸侯王太平也先帖木兒朵羅觶及禿滿迭兒塔海血戰壇子山叢林唐其世從殺太平於陣中餘夜遁甲午撒敦脫脫木兒將兵追捕乙未諸侯王忽刺觶指揮使阿刺帖木兒安童自紫荊口犯良鄉丙申我軍循北山而西士皆馬上食馬以囊盛草粟繫馬口且行且食至盧溝忽刺觶兵潰凱還都人觀者拜者填道入見天子無矜容焉上大悅己亥進封答刺罕太平王以其地爲食邑降制褒美功名烜耀刻黃金爲印章以寵賚之珠對衣寶帶一具答刺罕華言世貨之也禿滿迭兒復入虎北口戰檀州南殲之萬戶哈刺那海以戲下兵降殺禿滿迭兒函首京師誅忽刺觶阿刺帖木兒安童朵羅觶塔海於國門之

外。齊王月魯帖木兒。元帥不花帖木兒。迺起兵嚮開平曰。皇帝正大統於大都矣。汝等知乎。姦臣倒刺沙。囚首請死。十月二十有二日。庚戌。奉皇帝璽來上。天下業遂定。明年己巳。上固讓位於大兄明宗皇帝。命侍御史臣撒迪。致讓奉迎。三月戊辰。丞相護皇帝璽於北土。明宗皇帝嘉之。拜太師。官階如前。迨明廟上賓。皇帝洊昇大位。一歲之間。爲天子佐命。兼揖讓征伐之事。而使中外清謐。華夏乂寧者。茲非天儲其才。使與受命之君。會遇以成大業者歟。文未奏上。詔賜定策元勳名碑。嗚呼盛哉。臣祖常拜手稽首而獻銘曰。

皇帝應天。赫矣龍奮。風霆不驚。受命啓運。曰皇考武皇。御極維昌。靈在天維。祥神在廟。維享啓厥聖子。弗畋以逸。弗燕于室。海上浴日。車環周達。陰隲我民。上帝監觀。儲茲師臣。維茲師臣。出將入相。戴我天子。征伐揖讓。桓桓于于。有亟有徐。露刃袒呼。虎旅疾趨。建義禁中。羣疑未同。縛三二臣。誓言於公。曰大統之傳。武皇帝有子。天序秩秩。孰敢干紀。聖祖明訓。封建伯叔。分地車旗。屏翰外服。孽臣萌芽。交構我家。神怒而憤。民恫而嗟。于徒于旅。闕其如虎。仗忠履順。有弗義者。斧地官金帛。司馬介胄。于時廷臣。先事恐後。大車出之。軍容大施。扼其重關。使不得突馳。羅絡森峙。戰守攻具。潢池弄兵。悉衆來赴。載同我馬。東北之野。斬鯢戮鯨。血鱗地赭。褫衣跣徒。日降萬夫。號泣草間。丐其完膚。皇帝曰嘻。丞相汝勞。晝日三錫。寶帶珠袍。丞相稽首。是皆帝祉。驍將賈勇。及我弟與子。十月日吉。來上玉璽。姦臣斃顛。泥首就死。奠茲海寓。登世萬千。矢辭貞石。元勳之宣。元勳之宣。開國江孺。子孫保之。維善慶弗愆。

元文類卷之二十七

記

崔府君廟記

元好問

唐崔子玉府君祠。在所有之。或謂之亞嶽。或謂之顯應。王者皆莫知所從來。府君定平人。太宗時爲長子令。有惠愛之風。本道探訪使與長子尉劉。內行弗備。且有賊賊之鄙。時縣有虎害。府君謂二人者宜當之。已而果然。及一孝子爲所食。乃以牒攝虎至。使服罪。一縣以爲神。而廟事之。世所傳蓋如此。廟之在陽平者有年矣。貞祐之兵。燒毀幾盡。東平副元帥趙侯。以其父之志。爲完復之。其成也。侯命予以歲月記。故爲書之。傳曰。有功於民。則祀之。以勞定國。則祀之。此不爲小德小善者言。漢丞相忠武侯之歿。蜀人求爲立廟。朝議以禮秩不聽。百姓遂因時節。祭之道陌上。言事者或謂可聽于成都立之。安樂公不從。習隆向充拜章言。巷祭野祀。非所以存德念功。若盡順民心。則瀆而無典。建之京師。又偪宗廟。止可令其近墓爲之。所親以時設祭。故吏欲奉祠者。皆限至廟。斷其私祀。以從正禮。於是始從之。爲廟於沔陽。由是觀之。漢人於忠武侯。其難之也如是。況其下者乎。且夫郡縣之良吏。血食一方。見于今者多矣。然卓茂則止於密。魯仲康則止於中牟。朱邑則止於桐鄉。召父杜母則止于南陽。蓋未有由百里之邑。達之天下四方。如府君之祠之侈者也。高門之蕩然。廣殿之渠然。袞冕之巍然。侍衛之肅然。雖五方帝之尊。且雄無以進。使其止

於爲土木偶焉。斯可矣。或有物焉。則將疾走遠引。逃避之不暇。矧敢馮几負屐。以當天下四方臣僕之敬乎。嗚呼。祀典之壞久矣。惟祀典壞。而後撤淫祠之政舉。喪亂以來。天綱弛而地維絕。人心所存。唯有逃禍。微福在耳。惟逃禍。微福者在。故兇悍毒詐。有時而熄。若曰淫祀無福。非其鬼而祭之。爲諂。爾所敬。非吾之所謂敬。爾所懼。非吾之所當懼。彼將蕩然無所畏忌。血囊仰射。又何難焉。使梁公而在。吾知前日江淮之舉。有不暇施于今日者矣。故併及之。使人知侯之意。有在。

汴故宮記

楊 奐

己亥春三月。按部至于汴。汴長吏宴于廢宮之長生殿。懼後世無以考。爲纂其大概云。皇城南外門曰南薰。南薰之北。新城門曰豐宜。橋曰龍津。橋北曰丹鳳。而其門三。丹鳳北曰州橋。橋少北曰文武樓。遵御路而北。橫街也。東曰太廟。西曰郊社。正北曰承天門。而其門五。雙闕前引。東曰登聞檢院。西曰登聞鼓院。檢院之東。曰左掖門。門之南。曰待漏院。鼓院之西。曰右掖門。門之南。曰都堂。承天之北。曰大慶門。而日精門。左昇平門居其東。月華門。右昇平門居其西。正殿曰大慶殿。廡曰嘉福樓。西廡曰嘉瑞樓。大慶之後。曰德儀殿。德儀之東。曰左昇龍門。西曰右昇龍門。正門曰隆德。曰蕭牆。曰丹墀。曰隆德殿。隆德之左。曰東上閣門。右曰西上閣門。皆南嚮。東西二樓。鐘鼓之所在。鼓在東。鐘在西。隆德之次。曰仁安門。仁安殿。東則內侍局。內侍之東。曰近侍局。近侍之東。曰嚴祇門。宮中則曰撒合門。少南曰東樓。卽授除樓也。西曰西樓。仁安之次。曰純和殿。正寢也。純和。西曰雪香亭。雪香之北。后妃位也。有樓。樓西曰瓊香亭。亭西曰涼位。有樓。樓北。少西曰玉清殿。純和之次。曰寧福殿。寧福之後。曰苑門。由苑門而北。曰仁智殿。有二大石。左曰敷錫。

神運萬歲峯。右曰玉京獨秀太平巖。殿曰山莊。莊之西南曰翠微閣。苑門東曰僊韶院。院北曰湧翠峯。峯之洞曰大滌湧翠。東連長生殿。殿東曰湧金殿。湧金之東曰蓬萊殿。長生西曰浮玉殿。浮玉之西曰瀛洲殿。長生之南曰閱武殿。閱武南曰內藏庫。由嚴祇門東曰尙食局。尙食東曰宣徽院。宣徽北曰御藥院。御藥北曰右藏庫。右藏之東曰左藏。宣徽東曰點檢司。點檢北曰祕書監。祕書北曰學士院。學士之北曰諫院。諫院之北曰武器署。點檢之南曰儀鸞局。儀鸞之南曰尙輦局。宣徽之南曰拱衛司。拱衛之南曰尙衣局。尙衣之南曰繁禧門。繁禧南曰安泰門。安泰西與左昇龍門直。東則壽聖宮。兩宮太后位。本明俊殿。試進士之所。宮北曰徽音殿。徽音之北曰燕壽殿。燕壽殿垣後少。西曰震肅衛司。東曰中衛尉司。儀鸞之東曰小東華門。更漏在焉。中衛尉司東曰祇肅門。祇肅門東少南曰將軍司。徽音壽聖之東曰太后苑。苑之殿曰慶春。慶春與燕壽並。小東華與正東華對。東華門內正北尙廐局。尙廐西北曰臨武殿。左掖門正北尙食局。局南曰宮苑司。宮苑司西北曰尙醞局。湯藥局。侍儀司。少西曰符寶局。器物局。西則撤合門。嘉瑞樓。西曰三廟。正殿曰德昌。東曰文昭殿。西曰光興殿。並南嚮。德昌之後。宣宗廟也。宮西門曰西華。與東華直。其北門曰安貞。二大石外。凡花石臺榭池亭之細。並不錄。觀其制度簡素。比土塔茅茨則過矣。視漢之所謂千門萬戶。珠璧華麗之飾。則無有也。然後之人。因其制度而損益之。以求其稱。斯可矣。

鄆國夫人殿記

楊 奐

祀天而不祀地。祭日而不祭月。是豈禮也哉。況聖人之教。始於夫婦。達於天下。不爾。父子君臣上下泯矣。前廟後寢。三代之定制。而吾夫子之祀。本用王者事。闕里之舊。有鄆國夫人殿久矣。由唐宋降及於金。號

稱尤盛。貞祐之亂，掃地無餘。故老徬徨，莫不痛心。東平行臺嚴公忠濟，仰體朝廷尊師重道之意，以興廢補弊爲所務。經始於己酉八月，落成於壬子之七月。先是夫人之神座，生木芍藥一本，見者異之。明年修廟之令下，適造舟者犯我林廟，伐我民冢，珍材堆積如阜，聞公之至，盡委而去。乃命參佐王玉汝監修，官兼攝祀事，孔構召匠計之，僉曰：構正位則不足，營寢宮則有餘。衆志既協，遂訖茲役。花之祥驗矣，而工食塗飾之費，不論也。夫神怪之不語固然，而有開必先之說，如之何其廢之也。夫人姓元，官氏宋女也。泗水侯鯉息也。沂水侯伋息之子也。先聖之爲中都宰，爲大司寇，攝行相事，夫人不以爲泰，畏於匡，拔樹於宋，削跡於衛，絕糧於陳，蔡夫人不以爲否，窮通出處無一而不預，所以血食者，其斯乎。彼湘水之娥皇，郢城之姜姬，祠宇之顯者也。擬諸鄉邑子孫，每四仲之月，肅三獻之禮，歷千萬世而下弗絕者，不有則矣乎。噫，當崇奉者，聖人之功也。當踐履者，聖人之道也。苟知其功而不知其道，則與事淫祠野廟等矣。吾恐神意一日不能安乎此，孰謂聖人安之邪。尙來者無忽。

游龍山記

麻革

余生中條王官五老之下，長侍先人西觀太華，迺邈東游洛，因避地家焉。如女兒烏權白馬諸峯，固已厭登飽經，窮極幽深矣。革代以來，自鴈門踰代嶺之北，風壤陡異，多山而阻，色往往如死灰。凡草木亦無粹容，嘗切慨歎南北之分，何限此一嶺。地脈遽斷絕，不相屬。如是耶。越旣留滯居延，吾友渾源劉京叔嘗以詩來，盛稱其鄉泉石林麓之勝。渾源實居代北，余始而疑之。雖然，吾友著書立言，斬信於天下後世者，必非誇言之也。獨恨未嘗一游焉。今年夏，因赴試武川，歸道渾水，修謁于玉峯先生魏公。公野服蕭然，見余

於前軒語未周。泱驟及是邦。諸山若南山。若柏山。業已游矣。惟龍山爲絕勝。姑缺茲以須。諸文士同之子。幸來。殊可喜。乃選日爲具位。諸賓友騎自治城西南行十餘里。抵山下。山無麓。乍入谷。木有奇。沿溪曲折。行數里。草木漸秀潤。山竦出。嶄然露芒角。水聲鏘然鳴。兩峯間。心始異之。又盤山行十許里。四山忽合。若拱而提環。而衛者。嘉木奇卉。被之。葱蘢醲郁。風自木杪起。紛披震蕩。山與木若相顧而墜者。使人神駭目眩。又行數里。得泉之泓澄。滄溜者焉。洑出石罅。激而爲迅流者焉。陰木蔭其顛。幽草繚其趾。賓欲休。咸曰。莫此地爲宜。卽下馬。披草踞石列坐。諸生淪觴以進。酒數行。客有指其西大石曰。此可識。因命余。余乃援筆書。凡游者名氏及游之歲月而去。又行十許里。大抵一峯一盤一溪一曲。山勢益奇峭。樹林益多。杉檜栝柏而無他凡木也。溪花種種。金間玉錯。芬香入鼻。幽遠可愛。木蘿松鬣。冒人衣袖。又縈紆行數里。得岡之高。遽陟而上。馬力殆不能勝。行茂林下。又五里。兩嶺若岐。中得浮屠氏之居。曰大雲寺。有僧數輩來迎。延入館於寺之東軒。林巒樹石。櫛比楯立。皆在几席之下。憩過午。謁主僧英公。相與步西嶺。過文殊巖。巖前長杉數本。挺立有磴。懸焉。下瞰無底之壑。危峯怪石。巘岒巧鬪。試一臨之。毛骨森豎。南望五臺諸峯。若相聯絡。無間斷。西北而望。峯豁而川明。村墟井邑。隱約微茫。如弈局然。徜徉者久之。寅緣入西方丈。觀故侯同知運使雷君詩石。及京叔諸人留題。迺徑北嶺。登萱草坡。蓋龍山絕頂也。嶺勢峻絕。無路可躋。步草而往。深弱且滑。甚攀捫。羅疲極。乃得登。四望羣木皆翠。杉蒼檜凌雲千尺。與山無窮。此龍山勝概之大全也。降乃復坐文殊巖下。置酒小酌。日旣入。輕煙浮雲。與暝色會。少焉。月出。寒陰微明。散布石上。松聲蕭然。自萬壑來。客皆悚視。寂聽。覺境逾清。思逾遠。已而相與言曰。世其有樂乎此者。與酒醺。談辯。盞起。各

主其家山爲勝。更嘲迭難。不少屈。玉峯坐上坐。亦怡然一笑。詩所謂善戲謔兮。不爲虐兮者是也。至二鼓。乃歸臥東軒。明旦復來。各有詩識于石。午飯主僧丈室。已乃循嶺而東。徑甚微。木甚茂密。僅可通馬。行又五里。至玉泉寺。山勢漸頗隘。樹林漸稀闊。顧非龍山。比寺西峯曰望景臺。險甚。主僧導客以登。歷嶽巖。坐盤石。其傍諸峯羅列。或偃或立。或將仆墜。或屬而合。或離而分。賈奇獻異。不一狀。北望川口最寬肆。金城原野分畫條列。歷歷可數。桑乾一水。紆繞如玦。觀覽曠達。此玉泉勝處也。從此歸。路險不可騎。皆步而下。重溪峻嶺。愈出愈奇。抵暮。酒得平地。宿李氏山家。臥念茲游之富。與夫昔所經見而不能寐。若太華之雄尊。五老之巧秀。女儿之婉嚴。烏權白馬之端重。茲山固無之。至於奧密淵邃。樹林蒼蔚繁阜。不一覽而得。則茲山亦豈可少哉。人之情大抵得於此而遺於彼。用於所見而不用於所未見。此通患也。不知天壤之閒。六合之內。復有幾龍山也。因觀山於是乎。有得。徒以文思淺狹。且游之亟。無以盡發山水之祕。異時當同二三友。幅巾藜杖。于于而行。遇佳處輒留。更以筆札自隨。隨得隨紀。庶幾茲山之髣髴云。己亥歲七夕後三日。王官麻革記。

餘干州學記

李謹思

餘干旣升州。延平祝宜孫。首典學事。顧瞻禮殿。凜焉欲壓。曰。是非所以答曲成而靳陰誘也。春秋歲祀。尚顧歆茲。則將何辭以告歲。不登卒卒。未遑。又明年爲有年。亟謁諸邦伯。邦伯亟捐貲以相。有位競勸爲士。翕然佐之。旣鳩旣僦。其材貞且良。其棟視曩隆四尺。飛簷特起。其勢欲暈。繚之以闌楯。飾之以朱碧。重門傑戟。森布禮行。用幣罔或不虔。聖靈洋洋。如臨如對。祝君曰。邦伯之惠侈矣。孰紀其成。爲斯文千載計乎。

書來曰。邦父兄弟意也。勿復辭。余於是學也。童子習之。今去之二紀而遠。舊殖荒落。無以應來者。敬謝不敏。祝君曰。邦父兄弟必於斯。且聖靈洋洋。如臨如對。惟斯文也。而後有以繼。有以貽。必記諸。余惟有記以來。吾家泰伯橫絕今古。蓋取范史及儒林舊論。鍛礪而馳騁之。曰。教道之結人心如此。美則美矣。而未大也。教行於上古。而契爲之初。自契至于湯。迄有天下。自湯至于武丁。伊訓每言師。說命每言學。遠契之功。以化天下。千餘年。殷化爲周。殷士之膚敏者。皆爲周有教之力耶。余觀周誥多士。累云。猶未定。然則有多於膚敏之士者矣。叩馬于牧野。辟于朝鮮。意猶未釋然。然則有先於膚敏之士者矣。當時以爲義在焉。弗之可兵也。洪範在焉。弗之可臣也。歌有采薇。詩有麥秀。一風二賦。與雅頌並行。於是世不爲勑。見不爲駭。聞而風俗成矣。豈惟殷之教。賴以不墜。周因於殷。以植遺教。雖周猶嘉賴之。周轍又東。四代禮樂。與魯春秋。逸而之。洙泗之上。書王書。天昭天之命。討於天下。周其猶天乎。東周之志。無所於酬。而繼周者。又捷出。則殷周奚擇焉。顧油油然曰。某也。般人也。援已墜之般。以自異。烏在其爲魯司寇耶。視乃厥祖。於書曰。公於詩曰。客猶稱微子。仲終身焉。將無類是乎。若是惑滋甚。請借漢以明之。漢何以命孔吉爲殷紹嘉侯。嘻乎。其兆見矣。古之人。古之人。知言如齊太史。嘗語人以其故。而孟僖子先得之。吾在萬世如見之。蔽以二言。夫殷祖契。而孔氏其雲仍。夫教契肇端。至孔門而大備。微契則人近於禽獸。而禹稷無完功。微孔子則臣子之無所懼者。胥而龍蛇虎豹。以厲斯人。而契之功熄。大哉殷道。其以教始終乎。天欲報契也。故以殷郊。欲紆契之傳也。故以魯祠孔子。殷祭器歸周。而郊契猶八百年。孔禮器歸陳。何有哉。而祠於魯。達於天下。千五百年而未止。則夫中踰而旁奮。暫寄而永垂。昔也支而今也嫡。以小宗之餘。復自爲宗。世

世萬子孫。齊明以祭無窮期。其爲紹嘉孰大焉。殷多先哲王在天。可以覲然而笑矣。吾將復于吾泰伯曰。教道之格天心。又如此。嗟嗟殷士。其逋播而爲頑者。不知其後之至此也。其裸將而爲膚敏者。亦不知其後之至此也。吾言或匡衡梅福所未廢。天地開闢。教之始終。聖賢之統緒。天道人事之應。咸具焉。非邦舊游興起斯文。無以發余之言者矣。前戊午。祀先賢于學。曰忠定家焉。忠獻此乎館焉。若文忠江公。庚子之守吉也。游焉息焉。忠定之孫。有丙子守安吉者焉。爵德齒不同。而其歸同。久之。復傳說祝君。謂當并祠。余特筆并書之。

平蠻記

陽格

大元受天明命。撫有萬方。自北而南。無思不服。至元十三年。歲在丙子。先皇帝以神武不殺。混一江南。繼而湖廣寇盜。嘯聚蠡起。今平章政事。行樞密院劉公。奉旨徂征。削平僭叛。所至帖息。功績顯著。簡記御屏。黔中郡辰澧二州之界。有洞曰泊崖。蠻酋田萬填居之。萬填畏威內附。聖度海涵。命爲施溶知州。旣而恃險負固。扇誘諸蠻。與楠木洞孟再師。桑木溪魯萬丑等。同惡相濟。竊出爲寇。歲在甲午。今天子龍飛。大頒赦宥。咸與維新。乃循習故態。不知改悔。於是復命劉公。奉辭伐罪。公以是年秋九月。統率僉院峻木蘭暨諸翼萬戶。至辰州。湖廣行省平章政事答刺罕。奉旨調沿邊隘丁。協力濟師。俾辰澧二郡總管府。供給餽餉。公號召懷德府。永順諸州酋長。各率所部。詣軍前聽調。又起集山。猺獠。以爲嚮導。約束嚴明。部分整肅。先是。上均州副萬戶田興祖。諳熟蠻洞地。里山川形勢。公令畫圖以進。卽按圖指示。諸軍所從道徑。命僉院峻木蘭。萬戶闊脫。忽都。海牙。拜藍。馬繼祖。從澧州武口道進。身率萬戶別里哥。不花朵。落觥。倪全。田

興祖從會溪施溶口入捐金解衣督勵將士期會于施溶州於是諸軍奮不顧身人百其勇十二月癸卯破施溶楠木洞及諸蠻酋等以獻公以便宜行事斬於軍門之外飛章奏聞元貞元年正月奉旨省院併而爲一卽軍中拜公湖廣等處平章政事二月丙戌振旅而還公仍留田興祖總兵搜捕餘黨越明年春魯萬丑首服于辰州一方悉平是役也命帥得人師出以律皆朝廷委任之專攻堅擣虛執俘獻馘皆元戎指授之功也將校不敢有其功而歸之於軍帥軍帥不敢專其功而歸之於天子義當然也昔韓退之作平淮西碑其文曰不赦不疑由天子明既定淮蔡四夷畢來今蠻方底定而西北窮邊部落革心內附豈非四夷畢來之效驗乎辰州路主者命僕記其事將勒諸堅珉以垂久遠謹承命拜手而獻文曰大哉乾元至哉坤元聖朝則之建國紀年天無私覆地無私載繼統體元萬世永賴黔中之北有州施溶旣降又叛昏迷不恭帝命劉公聲罪致討殲厥渠魁執訊獲醜辰山蒼蒼江流湯湯勒勳彝鼎千載有光我思古人誰可爲比伏波之後一人而已

平江路學祭器記

李滄

平江路學大成殿祭器者教授李滄方文豹所造也金屬大尊二山尊二壺尊十有二犧尊八象尊如壺尊之數蠱四洗四勺二十爵百七十有二玷二百有二豆三百四十有四簠百三十有六簋如簠之數爐一缶二槃二十有四竹屬篚十有一籩三百二十有九木屬俎五十有五餘仍舊貫初至元二十有九年十有二月望滄祗事顧茲器非度明年考朱文公釋奠菜禮改爲之十有一月方君來明年皆方君爲之元貞元年十月竣事首尾凡三年鳩工更學正凡五人費伯華林桂龍伯淵唐天澤朱鳴謙錄凡四人楊

如山、洪焱祖、文一覺、俞真卿會計更直學凡五人許志道、潘梅孫、魏埜、沈伯祥、齊國俊、費中統鈔四千貫有奇而後成蓋難且久如此後之人尙敬守之哉

淮陰侯廟記

楊先韓

蜀憲僉王八走書至渝謂先韓曰吾家獲鹿舊有淮陰侯廟在土門西道北岸上卽井陘口古戰處也有宋慶歷間邢國陳薦廟碑元祐閒東垣鄭靜晴重修廟記迨延祐庚申春孟廟史郗玉等卜遷于岸下棟宇翬飛貌像赫烜實聳觀瞻今敍其更修歲月于先生記之俾鑲諸石先韓不敢以衰毫辭竊謂記侯之事迹易明侯之本心難侯事迹載在史冊所以興劉踣項出奇制勝者人耳目所熟覩不待記而後明若侯之本心則有甚難明者焉司馬公修治鑑用左氏傳事體但據班馬所書載侯拒武涉蒯徹遊說之言初無畔意及書楚人告變陳豨邪謀則侯之本心不能以自明惟朱文公修通鑑綱目用春秋筆削推見至隱使忠臣義士無罪而見戮者得以自雪故於僞遊雲夢之事大書六年冬十二月帝會諸侯於陳執楚王信以歸至洛陽赦爲淮陰侯蓋楚人告變特飛語耳實未有反謀也故綱目不以反書但書執楚王信以歸不書其所執之由不去其楚王之爵明其無故見執也書至洛陽赦爲淮陰侯以無故而被執則亦何罪之可赦又以何罪降而爲侯乃使與噲等伍安得不快快耶十年九月書代相國陳豨反帝自將擊之十一年冬破豨軍正月后殺淮陰侯韓信夷三族漢史載侯約豨反綱目削而不書不以反罪累侯也但書后殺淮陰帝方在代罪后之擅殺功臣不去侯爵以見侯之亡辜被戮書夷三族以甚后之殘忍也后曷不念昔彭城破爲楚軍所虜困辱三年及侯擊破齊殺龍且羽勢窮求和后乃得歸正位中宮微

侯之力不及此。果有畔迹，亦宜俟帝還宮，權其輕重。帝寬大長者，藉使不免其身，亦必宥其子孫。何至淫刑以逞哉？帝聞侯死，且喜且哀。嗟乎！人心天理，不容泯滅。喜者，喜其假手呂后，除一隱憂；哀者，哀其開國元勳，子無噍類。且問將死何言？曰：「悔不用蒯徹計，帝捕徹至，直辭以對，帝釋不誅，以是知帝有仁心，必不忍於赤其族也。」后忍於赤人之族，不自知其身死，肉未及寒，呂氏男女無少長，駢頸就戮，亦可以見天道之好還矣。余爲此記。按文公綱目用春秋書法，以明我侯忠義之本心，參以韓魏公留題詩曰：「家僮上變安知實，史筆加誣貴有名。」邵康節亦有詩曰：「韓信事劉元不叛，蕭何惑漢竟生疑。則綱目書法明侯本心者，非一人私言，乃萬世之公論。而侯之心亦可以暴白於天下後世而無憾矣。今去侯千有餘載，井陘之道猶故也。白鹿之泉未涸也。當時王侯爭雄，如兩蝸角，莽爲陳迹，而侯之廟食茲土，英靈如生。由其平生剛大之氣，挫而愈壯，精白之操，涅而不緇，自有不依形而立，不恃勢而存者，使趙人畏敬奉承，凜如一日，固宜乃作迎送神之樂歌二章，俾趙人歲時歌以祀侯云。

侯之來兮雲爲旗，從陰兵兮萬騎隨。侯入新廟兮水之湄，柱石桓桓兮神貌巍巍。鼗鼓淵淵兮雜奏笙篳，牲牲肥腍兮清酒載醴。神欣欣兮享我多儀，神之返兮風爲馭。朱雀前驅兮玄武奔屬，神顧趙人兮容與。錫爾多福兮驅疫癘，祈暘得暘兮雨以時雨。豐年穰穰兮多黍多稌，民飽神德兮太平旣醉。祇報庥兮，何千萬祀。

舍奠禮器記

鄭陶孫

淮以南學廟配享四，陳器視正位。從享殿上十，東西廊一百四，陳器視殿上。配從固自有等夷也。殿南榮

設尊階上下十六所。以備四代之制。殿東南阪。列正配酌尊位。爲尊二。獻北象南。各以一崇明水統之。獻載泛齊初獻酌之。象載醴齊再獻酌之。從享殿上下象尊東西各三。神人之交爵爲親。三獻代神祭已奠之。故正配爲爵十五。從惟一獻。故止一爵。正配篚各一。承幣坫各一。承祝豆十。籩如之。從殺其六。篚二。篚如之。從殺其半。羊豕腥熟俎各四。從惟腥俎一。東階之東。盥手盥爵。疊洗勺。梲各一。爵篚三。梲篚二。皆所以嚴神事也。飲福爵坫。賜胙俎豆各一。識以別之。之神人不可以共器也。大略如是。於禮則未敢言備。姑以故宋祀式言之爾。若淮以北。則故金亦惟因汴宋之舊。然而淮以北。用武歲久。遺制弗全。不若淮以南。被兵日淺。遺制可攷也。今國家於前代遺事。未聞有所損益。則可因者固不容以略。而弗備。夫上古尊疊俎豆。剝木陶瓦而已。中古惟永是圖。至於範金。近世或金或木。唯其力之能不能。惟籩篚俎以竹以木。無儉侈之殊。侯汴視邦之大小。與殿邦者之好禮以否。而爲完缺。初不係乎廩之多寡。今郡縣學。凡費皆於廩乎取。有司無與矣。學豈容不自力以存其制。江右學廩多寡。雖不齊。洪素以會府稱。今行中書肅政廉訪司寓焉。學廟禮器宜其完且堅矣。陶孫始至覈之。則其尊無百。酌尊不備。他雖竹木者亦缺。錫以繼銅。猶復缺五之一。議從旁郡致工將補之。有袖舍奠禮器圖一編來者。乃故宋景定間。趙公汝楳守宣城日所作。而錢誥梓者也。其圖則本朱文公所已考。及以博古所收。參訂亦勤矣。然於獻象二尊。因文公之所未安。遂取博古獻象。轉以爲尊。周禮春官司彝。凡尊皆有疊。尊以踐獻。而疊則酌以白酢者也。以疊代尊。於義未允。又司尊彝。獻象尊。先儒訓詁。有謂獻尊爲有沙飾者。有謂獻飾以翡翠。象以象。鳳凰者。取羽形婆娑然而反其音以素何。率皆以臆。魏太和間。青州於土中得齊大夫送女器。爲牛而背負尊。晉儒之

說以爲全刻牛象之形。鑿其背以爲尊。是亦揣摩。非得於目擊。以負爲鑿。體認不真故也。古人製器。雖致飾之美。而仁與智具焉。謂牛象之力。足以負尊。而取其形。智也。儻刳腹受酒。則不得爲仁矣。絕其脊以施勺。既幾乎慘。舉而注之口。豈不嫌於穢。人之用器。且不宜然。況將潔以享神乎。由是而言。近古所傳。刳其腹者。鑿字之訛。實啓之也。自文公請改從政和禮器新圖。及班降。則王黼博古所收。厥後嘗以尊口不可施勺。而疑其未然。特未及詳齊器之負。而譌晉儒之鑿耳。陶孫前是固已窺其理。亦恐淪於臆。不敢形諸言。及仕京師。嘗於遂初張氏之容齋。睹一鳧尊。乃鳧形而背負尊。極其精古。善鑿者以爲周器無疑。於是始信齊大夫送女器之爲可憑。古人制器。不鑿於智。而傷於仁。益可知也。當齊器之出。已足以破先儒之臆說。及王黼所收。又從而惑人耳目者。二百年何耶。特未詳古人制器之初意耳。所致廬陵冶工楊榮甫來範金爲太尊。山尊。著尊。獻尊。象尊。壺尊。凡九十六。以備明水。玄酒。五齊。三酒之設。獻象則祖齊器爲全形。負尊於背。餘皆從趙錄所考。仍作獻象。各六。爲正配酌尊。而以一崇明水居右。舊象尊則存之。以充從享。成不欲毀也。羊豕既有熟俎。則熟必以鼎。遂作羊豕鼎各五。餘器合從範金者。皆如禮定其數。而補足之。爲爵五十有二。又飲福爵一。坩四十有二。祝坩五。又飲福爵坩一。尊禁二十有八。豆百八十有六。又賜胾豆一。簠各五十有二。龍首勺十。爲銅二千四百四十斤有奇。一斤之劑。并工與食。爲至元鈔二百六十文。總爲鈔六百三十四貫有奇。木俎四十。籩二百六十有八。塗髹之。其費百二十貫有奇。合新舊。凡尊三十有四。禁二十有八。爵百三十。坩視爵加五。豆二百七十有九。籩視豆損一。簠百二十有四。簋如之。鼎十。勺十。壘二。洗二。篚十。俎百五十有五。是其完數也。舊以錫繼銅之不足者。任縣學書院缺者取之。夫古

人創物。取象寓意。各有攸當。述之者。往往具其形。備其數。自謂可矣。適於用否。尙弗之顧。其稍考制度。以幾於古者。皆所不暇也。工雖能持已編書。以自見其所蓄模範。於圖率不合。至謂前是他學所範。亦與此圖異。惟不用古制。則已。苟用古制。古其形狀。而今其文理。曷若并形狀。而今之。猶爲同於俗也。噫。自孟氏有今樂。猶古樂之論。不善讀者。類失其旨。韶濩豈與鄭衛無以異哉。因又摹臨各器舊款。取周尺授刊工。使祖尺寸而伸縮之。以授冶工。仍各識歲月其脣。其腹。其尻。以迄于成。涓辰釁之。懼其紊亂失墜。正配位所陳。使寘殿北壁下。以便於事。兩廊從享所陳。聽藏之庫。廡。凡此皆全其可因。以聽繼周之損益。非敢惟古是是。覽者監焉。大德十年歲在丙午八月朔。浙水東鄭陶孫記。

元文類卷之二十八

記

續著記

劉因

著之在櫝也。寂然不動。道之體立。所謂易有太極者也。及受命而出也。感而遂通。神之用行。所謂是生兩儀。兩儀生四象。四象生八卦。八卦定吉凶。生大業者也。猶之圖也。不用五與十。不用云者。無極也。而五十則太極也。猶之易也。潔靜精微。潔靜云者。無極也。而精微則太極也。知此則知夫櫝中之著。以一而具五十。無用而無所不用。謂之無則有。謂之實則虛也。而其數之流行於天地萬物之間者。則亦陰陽奇偶而已矣。故自掛扚之奇而十二之。則陽奇而進之。不及夫偶者爲少陰。陰偶而退之。不及夫奇者爲少陽。而四之。則三四五六合。夫畫奇全偶。半合夫數。而畫亦於是焉。合其多少。則合其位之陽少而陰多。故有自一進一而爲偶。自偶退一而爲奇之象也。自過揲之策而十二之。陽奇而退之。不及夫偶者爲少陰。陰偶而進之。不及夫奇者爲少陽。而四之。則六七八九合。夫畫奇三偶二合。夫畫而數亦於是焉。合其多少。則合其數之陽實而陰虛。故有自一虛中而爲偶。自二實中而爲奇之象也。蓋掛扚之奇徑一。而過揲之奇圍三。而掛扚過揲之偶鈞用半也。故分掛扚過揲而橫觀之。則以陰爲基。而消長有漸。分四象而縱觀之。則亦以陰爲平。而低昂有漸。其十二之。則自右一而二。自左二而三。其四之。則自右三而六。自左六而

九如水之流行。觸東而復西。其消長。則其自然之淪漪。其判合。則其盈科而後進者也。此皆自夫一行邵子之說而得之。知此。則知夫誤推一行三變八卦之象。謂陰陽老少。不在乎過揲者。爲昧乎體用之相。因而誤推邵子去三用九之文。謂七八九六。不在乎掛扚者。又昧乎源委之分也。由此而極其奇偶之變。以位。則陽一而陰二也。以數。則天三而地兩也。初變之徑一而圍三。以爲奇者。三而得之。是以老陽少陰之數多也。後二變之圍四用半。以爲偶者。二而得之。是以少陽老陰之數少也。分陰分陽。則初一變皆奇。而後二變皆偶也。迭陰迭陽。則去掛一初一變皆偶。而後二變皆奇。又如畢中和天地人之說也。其變也。自一生二。二生四。而又四之。四生八。八生十六。而言則畫卦之象也。自四乘而十六。十六乘而六十四。則重卦之數也。故初變而得兩儀之象者。二畫卦之數也。再變而得四象之象者。四畫卦之數也。三變而得八卦之象者。六畫卦之數也。自兩儀之陰陽而言。其用數。則乾兌離震皆十二。而巽坎艮坤皆四也。自八卦之陰陽而合其體數。則乾坎艮震三十二。而巽離坤兌三十二也。自二老二少之陰陽而言。其饒乏之數。則又如四象之七八九六也。六變而得四象之畫。則每位之靜變往來。得十畫卦之數也。又二畫則總其數矣。其數也。皆靜者爲多。變者爲少。而一爻變者。居中二靜與變。皆老陰爲多。老陽爲少。而二少居中。積畫成卦。則每卦之靜變往來。得十五畫卦之數也。又三畫則總其數矣。其數也。亦皆靜極者爲至多。而變極者爲至少。而又一爻二爻進退于其間。其靜與變。則皆坤爲至多。乾爲至少。而三男三女進退于其間。因而重之。則每卦之靜變往來。得三十畫卦之數也。又六畫則總其數矣。其進退多少。皆與八卦之例同也。此皆自歐陽子七八常多。九六常少之一言而推之。與夫後二變不掛。不知其爲陰。而使二老之數。與

成卦同。二少之數與二老同。而參差益甚。其初一變必鈞。不知其爲陽。而於乾坤六子之率。勉強求合。乃若四十九。蓍而虛一。與五十。蓍虛一。而掛二者。固有間矣。此以蓍求卦者也。若夫以卦而求變也。則自夫交易已成之體。爲變易應時之用。由兩儀而上。自紆而促。八卦循環。而其序不亂。以遠御近。以下統上。而皆有文之可尋也。以變而求占也。則自靜極而左之一二三四五。自動極而右之一二三四五。極自用其極。而一則專其一。居兩端而分屬焉。二則分其爻居次。兩端而分屬焉。動則上爻重。而靜則下爻重也。三則分其卦居中。自爲兩端而分屬焉。前則本卦重。而後則之卦重也。動中用靜。靜中用動。靜多主貞。動多主悔。而皆有例之可推也。然自此而極言之。則以六甲納之。其卦之序不亂也。以互取之。其序有漸。而亦不亂也。以伏求之。其序亦有漸。而不亂也。以世位反圖而推之。則一而二。二而四。四而八。八而十六。進退有序。逆順以類。而不亂也。以策數卽圖而攷之。則在兩儀而一消長。在四象而二消長。在八卦而四消長。在十六而八消長。在三十二而十六消長。故長中八消。消中八長。皆震爲巽之消。而坤爲乾之消。巽爲坤之長。而乾爲震之長。而不亂也。以揲變之數。應圖而推之。則其多少。又合乎一。一爲乾。八八爲坤。以少爲息。以多爲消。而亦不亂也。是則按圖書卦。揲蓍求卦。莫不脗合矣。然而朱子猶以大衍爲不自然。于河圖而變揲之左。可以形右。卦畫之下。可以形上者。又以爲短於龜也。其三索之說。則一行有成說。旣取之于本義。後復以爲不必然。而卦之陰陽之奇偶。畫與位合。則大傳有明文。旣著之筮說。而不明言于啓蒙。是又恐後人求之過巧。而每遺恨不能致古人之詳者也。若以奇策之數。合之圓圖之畫。則四十八一卦之畫也。其奇之十二。卽乾之陰。而策之三十六。卽其陽也。三十六自九進而得之也。九陽也。三十六亦陽也。

全陽也。其奇之二十。卽兌離之陰也。而策之二十八。卽其陽也。二十八自七進而得之也。七陽也。二十八陰也。陽合於陰也。其奇之二十四。則坤所去之半也。而策則所用之二十四陰也。二十四自六進而得之也。六陰也。二十四亦陰也。全陰也。其奇之十六。卽艮坎自上所去之十六也。而策之三十二。卽其所用之半。并上所餘之八陰也。三十二自八進而得之也。八陰也。三十二陽也。陰合于陽也。其震巽之不用。則猶乾之不用陰。坤之不用陽也。其奇策之八方數之變也。掛扐之六圓數之變也。此邵子之說也。然前之奇策之所常。陰不若陽之齊。後之六八之所應。圓不若方之備。是必有深意也。第未能考而知之。又不知朱子之意。以爲如何。此因檀耆而記之。至元十年春二月吉日。檀成記。

高林孔子廟記

劉因

安肅高林里。距吾居五十里。聞有孔子廟。枉道而拜焉。詢其創始復興之由。里之耆老劉禎等言。廟起于五代之際。久乃廢毀。金大定間。鄉先生孫直卿。率里中豪族。盧田劉三氏。始脩葺之。迄今至元庚辰。圯壞幾盡。禎劉氏孫也。復率盧氏子孫。共繼先志。經營於其年之春。逮明年秋。廟貌既尊。乃興祭器。以祀事告成。且爲鄉約。春秋釋奠之禮。俾可以繼。里人自以非學者。而祀先聖。恐踰禮制。請就質焉。予按禮釋奠於先聖。先師。謂學詩書禮樂者。各以所習業。而祭其先師者也。孔子豈詩書禮樂專門其師耶。既非詩書禮樂專門之師。豈學官所得而私者耶。詩書禮樂之官。且不得而私。又豈後世俗儒記誦詞章者之所得而私也。禮飲食必祭。祭先造飲食者也。蓋以吾之所以享此者。斯人之力也。孔子立人道者也。今吾之所以爲人君。人臣。人父。人子。而不淪胥於禽獸之域者。其誰之力歟。於一飲食。而知報其力於此。而不知所

以報焉。惑矣。諸君其勉行事無懈。禎等曰諾。且請書其辭於石。併記歲月之始末云。

退齋記

劉因

老氏其知道之體乎。道之體本靜。出物而不出於物。制物而不爲物所制。以一制萬變而不變者也。以理之相對。勢之相尋。數之相爲。流易者而觀之。則凡事物之肖夫道之體者。皆灑然而無所累。變通而不可窮也。彼老氏則實見夫此者。吾亦有取于老氏之見夫此也。雖然。惟其竊是以濟其術而自利。則有以害夫吾之義也。下將以上也。後將以先也。止將以富也。儉將以廣也。哀將以勝也。慈將以勇也。不足將以無損也。不敢將以求活也。無私將以成其私也。不大將以全其大也。柔弱將以不爲物所勝也。不自貴將以貴也。無以生將以生也。知窪必盈。於是乎窪。知弊必新。於是乎弊。知少必得。於是乎少。知樸素之可以文。於是乎爲樸素。知谿谷之可以受。於是乎爲谿谷。知敵之勢必汙。盈之勢必溢。銳之勢必折。於是乎爲嬰兒。爲處子。爲昏悶晦寂。曰忿。曰武。曰爭。曰伐。曰矜。凡物得以病之者。皆闔焉而不出。知而示之。愚辨而示之。訥巧而示之。拙雄而示之。雌榮而示之。辱。雖出一言。而不令盡其言。事則未極。而先止也。故開物之所始。成物之所終。皆揅焉而不與。而置己於可以先。可以後。可以上。可以下。可以進。退。可以左右之地。方始而逆其終。未入而圖其出。據會而要其歸。閱釁而收其利。而又使人不見其跡焉。雖天地之相盪相生。相使相形。相倚相伏之不可測者。亦莫不在其術中。而況於人乎。故欲親而不得親。欲疎而不得疎。欲貴而不得貴。欲賤而不得賤。欲利而不得利。欲害而不得害。其關鍵橐籥。不可窺而知。其機紐本根。不可索而得其恍惚杳冥。不可形象而搏執也。嗚呼。挾是術以往。則莫不以一身之利害。而節量天下之休戚。其終

必至於誤國而害民。然而特立於萬物之表。而不受其責焉。而彼方以孔孟之時義。程朱之名理。自居不疑。而人亦莫知奪之也。中山滕君仲禮。早以學行知名。而爲人則慷慨有才節者也。以退名其所居之室。旣以寧失於有所不爲。戒在于無妄之往自銘矣。而又請予文以記之。余固知仲禮之不爲老氏之退者。然亦豈真失于有所不爲者也。夫有所不爲者。蔽焉而不知舉。變焉而不知通。固滯焉而不知所以化。而其終亦至於誤國而害民。然要之。則知不足而已矣。而人亦得而責之。而彼亦無所逃其責焉。非如爲老氏者。之以術欺世。而以術自免也。予喜仲禮之退。而又欲其慎其所以退也。故極言二者之失。至元丙子八月旣望。容城劉因記。

鶴菴記

劉因

或贊大經鶴二畜。庭中遂名其菴鶴。一日問予曰。子知我鶴名菴也。何哉。予曰。此在我而不在鶴。夫樂水者。吾見其知之周流。同於水也。樂山者。吾見其仁之厚重。同於山也。大經之機警高亮。游心閑遠。發爲文章。清雄婉麗。可以鳴一時。而傳後世。此非同於鶴者乎。故聞其聲。見其形。欣然而悅。非鶴可悅也。我之同於鶴者。使之然也。大經曰。予之於鶴。非但悅之而已也。子其爲我更思之。予乃顧鶴而歎曰。謂大經爲厭世俗之卑隘。不可與處。思欲高舉遠覽。而與此游耶。則其心狹矣。謂大經爲以己之軒昂超卓。勢利不可得而羈縻之。姑引此以自況耶。則其心狹矣。狹與矜。大經不爲也。然則名菴之意。果安出耶。予觀古人之教。凡接於耳目心思之間者。莫不因觀感。以比德。託興喻。以示戒。是以能收萬物。而涵其理。以獨靈。如黃鳥之章。孰不賦之。而聖人則曰。於止。知其所止。夫斯鶴之呼之不來。長鳴下趨。亦常事耳。而子瞻乃歎其

難進易退。蓋亦黃鳥之遺意也。由此而推之。其遊於陰。知養也。感夜半。識時也。鳴則聞於天。飛則一舉千里。有本也。其動也節。其鳴也律。用和也。月白風清。徘徊佇立。翫此數者於縞衣玄裳之外。寧無起予者乎。名菴之意。或出於此。大經曰。得之矣。至元壬辰冬十月望日記。

麟齋記

劉因

編脩王之才。治春秋而專門左氏者也。嘗有取於獲麟之義。名其所居之室曰麟齋。而請予記之。夫獲麟。仲尼作春秋所書之一事爾。而春秋之義。非居所係於此者。歐陽氏固已言之於前矣。然春秋之時。仲尼實天理元氣之所在。而與濁亂之氣數。相爲消長於當時。如麟者。則我之氣類也。其來也固非偶然而來也。然而斯氣之在當世者。蓋無幾焉。在彼之氣。足以害之。在此之氣。不足以養之。由麟可以卜我之盛衰。由我可以卜世運之盛衰。而聖人固不能忽然於其獲也。謂之致麟可也。謂之感麟亦可也。皆理之所不無者。雖在聖人之作春秋。因天道人事自成之文。從而文之。其義皆因事而寓焉。安可曲爲一定之說也。雖然。子既有取於麟。則吾不得嘿嘿於麟矣。夫麟之所以爲麟者。乃天地之所以生。而人之所以能爲天地之心者也。在春秋則聖人所賞之善也。在易則聖人所指之陽也。而人之所未嘗一日無者也。苟自吾身之麟而致之。則凡害人者。如長蛇。如封豕。如饕餮。如檣杌。莫不消鑠蕩滌於魑魅之域。而天下振振。皆吾氣湛行之地矣。今聖人雖不得盡其所致於當時。然其所以扶此抑彼者。而斯麟固已麟於萬世矣。子之讀春秋者。予知子將思有以麟夫一齋而已也。雖然。予於聖人剝廬閉關之戒。見聖人之拳拳於此。乃歎鳳鳥之不至。傷魯麟之致獲之心也。嗚呼麟乎。又當以聖人之心爲心。而自麟其麟也夫。

汴梁廟學記

姚燧

自魯哀公十六年。當周敬王四十一年壬戌。孔子卒。歷六國秦漢。至孝武卽位之年辛丑。爲三百四十年。其聞而知者。纔司馬遷一人而止耳。旣編其年。與夫言行出處之概。爲世家。又爲弟子傳。載其居里間對。與夫經事何君。又考知其少孔子幾何歲。是書皆孔門弟子。與孟氏所未著。其有功聖門。眞非淺淺哉。然猶病夫時有不一其說。不可參伍者也。世家弟子蓋三千焉。身通六藝者七十二人。而弟子傳則曰。孔子曰。受業身通者七十有七人。皆異能之士也。夫旣曰身通六藝矣。雖未盡合聖人爲教之本。然而猶有所指名也。其曰受業身通。竟不發爲所通何業。亦晦焉而已耳。又曰。皆異能之士。聖人爲教。於以脩敝彝倫。而容異能者于其間。孔子自言七十有七人。則七十二人者。誰後是五人邪。其爲傳亦多淆雜而無次。先顏回曾參。而後無繇蒧固。已戾於明人倫。其甚誤。至以闕止子我爲宰子。又曰。孔子之所嚴事者。於周則老子。於衛蘧伯玉。於楚老萊子。於鄭子產。於齊晏平仲。於魯孟公綽。孔子於公綽。止稱其不欲。與優爲趙魏。老子產有君子之道四。其他不足孔子者亦多也。老萊子書今存。其爲道術尙黃帝。老子爲聖人所與者。不經見。子入太廟。每事問。況老子周守藏室之史。問禮則有之。使及見其書曰。失道而後德。失德而後仁。失仁而後義。失義而後禮。已不知道德仁義禮根於人心之固有。而眎爲世降之不同。未必不見黜於孔子。況爲其道乎哉。惟蘧伯玉寡過。未能爲不悖於聖學。故與之特深。至漢文翁圖石室。列之七十二人中。亦可灼其非師而實弟子云。晏平仲者。如遷之言。足以暴其人賊賢之罪。何也。夫人旣嚴事乎己。苟於學術之僻。歸宿之差。何害於明告。告不爲止。則隨以不屑之誨。始盡夫師弟子之義焉。當欲封孔子尼谿。

之田。乃說其君景公曰。儒者滑稽不可軌法。倨傲口順不可爲下。崇喪遂哀。破產厚葬不可爲俗。游說乞貨不可爲國。盛容飾繁登降累世不能殫其學。當年不能究其禮。非所以移齊俗而先細泯也。若預憂一旦代有齊政。惟懼醜詆之不力焉。夫善交久敬。報人嚴事之道者。固如是乎哉。先儒嘗疑晏子尙儉。墨子欲貴其道。取必於晏子之言。不然。何爲亦見墨子之書。而遷辯之不明也。又自敍曰。儒者累世不能通其學。當年不能究其禮。博而寡要。勞而少功。由是知二語者。非必一出晏子。乃遷薄儒。素定於胸中。不易者也。遷嘗適魯。徒觀諸生以時鄉飲。大射其家。迷眩於規。規節文之細。低回不去。以爲是足盡聖人之道。斯政經生博士之汨汨以皓首者也。豈聖學爲己之切致哉。故燧有功於遷。而亦有是數者之恨。況又甚惑。未盡祛於今者耶。孔子卒。哀公誅之子貢以爲非禮。至漢平帝始封謚褒成侯。宣尼公。蓋王莽假善以收譽。將遂其奸謀也。後魏孝文法之。謚文宣尼父。後周宣帝封鄒國公。唐高宗贈太師。僞周武氏封隆道公。玄宗謚爵文宣王。宋真宗加玄聖。後易爲至。至今遵之焉。有若以自生民以來。未有盛於孔子。誠是言也。雖極天下之美謚。猶不足萬分一。盛德之形容。斯燧發其目而不深言者一也。杜預春秋傳。敍曰。子路欲使門人爲臣。孔子以爲欺天。而云仲尼素王。邱明素臣。又非通論也。斯言爲獲聖人之心。而後世王之堯舜二帝也。幸我以夫子遠賢堯舜。何王之不可居。然後世天子之子。有功之臣。皆曰王以孔子之聖。卒下比爵於其子臣。誠不知其可也。斯燧發其目而不深言者二也。其享配諸位。善乎柳宗元序道州廟碑曰。從於陳蔡。亦各有號。言出一時。非盡其徒也。于後失厥所謂。妄異科等。坐祀十人。以爲哲。豈夫子志哉。後之時。進顏孟。並孔子南面。別躋曾子以足。是十人。於非夫子志中之。又非者。而江之左。又進曾子。子思並。

顏孟別躋子張於曾子之舊。由孟子而視子思師也。由子思而視曾子又師也。子思孔子孫也。弟子於師。孫於祖。坐而語道者有之。非可並南面。燧知四子已避讓於冥冥中。不能一日自安其身一堂之上。況又祀無絲葢鯉於庭。其失至於崇子而抑父。又非遷之爲傳矣。夫爲是學宮。將以明人倫於天下。而倒施錯置於數筵之地如此。奚以爲訓。又在在之廟。皆泥像其中。北史敢有造泥人銅人者。門誅。則泥人固非中土爲主以祀聖人法也。後世莫覺其非。亦化其道而爲之。郡異縣殊。不一其狀。短長豐瘠。老少美惡。惟其工之巧拙是隨。就使盡善。亦豈其生盛德之容。甚非神而明之。無聲無臭之道也。曩長安新廟成。繪六十二人。與廿四儒於廡。畫工病其爲面之同。縱人觀之。而擇貴臣圖其上。蓋肖今人之貌。而冠以先賢之名。使過而識者。抵掌相語曰。是某也。是某也。未見其起敬於他日。顧先足來不恭於一時。是邦如是。孰必其他邦之不爲。是一歲再祀。第借位於先賢。以俎豆夫今之人也。其可哉。曰。是溺習之已然。若何而變。曰。人臣有見上。布是區區。則可。若夫議禮也。制度考文也。天子司之。亦幸。一旦遑於稽古之事。學禮之臣。必有能策其一二。得所當議者矣。至元庚寅。汴梁新廟成。學錄劉元佐爲狀。以其府諸公之意。求記其由。故燧首之。以此。其狀曰。宋建隆中。南宮城數里。立太學。後爲國子監。金貞祐都汴。國日益盛。大城少兵。難守。度中宮垣大城再城之。監當城所經。弗便也。壞而徙之。東南大城之下。不及屋而亡。皇元受多方。始爲殿七楹。亦廢宮屋也。其制度宏麗。爲天下甲。壬子。楊中書忠肅公來董括舟役。又壞宮取材。以其餘爲門廡。至元癸酉。故同知宣慰使袁裕時。爲是府判官。始構講堂於廟西。神庖於堂東。鑿池其南。勢如半壁。淪汴注之。擬魯頡水。殆足觀矣。歲月滋久。風雨驚屋。困於撐拄。自總管提刑悉捐金。割俸起新之。總管則權輿於

成其斷手於杜思敬。其同力者同知胡某。治中益祖。判官完顏某。提刑使則閣閣都高某。副使王忱。僉事劉某。始終五十餘年。凡資畫十二官而後完。富民佐財力以就功者又多也。燧曰。嗚呼。不易乎哉。自今師生之講肄於斯。其移學文之力。而篤志於切問近思。責其躬以成德達才。而收夫化民成俗之功於他日。斯不孤縣官待多士志矣。是歲夏四月。前翰林直學士奉政大夫知制誥同修國史姚燧記。

澧州廟學記

姚燧

至元十有四年。肇置諸道提刑按察司。而澧在山南湖北道所糾郡。廿年。燧副使是道。明年按部至焉。拜瞻廟庭。未嘗不病其爲制之隘陋也。殿南閣曰六經。因語校官張公綬曰。易書詩春秋其繫定。刪作實出夫子之手。周官雖云周公之書。冬官篇亡。當以考工記與小戴記禮者。皆漢儒。豈可與是四經班而爲六。且今四海禮殿。皆名大成。爲改書曰金聲玉振之閣。後廷議不欲諸道糾郡者。錯壤江之北南。改爲肅政廉訪。澧遂割入江南湖北。元貞乙未。居民不戒於火。廟爲延燒。總管是道者故與屯希魯將復之。俾計吏最其學租直。纔五千餘緡。曰。是所謂時詘而舉贏者也。乃下令郡士在籍多田者。勸之佐爲。凡又得萬緡。委材集工。責校官李寓。學正張子仁。身敦其役。而糾郡諸公。如副使賈仁。僉事蔣某。姚某。李庭詠。郭貫。凡至者。必促其成功。五年而落之。其樵構則稽梓人之書。爲四柱屋。古者王居之制也。惟太行一山似之。故曰王屋。重門周序。講肄之堂。合食之舍。庖廩之室。燕游之亭。秩秩馮馮。靡一或遺。凡百有三楹。周以繚垣。百三十餘丈。雖未嘗身見。然聞之談者。舉以爲可。甲湖之北。南諸州。豈天者厭昔隘陋。火之使改爲耶。亦偶然也。又範金爲祭器。二百七十有二。竹木髹漆之具。三百有四。嗚呼。備乎哉。然嘗思夫子之道之在兩

間無間治亂古今如飢食而渴飲夫婦之愚莫不由之不可一日而離焉固不以廟之存毀而加污隆國家必聚耆英俊髦教育乎是蓋須其成德達才舉而庸之以立化民成俗之本也則廟學豈不甚有所關哉地以求之衡之爲州南澧千有餘里南嶽在焉舜五載一巡狩所也及誅四凶放驩兜於崇山實今澧之屬縣慈利則放流之人顧居巡狩之境之內戰國時楚都南郢在漢則南郡江陵澧去西南鳥逕二百里屈原之逐常行吟者故九歌曰澧浦澧蘭則放流之所近薄脩門是皆不可曉知者澧於其時爲黔中秦欲以武關之外易之楚方怒張儀謂曰願得張儀而獻黔中夫以甘心一人寧棄地而不恤固以要荒鄙之也而今也料次戶口之繁庶貢賦之征入澧則亞於長沙而近湖廣省治岳鄂諸州不能半之豈天時風土有古今之變而人事亦隨以遷而異耶士四民一也民庶而士必衆洙泗夫子之居也士爲洙泗之言者也澧去洙泗西南將三千里非密邇也賴皇上仁不忘遠守土之臣視要荒與洙泗鈞然洙泗也燧嘗至其地焉戶不能當澧四之一戶損則士不多亦理勢然不知自今澧民沐士之化要荒而洙泗乎士不能拔民之溺洙泗而要荒乎要荒而洙泗正國家所賴以化民成俗者洙泗而要荒其身之不能成德達才何有乎推之人士是之思則居縣官所築之室食縣官所樹之粟必知免勉其躬圖報稱矣庭詠俾子仁求記所由興作於翰林學士朝請大夫知制誥同修國史姚燧大德己亥冬十有一月日短至書于鄂之南陽書院楚梓堂

千戶所廳壁記

姚燧

我元駐戍之兵皆錯居民間以故萬夫千夫百夫之長無廢城邑者其有統齊徵發之政無文移惟遣倅

銜言。至受命大帥。或依高邱曠野爲律。以行此近代之故事也。怯烈勛實君長。千夫洛陽鳴皋山下。繇祖
暨身三世矣。舊集其屬。恆卽佛宇神祠。不然於其私居。聖皇中統以來。制度寔備。官始有品。祿始有秩。統
齊徵發之政。一信於書。故君得以斂。是一軍之祿。買田爲廨。門以表堂。堂以聽事。廡以居史。儲書有庫。閱
射有亭。數十年苟簡之弊。一朝而新。又思居乎此者。必有所箴警。始不敢弛然而怠。故書堂曰居敬。亭曰
觀德。繇未識余。千里走書于鄧。以其友乃滿子堅爲先。求記其然。余聞其知學周公仲尼之道者。爲告之。
曰。今夫人過祠廟。必聳肅起敬。如有精神魂魄在其上。而立其傍者。何哉。繇夫平居無事之時。未嘗敬也。
使平居無事之時。恆有上帝臨女之心。則兩間百神。其尊且大。孰有加於上帝。雖日過祠百千。而心與敬
一。不待有所起。而無不聳肅矣。敬實聖人傳心之至言。而學者繇狂躋聖之基。豈惟五典賴是而惇。以及
應事接物。無有外此。而能中道者。況軍旅之事。尤在能敬。孔子所慎。齊戰。疾與夫臨事而懼者也。敬乎敬
乎。其可斯須離而弗居乎。或曰。射于何而觀德。曰。若知夫鑑也。明足以燭須髮。塵棄之久。或涉切而不見。
邱山。此無他用。不用之分也。雖兵亦然。五兵之長。莫長弓矢。至不仁之器也。王者用以威天下。則足以芟
暴亂。而仁元。速功成。后定。而無所試。必世之間。老將宿兵。日益耗亡。膏梁執袴之子。制外闔焉。無賴墮
窳之人。備前驅焉。不幸卒有狗吠之警。使是曹出而禦之。而能必其康靖乎。古人見其然。故歲訓而時講
之於鄉射。蓋束是不仁之器。修之於俎豆之中。雖有頑鷲弗率之人。相漸以禮。而相摩以樂。不敢萌啓邪
心。知尊君親上。而易使於一旦。此先王維持太平之宏綱大經也。其法。主賓有送迎之拜。耦繼有上下之
比。弓有橫卻兼弣弛張之度。矢有措挾順羽拾取之儀。行有鈎楹相左之章。揖有當階及階。當物及物。當

楛及楛。取矢卒。取矢之數。衣有袒襲。決拾有說。翻有舉偃。籌有奇鈞。而侯有去負。司正有請誘。作命之目。燕饗有獻酬。酢旅之節。奠觶有豐。糾過有扑。日出卽事。窮日而休。必強志勉力之士。能無衰惰。以有終否者。或取恥一庭也。故曰。可以觀德行。惟志乎復古者。可與言此。而君以國人不在。禁挾弓矢之科。宜於貫革尙武之射。何待夫試閱。始闕其技。其名是亭。欲納是身於禮樂。以觀德一方。其有見於維持太平者。在此而不在彼也。嗚呼。其知所務哉。然天下萬事。皆出吾心。而有本有文。居敬本也。觀德文也。合堂與亭記之。夫豈二道歟。

江漢堂記

姚燧

江漢南北之限也。三王之德之封建。嬴秦之力之郡縣。漢氏則曰。吾王霸雜。兼封建郡縣。而犬牙之。是時無有裂幅員而自帝者。繼漢始有之。德不能以相高。力不能以相卑。雖皆盡是爲守。而帝南者終不能北。有尺地。籍以一天下。能一之者。皆自北而南也。故吳自帝。晉平之。宋齊梁迭自帝。以迄于陳。隋平之。宋自帝。我元又平之。豈江漢能限世道之否。不能限天運之通歟。嘗合二代而觀之。以皇上之冠古無倫。晉武隋文。何人斯哉。然非有君無以開是功。非有臣孰能成是功。古今人不相及。而謀或一揆。隋臣不道也。晉羊祜首策。平吳。吳平而身不及見。武帝追念其功。封其夫人萬歲鄉君。於太尉忠武史公。其事差似。蓋公自事潛藩。嘗使經略於汴。總兵十萬。屯田千里。不專強武。而惠信是敦。耕商之民。錯行其區。不相賊殺。有獲俘亡。皆生還之。雖鄰國臣。亦許其自負。羊公者。無慚德焉。于時堂曰。江漢固已張吾雄。噬南紀之本。皇上踐阼。又以四聖元臣。丞相中書。燮和雍熙者。十有六年。方將百萬之衆南伐。至郢而疾。詔他將專制。而

還公于軍。其辭若曰：晝剪宋策，汝也。成功而疾，汝安何言。誠有不諱，碑汝之勳。班汝之爵，于不可必。死者之知，能知之者，非人與汝子孫耶。四海聞之，以皇上歸平宋功於公之生，已賢乎思祜於死。及薨，有今贈諡。又詔其元子格，以平章政事行省湖廣。季子彬，宅端揆于中，皆相繼薨。又詔中子杠爲中書左丞，行省湖廣。孫燿，以平章政事行省江西，視封祜妻君萬歲鄉，又何如也。左丞今至，無第於鄂，完官屋以居，謀名其堂，燿應之曰：斯堂也，非專晝訪而夕修，必將歲時奉嘗，太尉其鋪張勞庸，揚修蟬冕，報皇上而歸美，必文爲聲，諧之笙鐘，侑其利成，爲詩之名，捨曰續江漢者，他宜無稱于以格其精神魂魄，乘雲御風，陟降在庭，必懌然曰：始吾爲堂，北此千里，于時未踰江漢也。後數十年，吾子乃能尸祝吾於江漢，庶其善成先志哉。漢祖之誓功臣曰：黃河如帶，泰山如礪，國以永存，爰及苗裔。今由河而視江漢，曾不得其三一，河誠可帶，江漢猶當爲襟，計將來及吾苗裔者，或終古而無究也，必容與依歸，不是去焉。公曰：記之。吾思不及者，公字柔明，以至元壬辰，下車，人見其不儉，不及不豐，過中恢乎有容，屬屬乎敬坦以明也。相語以爲託，太尉遺體，而得其遺風。詩曰：雖無老成人，尙有典刑。其歲嘉平庚寅，臘姚燿記。

遐觀堂記

姚燿

長安城西二塗，西北通咸陽，王公之開府于此，與西北南三陲之使，冠蓋之去來，尊俎之候餞者，所出行旅之夥，不列也。西南入鄠，抵山無所適，贊乃令承餘，則田夫樵婦，與城居有墅於郊者，所出，斯固已可爲倦游而休仕者，所託廬矣。二塗同出，其相遠無幾何，而喧寂異然，亦可見利勢之在，與所無也。鄠塗之北，距城不數里，則宜慰張公之別業，規園其中，築臺爲堂，崇袤尋丈，縱廣十轍，清風之朝，長日之夕，四方勝

概極目千里。凡秦漢隋唐之陵廟池籞。由人力以廢興。可弔而遊。可登而覽者。在所不取。其高上如華陽。終南。太白。嵯峨。吳嶽。岐梁之奇峯絕巘。爲三輔之鎮。窮古而有者。皆環列乎軒戶之外。而臥對之几席之上。余曰。遐乎觀哉。古人堂者多矣。其壯有加於此乎。使誠有耶。雖風摧雨剝于千載之上。亦宜略存阨然之迹。可尋於今。今則束板以載之。負畚以興之。以是知無因於前。而獨始於公也。今我與公屬觴乎此。夫豈苟然哉。百年之身。其有幾何。是及賞其成。而不及憂其敗也。及樂其完。而不及悲其毀也。後之時。或風摧雨剝於千載之下。有登吾阨然之迹者。曰。嘻。斯何世何人之爲。公名不旣壽矣。公笑曰。吾何嘗期如是之久哉。第擇君言與吾堂稱者。卽名曰遐觀。蓋記諸余曰。公通介貴臣也。請與之言。臣可乎。古之人。惟見危授命者。故得守節仗義。殺身成仁之名乎。可以無死而死。猶爲徒死。而傷勇。然則出處之際。死生之所關。死生之所關。善惡之攸歸者。莫大於爲人臣。使不遇存亡危急之會。亦未嘗不以明哲保身爲賢。斯揆道歸義之臣所能也。嘗聞之望諸君。善作者不必善成。善始者不必善終。九原可作。將無謂秦無人也。今之仕者。吾不知孰爲道義之臣。能志功名者亦鮮矣。志富貴私身以毒世。卒離尤而蹈禍者。駢首接踵也。是於計功謀利之間。且有不能。況揆道而歸義乎哉。究公平生。嘗吏民矣。嘗治兵矣。亦嘗持憲矣。忠炳日星。而難不辭于湯火。氣吞湖海。而信不移於邱山。視竹帛之書。鼎鐘之勒。恆有晚古人。薄前世。不足爲之心。以故在庭之百辟。山東數州。秦蜀九路之氓。瀟灑荷旂。方三千里之獠。孰不聞其名。而奇其才。沐其愛。而但其威。年五十二。竟以許國盡瘁而歸。鼓犛僮奴千指。而食其力。甘自齊于匹夫。讀書以教子。飲酒以樂賓。將終其身。非熟爛世故。遐觀一代之表者。能是乎哉。蓋天下之事。遐觀則先識。先識則幾矣。雉兔之

不能搏人。誰不知之。突起道左。或失聲辟易。而喪其常守。以其卒然遇之也。使前見於數百步之外。無曰雉兔。雖虎兇之暴。人得以爲備。將不患矣。斯不亦吾堂言外之微意乎。未易以語他人。將惟公可。公名庭瑞。字天表。至元癸未。以太中大夫。諸蠻夷部宣慰使致事云。又四年丁亥六月下澣日。姚燧記。

元文類卷之二十九

記

凝道山房記

吳澂

永平鄭侯鵬南。嚴重清謹。爲時名流。而不以所能自足也。謂仕必資於學。學必志於道。別業在滕州。築山房爲游居之所。取子思子之語。而扁之曰凝道。不遠二千里。走書徵言於予。夫世之成室屋者。往往有記。記者紀其棟宇之規制。營構之歲月而已。稍能文辭者。可命也。而奚以予言爲。侯之意。寧不以予嘗講聞於儒先之緒論。而欲俾言其所謂凝道者乎。嗚呼。道不易言也。言之易者。未必真有見也。非真有見而言。是妄言也。而予何敢。夫子曰。爲之難。言之得無訕乎。雖然。侯之意。不可以不答也。詎容已於言哉。請言其似道在天地間。猶水之在大海。道之中有人。猶水之中有器。浸灌此器者水也。納受此水者器也。水中之器。或沈或浮。而器中之水。或入或出。器與水未合一也。水在器中。凝而爲冰。則器與水永不相離。而水爲器所有矣。人之於道。猶是也。有以凝之。則道在我。無以凝之。則道自道。我自我。道豈我之有哉。人之生也。或智或愚。或賢或不肖。均具此性。則均受此道。不於賢智而豐。不於愚不肖而嗇也。愚不肖之不賢。智若者何也。能凝不能凝之異耳。嗚呼。子思子言道。所以有貴於能凝者歟。凝之之方。尊德性而道問學也。德性者。我得此道以爲性。尊之如父母。尊之如神明。則存而不失。養而不害矣。然又有進修之功焉。蓋德性

之內無所不備。而理之固然不可不知也。事之當然不可不行也。欲知所固然。欲行所當然。舍學問奚可。德性一而學問之目八子。思子言之詳矣。不待予言也。廣大精微。高明中庸。故也。新也。厚也。禮也。皆德性之固然。當然者。盡之極之。溫之。知之。問學以進。吾所知也。致之道之。敦之。崇之。問學以修。吾所行也。尊德性一乎敬。而道問學兼乎知與行。一者立其本。兼者互相發也。問學之力到功深。則德性之體全用。博道之所以疑也。夫雖然。此非可以虛言言。亦在夫實爲之而已矣。斯道也。人人可得而有也。況如侯之卓卓者哉。其疑之也。予將驗侯之所爲。侯名雲翼。今爲江南行御史臺都事。延祐四年。臨川吳激記。

檣槎亭記

元明善

汲人張君錫氏。作檣槎之亭。志怪者云。海與天河通。蓋有人乘槎至斗牛間。徵而慕之。故以名亭。昔君錫挾能放游。浮河達淮。亂江而南。歷吳越。西至于鄂。衡又至于沅。澧。踰洞庭。下彭蠡。內齋列中。息於水腹。奪鼻于覆。柳漸于罅。或再月不得抵所止。舟師候祥。盲風焱作。水與風爭。鱸舳崩傾。檣折柁敗。焱無底戾。又雨且暮。游二十年。不知幾此遭矣。怠而北歸。有官留中。意必夜悸于夢。朝恍于見。猶事于槎。亦何謂邪。曰。怖吾之南。信如子言。今吾完然我也。不亦有不水死者衆乎。環燕千里。無湖江浸也。依龍光被休風之人也。考壽昌嗣。終不逢不若。宜也。嘗試徵余二十年間。或者服食百忌。少乘有擇。武導畫兵衛。夜臨避而吻動。又噤見獲。則聲功亟詫。非不牢自謀也。一旦若輕塵。驚風漠無蹤響者。抑何也。其所居甚海濤。所乘甚膠舟。風水不爭。立將解剝。彼且安之。固亦危我矣。雖然。世所共安而不之危者。非大地乎。然載萬物者。地也。載地者。水也。火水石土。合爲地體。并水而載之者。天也。地不爲大舟乎。天不爲大水乎。實大舟。運大水。

其不有大危乎。道雖無泯。器當有敝。十二萬年之後。又誰知果不并大舟大水。而趨於大壞也。與槎本無也。無又何待於槎。亭亦無也。有亭必基於土地。且不能自有。何有於物。雖然。寄吾於槎。猶萬物之寄於地。同寄也。又奚安奚危哉。余曰。子之號。達矣。曠矣。其情盍求夫稱也。夫槎者。溝中斷也。利小涉不大受也。胡不虛其中。使無不容。牢諸外。使無不載。道爲之楫。時爲之颿。泊之於義渚。繫之於德淵。若然。效大舟之實而不洩。託大水之運而不覆。漚漚乎。激激乎。槎之進乎是也。至矣。

順州儀門記

元明善

春秋左氏傳曰。新作南門。不書。非公命也。非也。興作必書。然合禮不書。書皆貶也。南門。蓋魯君之臬門也。新作者。改舊剏建之謂。必當禮而不書。不然。則左氏之誣也。諸侯三門。臬門。應門。路門。今之州。準古伯子男之國。作儀門。禮也。春秋合禮不書。作儀門。此何以書。喜制備而從民志。且非爽於春秋之旨也。制備而從民志者。何。溫榆水之陽。有古城焉。曰順。以州隸大都路。地沃而民淳。自國家罷兵百年。涵濡撫育。生殖日繁。蔚爲饒郡。郡城據亢爽地。而四下郡。靡特當其亢。亢有故儀門址。又亢亢之尋常。郡人以不屋於其上爲恥。屋焉。則鼓魚於斯。懸令布政於斯。有以雄其州。而聳民聽觀矣。至大四年。知州事梁君彥義始來。明年百廢次第舉。民用大和。民曰。吾無訟以撓州。吾稅賦以時足。使君甚仁。不生事害我。使君召役民。必樂趨。於是梁君知其民之可用也。迺謀諸監郡某。將建岑樓於址。僉曰。休哉。惟時請割俸金以倡。俄而州人故中書右丞曹公之家。今樞密副使石公。及諸名士。或寫之材。或予錢米。民皆子趨。以獻工役。肇事于皇慶元年秋七月。畢工于二年夏六月。規制端大。輪奐丹雘。歛若天成。登其上而望。北則紅螺峻極。雖五

十里外。若接闌檻。東北曰黍谷。則鄒衍吹律之山也。潮潞二水。會於白遼。經城東而南注。吳船來集。通玄橋下。其西南。則天都霄漢。觚稜金爵。隱然鬱葱。佳氣之間。羣情大悅。於是郡制備矣。民志從矣。則又曰。是不可不著。興建之歲月也。迺託右丞之子。太保長史。偉求余文。余太史也。凡書必稽諸典禮。遂爲據經而述之。俾知今之州。準古諸侯之國。不爲不重。興作制備。而從民志也。則太史喜爲之書。苟不足乎是。而要名勲民者。爲春秋之所貶。君子慎諸。

武昌路學記

元明善

武昌墉山而城。塹江而池。挾滇益。引荆吳。據楚中。履南越。宋人二百年間。峙糗鍛兵。岌爲邊壘。帝元一四海而家之。池也不足乎深。城也不足乎高。恤刑尙德。武弛文張。民日趨于禮樂之域。而不知爲之者。建侯樹屏。表疆明制。及此焉。行中書省。而統四道。宣慰使。元將大吏。咸走節下。聽約束。奉期會。然則武昌自爲重鎮矣。凡夫表厲化導之具。宜有以倡庶方。而厲羣目。獨廟學陋小不稱。司憲者如詔興言。保釐者責功郡守。振紀有嚴。營畫是亟。禮殿東廡。西廡。戟門。饌門。齋廬。爲屋五十餘間。端大堅緻。丹碧藻繪。象設筵帟。皆視儀度。尊豆鍾磬。不爽典祀。惟講堂經閣諸室。不剏而葺。歲丁巳五月肇基。越己未十有二月告成。學後曰鵠山書堂者。廢而入於豪華。徵劑歸公。方議勒石紀始。而除者得龜趺于埋中。別致貞碑于湖南。明善適參政行省。兩府來相與言曰。衆心一公。奏厥完美。期奉天明。思勸民職而已。惟是彰今而垂後者。咸願有作。謬嘗上直翰林。曷敢拂乎雅命。然記事必載其實。興學當原其本。禮始立學。釋奠先聖先師。學之有廟。漢以還始聞也。孔子先聖。顏氏先師。唐以來始定也。由學尊廟。因廟表學。廟焉而不敦夫學。非制

也。謂報焉。在是抑微也。天以之而道明。地以之而理察。人以之而極立。三才既奠。萬化乃成。推功絜德。天地實參。斯報之圖。罔極何從。聖朝龍奮。北天弓劍。辟國顧乃。首尊孔氏。旌用儒生。列聖錫禮。崇祀加諡。增秩若稽典。則昭陳政化。揭科比士。登賢建官。不有望於聖道。贊化天下乎。夫道不玄邈。以爲高。不空寂。以爲深。大則充周乎萬物。小則流行乎一身。法制謹嚴。經權周密。蓋不越易書詩春秋之外矣。亦不離綱常事爲之間矣。若夫盡學士之上達。極聖賢之能事。固非指顧可會。文辭可判。而君子也。而賢者也。不諄諄歎德言曰。君子德非徒德。才言曰。賢者才非徒才。道明義著。智周行圓。其用而出也。細不遺。而鉅有措。其舍而處也。近者化而遠者格。爲良臣。爲大人。爲節士。爲真儒。非由外假。端在我爾。無師而興。固曰豪傑。受業而成。孰謂凡民。美哉。簪裳入學。肅瞻新廟。斯弦斯誦。相規相誨。顯顯然巖巖焉。本學者養正以成。聖功未學者游藝以獻。春官乃馱馱。乃譁張聲焉。無所入也。懽焉善距來也。穹屋華題。資爾燕閒。德求而無以徵之。才求而無以齊之。哀哉。匪但退作室之初心。無乃孤崇儒之明詔乎。武昌南服。列城言言。百辟承風。多士砥節。或挾能而起。或抱璞而潛。聲光侈其不遏。吾爾恧焉矣。雖然。山川流峙。風氣融結。瑞不歸於鳳麟。寶不期於金璧。偉人魁士。羣出而爲國家之屏之翰也。將自今日。

虛室記

元明善

居室而強之名。非古也。名而名之曰虛。厥義宏也。非古而從爲之文。溢辭也。義宏而或已於言。闕於理也。嘗試爲虛室之記曰。截十二琯。參差地中。以宗黃鍾之長。由是制八器。寓五音。百王之樂。以之而變。掇二十八字爲母。錯綜四韻。唱而和之。萬七千二十四聲音。以之而盡。雷奮地中。雲族而雨。甲者坼。蟄者起。回

宣脈沐達于無垠。入于無際。氣卽之而流形。物由焉以各化。大塊噫氣。厲則鼓盪衆峙。和則嘘撓萬植。洶洶焉蓬蓬焉。上無高也。下無堅也。旁無遠也。謂夫穹窿而蒼蒼者天也。厯雜而荒荒者地也。蒼蒼者無體。莫然旋氣也。荒荒者亦無體。塊然凝氣也。凝非不入也。而天闢之旋非有間也。而地翕之。人物子於兩間。陰陽司其生死。旦夜一瞑眎也。開閉一成虧也。雖然。此徒以虛觀之也。指一草而質焉。句于土中。甲于地上。牙葉枝幹而華實又生也。指一佳而質焉。卵也。殼也。俄而鳥也。鳥復卵而殼也。火也。潛石。擊之則然。續之則燎。水也。母氣。氣止潤滋。匯而淵海。謂天無體。舍日月星辰以求之。并天亦無謂。地無體。舍火水石土以求之。并地亦無。蓋象於上者一不實。天道廢矣。形於下者一不實。地道廢矣。乾不一實感。坤不一實應。凡子於其間者。幾乎其熄矣。而況於萬古之世。億兆之人。能不實而有其有哉。雖然。此徒以實觀之也。天地之間。陰陽而止矣。陽實也。其體則虛。陰虛也。其用則實。陽非虛。物無以生。陰非實。物無以成。故曰。一實二虛。還相體用。惟虛也。乃能受。能受。故神惟實也。乃善出。善出。故化。父道也。母道也。人物之以命相資也。孰有壹之之理哉。危子曰。吾老莊之徒也。以虛體道。以虛用物。游於太初。合乎自然。故強居室以名。殆將處夫無我也。元子曰。以天地而齊老莊。不辨而二子細也。二子烏能外天地。苟不能外天地。又豈肯有己而盡廢物理之察察者哉。然則危子之學者。揭其一端。隱夫大全。若曰。人皆取實。己獨取虛。芒乎。芴乎。歸然而有餘者耶。

萬竹亭記

李君仲淵。由蜀省員外郎。入爲監察御史。余別十五歲。相寄文家於萬里外。一旦會京都。至歡也。間爲余

元明善

言成都之樂買屋買田矣。弟叔行有田廬在蠶茨周所居。植竹竹無慮十萬箇。構亭竹間。覆之白茅。名曰萬竹。竹不止萬。而曰萬。志盈數也。亭之西雪山嵯峨。玉立霄漢。東則泯江之支。洪流達海。亭並長溪。可汲可漁。抱亭幾合。而去與江會。每風日清美。目因境豁。羣慮冰釋。神情散朗。超然遺世。風或雨之夕。溪聲與竹聲亂。耳入清音。幽思以宣。肅如也。或雪或月。亭與竹盡宜。吾兄弟時相過。而愛亭甚。日對哦。夜對牀者。春與秋多。將棄官歸老矣。君爲吾弟記之。仲淵三兄弟。而兄若弟。未之前識也。嘗讀其兄伯誠之文。見其文知其賢矣。獨未知叔行。觀是志。尙人賢可想。一門兄弟。彬彬其先大夫之賢。又可得矣。王子淵。司馬長卿。楊子雲。以及蘇明允父子。暉當代。而名後世。殆蜀材之芳華茂實。慕者有所震也。仲淵兄弟。生關中。宦學三川。又將老成都焉者。得非居其鄉。慕其人。而襲其茂芳。掇其華實歟。不爾。竹何地無也。雖然。成都自古受兵最慘。入我版圖以來。今六七十年。上之所以蒼定休養者至矣。肆仲淵兄弟。保安無戒。思永令圖。使丁當時攻戰之殷。且見斬竹以爲韃。陁溪以爲堞。尙亭乎哉。尙對哦對牀乎哉。果得老乎時。正當感國家承平之澤也。余嘗思假一役。過潼華。縱觀三輔。道漢中。以覽全蜀。浮江。邀吳楚。而歸。邂逅見仲淵比騎。問叔行於蠶茨。登萬竹亭。質仲淵之。今言。然後廁賢兄弟間。猶堪資一日夜之談詠也。茲爲亭記。俾叔行刻之。亭石卜斯游之能。遂與否也。遂後百千年。豈不爲萬竹亭之嘉話哉。

濟南龍洞山記

張養浩

歷下多名山水。龍洞爲尤勝。洞距城東南三十里。舊名禹登山。按九域志。禹治水至其上。故云。中有潭。時出雲氣。旱禱輒雨。勝國嘗封其神。曰靈惠公。其前層峯雲矗。曰錦屏。曰獨秀。曰三秀。釋家者流居之。繇錦

屏抵佛利山。巉巖環合。飛鳥劣及其半。卽山有龕屋如。廣可容十數人。周鑄佛象甚夥。世兵逃亂者。多此焉。依然上下有二穴。下者居傍。可透迤東出。其曰龍洞。卽此穴也。望之杳然。竊欲偕同來數人入觀。或曰。是中極闊。非燭不能往。卽命僕燃束茭前導。初焉若高闊可步。未幾俯首焉。未幾磬折焉。又未幾膝行焉。又未幾則扶服焉。又未幾則全體覆地。蛇進焉。會所導火滅。煙鬱勃滿洞中。欲退身不容引。進則其前隘。且重以煙。遂反聰抑鼻潛息。心駭亂恐甚。自謂命當盡。死此不復以出。余強呼使疾進。衆以煙故。無有出聲應者。心尤恐。然余適居前。條得微明。意其穴竟。於是極力奮身。若魚縱爲者。始獲脫然以出。如是僅里所。旣會有泣者。恚者。詬者。相譏笑者。頓足悔者。提肩喘者。喜幸生手其額者。免冠科首具陳其狼狽狀者。惟導者一人。年稚。形瘠小。先出。若無所動。見衆皆病。亦陽懼爲殆。其讌於外。卽舉酒酌穴者。人二盃。雖雅不酒。必使之醕。名曰定心飲。余因默憶昔韓文公登華山窮絕頂。梗不能返。號咷連日。聞者爲白縣吏。遂遣人下之。嘗疑許事未必有。由今觀之。則韓文公之咷猶信。嗚呼。不登高不臨深。前聖之訓較然。而吾輩爲細娛。使父母遺體。幾壓溺不弔。其爲戒。詎止物身不可忘竊。虞嗣至者。或不知誤及此。故記其事以告焉。游洞中者某官某洞之外。坐而宴飲者某官某。凡十一人。

邵菴記

袁 桷

雍虞伯生。界其居之偏。爲菴廬焉。溫清之隙。則怡怡然飽食以歌。宴休於中。其廬溫密樸質。具粹且深。中而虛之。若壁而環。若鑑而明。樞圓而扉方。闔闢以動止。其溫燥也。楊以舒其清焉。其淒厲也。隕以休其和焉。左顧右矚。神止氣寂。晝握其動。夜根其靜。不丐飾于外。據萬物之會。以極其榮觀者焉。廬不廣。尋丈旁

設易圖。圖除其卦五十有六。睽而視之首。擊而尾。應迎而存之風。至而水涌。審聲遺形。益原其情。忽然控浮游以上征。則搏制控伏。囿于其內。而不能以自恣。或曰。非輕世遠舉者。不得以專。是伯生曰。維昔邵先。遭時明康。玩芳以嬉。不激不隨。順其隆污。儒者之準也。吾將尊其廬。曰。邵菴何如。桷曰。可乎哉。言無郵乎。夫敦厚而靈明。君之先也。峻簡而潔精者。君之光也。自君之出名。日以張。莫窮其鄉。眈眈然聲音笑貌之學。詎昔之志也。勉之哉。茲廬之制。易而不卑。簡而不倚。其取諸物。非鑠我者也。由質以成禮。無踰矣。迺觴以祝之。介其休明。烟烟煜煜。維道之門。惻惻款款。維德之本。美哉廬乎。足以爲永居乎。

董子祠堂記

曹元用

漢中大夫董仲舒。遷於春秋。其學醇正。有原。武帝時對策三篇。切中時弊。致武帝表章六經。罷黜百家。先儒以爲其功不在孟子下。兩相驕主。動必由禮。守正不阿。時公孫弘方以容說位宰相。故終身不得復進。夫孔子歿既久。異端並興。學者愈失其傳。秦漢以來。知道者鮮。惟董子能言正誼而不謀利。明道而不計功。以仁義禮樂正心脩身爲治國平天下之具。論道之大原。及明於天性之說。多得聖人之旨。其言奧衍弘深。沛有餘味。或者乃譏其見道未明。竊以爲過矣。夫以游夏之言。方諸孔子。猶爲有疵。況董子承秦滅學之後。而能造道如是。詎易得哉。使其游於孔門。可與十哲亞。使居相位。可與三代之治。劉向以爲有王佐之才。管晏弗及也。真知言哉。按漢書。董子。廣川人。廣川屬漢冀都郡。今景州蓆縣是也。縣西南鄉有廣川鎮。其別墅曰董家里。有祠在焉。唐宋碑刻猶存。縣北門道右。故有董子祠。不知創於何時。國家大德初。縣人林士豪。嘗加補葺。天歷元年。承務郎縣尹呂君思誠。視事始拜謁祠下。顧瞻而歎曰。祠當通衢。湫隘

若此非所以居董子也。八月遷於縣治之東。東有崇臺三丈。傑閣二層。舊爲官僚游憩之所。遂新其弊。仆定爲董子祠。更其衣冠。悉遵古制。明年某月落成。聿脩祀事。舊無縣學。呂君又築講堂祠下。爲東西兩齋。命教諭劉激權主董子祠事。朔望先謁孔子廟。次則及焉。又爲孔子像。置之社學。使民知所向慕。呂君字仲實。平定州人。由國子伴讀。擢進士第。補同知遼州事。以母憂去官。終喪而有落之命。清勤無私。臨事明決。訟十年不絕者。諄諭以禮。輒兩已之。子愛其民。事集而民不擾。咸畏威懷惠。境內大治。安陵道士以久旱持盧師蛇名小青者至。郡僚羅拜以禱。君怒欲取而殺之。道士泣請得免。後數日乃雨。其不惑於邪如是。余與乃父廉訪君昔聯仕憲臺。今嘉其有子而能官也。故爲作董子祠堂記。仍賦享神辭以繼之。其辭曰。

蓀之土。平原臙膺。爰有哲人兮。道傳千古。道傳千古兮。爲紀爲綱。徽猷允塞兮。嘉言孔彰。天旣佑我蓀兮。篤生元哲。不克取而師兮。是曰自絕。層臺兮巍巍。傑閣兮翬飛。神靈兮有託。祀事兮無違。想高風兮如在。期進德兮逾勸。繼自今兮。毋忽毋怠。

考亭書院記

熊禾

周東遷而夫子出。宋南渡而文公生。世運升降之會。天必挺大聖大賢以當之者。三綱五常之道所寄也。道有統。義軒邈矣。陶唐氏迄今。六十二甲辰。孟氏歷敍道統之傳。爲帝爲王者。千五百餘歲。則堯舜禹之於冀也。湯尹之於伊亳也。文武周公之於岐豐也。自是而下。爲霸爲強者。二千餘歲。而所寄僅若此。儒者幾無以藉口於來世。嗚呼。微夫子六經。則五帝三王之道不傳。微文公四書。則夫子之道不著。人心無所

於主利欲持世庸有極乎七篇之終所以大聖人之居而尙論其世者其獨無所感乎嗚呼繇文公以來又百有餘歲矣建考亭視魯闕里初名竹林精舍後更滄洲宋理宗表章公學以公從祀廟庭始錫書院額諸生世守其學不替龍門毋侯逢辰灼見斯道之統有關於世運故於此重致意焉歲戊子侯爲郡判官始克修復邑令故澶郭君瑛又從而增闢之乙巳侯同知南劍郡事道謁祠下顧謂諸生曰居已完矣其盍有所養乎書院舊有田九十餘畝春秋祀猶不給侯捐田爲倡郭君適自北來議以克協諸名賢之胄與邦之大夫士翕然和之合爲田五百畝有奇供祀之餘則以給師弟子之廩膳名曰義學田初省府以公三世孫朱沂充書院山長旣歿諸生請以四世孫朱椿襲其職侯白之當路仍增弟子員屬其事於邑簿汪君蒙且以書來曰養可以粗給矣而教之不可以無師也謂禾猶逮有聞俾與前貢士魏夢午分教小大學蓋有甚欲然者旣又屬禾記其事其將何以爲詞重惟文公之學聖人全體大用之學也本之身心則爲德行措之國家天下則爲事業其體有健順仁義中正之性其用則有治教農禮兵刑之具其文則有小學大學語孟中庸易詩書春秋三禮孝經圖書西銘傳義及通鑑綱目近思錄等書學者學此而已今但知誦習公之文而體用之學曾莫之究其得謂之善學乎矧曰體其全而用其大者乎公之於考亭也門人蔡氏淵嘗言其晚年閒居於大本大原之地充養敦厚人有不得窺其閒者蓋其喜怒哀樂之未發早聞師說於延平李先生者體驗已熟雖其語學者非其一端而敬貫動靜之旨聖人復起不易斯言矣嗚呼此古人授受心法也世之溺口耳之學何足以窺其微哉公之修三禮自家鄉至邦國王朝大綱小紀詳法略則悉以屬之門人黃氏榦且曰如用之固當盡天地之變酌古今之宜而又通乎南北

風氣損文就質。以求其中可也。此公之志克遂。有王者作。必來取法矣。嗚呼。古人爲治之大經大法。平居既無素習。一旦臨事。惟小功近利。是視生民。亦何日蒙至治之澤乎。秦人絕學之後。六經無完書。若井田。若學校。凡古人經理人道之具。盡廢。漢猶近古。其大機已失之矣。當今治宇一統。京師首善之地。立胄學。興文教。文公四書方爲世大用。此又非世運方升之一幾乎。邵氏觀化所謂善變之。則帝王之道可興者。以時考之可矣。誠能於此推原義軒以來之統。大明夫子祖述憲章之志。上自辟雍。下逮庠序。祀典教法。一惟我文公之訓是式。古人全體大用之學。復行於天下。其不自茲始乎。今公祠以文肅黃氏。榦配。舊典也。從以文節蔡氏。元定。文簡劉氏。燾。文忠真氏。德秀。建安武夷例也。我文公體用之學。黃氏其庶幾焉。餘皆守公之道不貳。其侑公也。實甚宜。公以建炎庚戌。生於劍之南溪。父吏部韋齋先生仕國也。公蘊經世大業。屬權姦相繼用事。鬱鬱不得展。道學爲世大禁。公與門人益務堅苦。泊如也。慶元庚申。歿於考亭。後十年庚午。疆場事起。又六十七年丙子。宋亡。公之曾孫浚。以死節著。嗚呼。大聖大賢之生。其有關於天地之化。盛衰之運者。豈可以淺言哉。夫子之六經。不得行於再世。而公之四書。乃得彰著於當代。公之身雖詘於當時。而公之道卒信於其後者。天也。過江來。中州文獻欲盡。自左丞覃懷許公衡。倡明公學。家誦其書。人尊其道。凡所以啓沃君心。栽培相業。以開治平之原者。皆公餘澤也。方侯荆義學。東平袁君璧。適以栗事至閩。訪求公後。表浚二子林彬於省。長南溪建安二書院。奉韋齋及公祠。又以考亭乃公舊宅。懇懇爲語諸生。小學入門之要。尤以師道不立爲憂。旣而金華陳君舉。司文吳會。爲胄學徵藏書。考尋文獻。且欲於此繼成公志。以復六經古文爲屬。誠巨典也。而必有俟焉。天道循環。無往不復。欲觀周道。舍魯何適。

正學一脈。亟起而逐續之。則天地之心。生民之命。萬世之太平。當於此乎在。侯之功。不亦遠乎。侯世以德顯。其仕閩。以化爲政。道南七書院。皆其再造也。考亭西北偏。有山曰雲谷。晦庵在焉。亦爲之起廢。汪君於山之麓。爲門以識之。凡公墳宅。悉從而表樹焉。庶乎知爲政之先務矣。精舍。翬於紹興甲寅。前堂後室。制甚樸。寶慶乙酉。邑令莆陽劉克莊。始闢公祠。今燕居廟。則淳祐辛亥。漕使眉山史侯季溫。舊構也。書院之更造。惟公手翬。不敢改棟宇。門廡煥然一新。邑士劉熙。實終始之。義學之翬興。宋奕黃樞。首帥以聽。華恭孫。葉善夫。趙宗叟。盱江李庭玉。與有謀焉。而厚帑庾。完暨茨。以迄於成。則虞子建。劉實也。賢勞皆可書。時提調官。總管燕山張仲儀。教授三山黃文仲。助田名氏。悉書石陰。後甲辰三歲。大德十一年。四月朔日。後學熊禾配。

元文類卷之三十

記

克復堂記

虞集

克已復禮之說。在聖門。惟顏子得聞之。當是時。七十子者。蓋有不及盡聞者矣。後學小子。迺得誦其言於方冊之中。聞其說於千載之下。豈非幸歟。蓋予嘗反而求之。沈冥於物欲之塗者。固無與乎此也。而知致力焉者。僅足以爲原憲之所難而已。其拔本塞原。脫然不遠。而能復者。世甚鮮也。然則苟有志於聖賢者。舍此奚適矣。然而難言也。昔者程伯子少而好獵。及見周子而有得焉。自以爲此好絕於胸中矣。而周子曰。是何言之易也。後十餘年。程子見獵者於道傍。不覺有喜意。夫然後知周子識察之精也。嗚呼。自顏子而降。若程子之高明而敦厚。純粹而精微。一人而已。其爲學也。心不爲原氏之剛制也。明矣。其十數年間。豈無所用其功哉。而是好也。深潛密伏於纖微之際。不能不發見於造次之間。噫。亦微矣。鄉非周子識察之精。固不足以知其必動於十數年之前。非程子致察之密。亦何足以自覺其動於十數年之後。是固不可與迂生曲學者論也。而衆人迺欲以鹵莽苟且之功。庶幾近似其萬一。可乎。不可乎。此則予之所甚懼。而且暮不忘者也。國子伴讀康生敏。以克復名其堂。而來求文以爲記。予旣嘉其慕向之高遠。而又懼其易之也。故著其說。使眞諸壁間。因得以觀覽。而資其行遠升高之一二也。

誠存堂記

虞集

昔者君子之言居也。宅曰安宅。居曰廣居。泰哉其所以自處者乎。何其安重尊高之若是也。竊意君子之所以爲安重尊高者。固無待於外。而上棟下宇。益得以休其體而致其養。夫豈苟然也哉。集賢待制鄱陽周君之爲堂也。築必固。材必美。攻斲必純澤。構締必堅纒。曲執必周正。戶牖必疏達。溫清必宜適。待其後之人。必久而無斲。凡作室之道備矣。及其成也。曾不以是自佚。方挈挈然以誠存題之。此其意豈淺淺者。願使集爲之記。集何足以知之。嘗試卽堂而言之。仰升俯降。卑高之位定矣。處深鄉明。內外之辨嚴矣。左揖右讓。少長之敘列矣。以祀以養。以宴以食。父兄宗族之親在是矣。鄉黨僚友之情可得而洽矣。靜以養動。以思朝以興。夕以寧。儼儼乎燭之而弗迷也。粲粲乎列之而有文也。循乎其行之無忤步也。確乎其歸之無異本也。繹繹乎其繼也。渾渾乎其無紵卻之有待於彌縫也。若是者。庶乎其名義之近之也乎。而集又何足以言之。大江之南。鄱爲大郡。物殷而家給。土木之盛。甲乙爲比。而又以文雅相尙。抑豈無以美名表其居者乎。誇者已張。警者已末。未有反身切求。若是其實而大者也。集又安敢不爲之記也。惜乎集之不足以知之。不知以言之也。謹記之曰。周氏誠存之堂。作以某歲。成以某歲。名之者。集賢大學士姚公端甫題之者。集賢侍講學士趙公子昂也。蜀郡虞集記。

思學齋記

虞集

予始識臨江杜伯原甫於京師也。見其博識多聞。心愛重之。間從之有問焉。沛乎其應之無窮也。而其天文地理。律歷卜祝。神仙浮屠之說。往往得識世外之士。至於因人情時物之變。論議政治之術。可指諸掌。

時大臣有得其才而薦用之者。薦上未命。而大臣者卒。事報聞。原甫漠如一不介意。方就客舍。取詩書易春秋。悉去其傳注。而繕書之。慨然有直求聖賢之遺於本書之意。未幾去。隱於武夷山中。其友詹景仁氏力資之。蓋得肆志於所願學。而予不及從之矣。延祐庚申。予居憂在臨川。原甫使人來告曰。我著書以究皇極經世之旨。子其來共講焉。且曰。我以思學名齋居舊矣。子爲我記之。明年。予免喪。省墓吳中。將遡浙。踰嶠以成其約。會有召命不果。又四年。景仁來京師。每以思學之記爲說。予曰。原甫高邁絕俗。又能閒居山林。無世事之奪。其所就殆必過人遠矣。予何足以言。予苟言之。人之所知耳。所不知固不可言也。它日授說於原甫。而執筆焉。尙未晚也。景仁曰。不可。必有以復於原甫者。乃試誦所聞焉。古之所謂學者。無他學也。心學而已耳。心之本體。蓋足以同天地之量。而致用之功。又足以繼成天地之不能者焉。舍是弗學。而外求焉。則亦非聖賢之學矣。然而其要也。不出於仁義禮智之固有。其見諸物。雖極萬變。亦未有出乎父子夫婦君臣長幼朋友之外者也。故曰。聖人者。人倫之至而已。聖人至而我未至。故必學焉。求其所以至。則必思焉。且何以知聖人哉。于其言行而已矣。言其言也。行其行也。然而反諸心。而有未盡。行諸己。而有弗得。是以有思。固非茫然無所主而妄馳者也。彼其由之。而弗知察。違之。而不覺反。憧憧往來於客氣之感。何其多哉。乃有爲之說者。反欲絕去倫理。措心如牆壁。以待夫忽然之悟。於一觸之覺。不亦殆乎。今求諸此而不得者。乃欲從事於彼。以庶幾萬一焉。反以絕學自勝。果爲善思者乎。噫。學固原於思。而善思者。必有所受矣。今夫有事於思者。如火之始然。而煙鬱之。泉之始達。而泥汨之。草木始生。土石必軋之。逮其發也。蓋亦已艱矣。故非高明之資。未易遽徹也。而況思非其道者乎。然而嘗聞之。明睿所照者。非若考

索之所至。夫至於明睿。則無所事乎思矣。無思者。幾乎聖人矣。其始乃在於完養而涵泳焉。時至而化。有非在我者。豈不盛哉。請以是質諸原甫。或有取焉。則因以爲記。

舒城縣學明倫堂記

虞集

學校。講學之地也。古未有廟。其釋奠於先聖先師者。非廟也。後世始爲廟以祀夫子。通乎天下三四百年之間。禮制寢盛。我國家郡縣無小大。皆得建學。尤以廟爲重焉。是以有司修祀典。勿敢闕。而教無其師。師非其人。則或有不暇計者。此士大夫因循苟且之通弊。要其識慮初不及此。無怪其然也。舒城古邑也。自宋季數有軍旅之事。故學校之盛。微不及東南。然而山川高深。風氣完密。民生其間者。有中州質愿之美。而奇巖幽谷。往往有昔賢名人遺蹟。足以風動其人。而其人亦樂道之。故其俗爲易化者矣。延祐乙卯。前令杜思敬始重建廟。而講堂卑陋弗治。久而益壞。部使者宋公翼嘗督縣令改作。辭以故。逮變理溥化。登蒙古進士第。長是邑。始出獨見。捐己俸。以天歷己巳之歲。度材庀工。撤而新之。凡爲堂三間。規制宏敞。始與廟稱。未葺告成。則某月也。董役者典史周允。耆儒宋楊椿。傅熙。宋文富。葺工者范應月。胡立本。皆儒也。至順元年秋。變理君以職事如京師。踵門來求文以記之。今夫郡縣之吏。急於簿書期會。有不暇於爲治。而況教乎。變理君之爲邑。知重學校。於爲學。知重講習。豈非知本者乎。夫君臣父子兄弟夫婦朋友之倫。本諸天理之固然。有不待於強名者。人之爲道。豈有出於此五者之外者乎。然而明之則敝。不明之則斲。此教之所由興也。氣質之不齊。雖萬其殊。而大概智愚賢不肖之分而已矣。斯倫也。愚者有所不知。不肖者又遠而遠之。故有待於啓迪。矯率無疑也。乃若賢且智者。所謂質之美者也。於其倫之所在。亦知求盡。

其心焉。然而不聞聖賢之傳。不經師友之辨。則不足以知天理之節文。精義之攸當。則直情徑行。必有墮於私意之所爲。疑似之近。幾微之差。其流弊反有以失其良心之正。而貽世俗無窮之害焉。此係於教者爲最切。故古昔學校之教。豈是皆以明人倫爲事。豈非憂之深而慮之遠者乎。嗚呼。灑掃應對而敬其事。則窮理盡性之學。斯在。服勤就養而盡其職。則存神知化之妙。已存。不踰乎屋室戶庭之近。而天地萬物之奧。已具。不外乎耳目口鼻之用。而陰陽鬼神之微。已通。人之所以爲人者。亦大矣。故曰。聖人人倫之至而已。不有以明之。孰得而知之哉。嗚呼。其說亦微矣。登斯堂者。觀其名而思其實。因子之言。而求變理君之志。庶幾有所觀感也。夫昔邑之君子。有李公麟伯時。嘗讀書龍眠山。因以自號。故有龍眠書院。在縣治東。飛霞亭之北。國初東禪寺僧併之。而書院廢。變理君得隙地於清心池亭之上。蓋伯時與蘇子瞻黃魯直諸賢之所共游者也。迺闢地爲屋。以復書院之舊。以廣爲學之處。變理君之於其民也。有古人之道哉。來者尙克繼之于永久。

孝思亭記

虞集

國子伴讀在平梁生。爲予言其邑之善士曰張氏。兄弟以孝友稱於鄉。作亭於先塋之左。手種松柏。鬱鬱成林。爲請於監察御史周君景遠。得大書孝思二字。以表其處。而求文以爲記。予嘗聞之。古之君子之爲禮也。蓋無墓祭。夫祭者之於鬼神也。求諸陰陽之義備矣。墓也者。遺體之所藏也。苟於是乎求之。豈不可哉。而古之君子之爲禮也。而墓無祭者何也。凡有國有家者。必有寢有廟。廟所以祭。而墓非祭所也。有廟者必有主。主之始立也。三祭以虞之。歸必奉諸其廟。歲時祀之。曰是神明之所依也。有禩之廟者。自己之

兄弟子孫皆至焉。有祖之廟者，自父之昆弟子孫皆至焉。有曾祖之廟者，自祖之兄弟子孫皆至焉。有高祖之廟者，自曾祖之昆弟子孫皆至焉。有大宗之廟者，凡族之昆弟子孫莫不至焉者矣。是合族之大法也。而近世士大夫家，廟主之制，或未之考，一再傳之後，昧於世次者，或有之矣。況於民庶者乎？是固君子之所深嗟，夫古之不可復也，然幸而猶有一焉。今中原之地，平衍溫厚，故其爲塋兆也，高曾而下，凡子孫皆得以次祔葬。歲時上冢，則猶得以知其處。此爲某親，此爲某親，拜於墓下者，孰爲某親之子，孰爲某親之孫，蓋深有維持族姓之意焉。後之君子，苟以義起禮，則墓亭之設，固在所不廢也。張氏兄弟拳拳於墓亭之意，豈非知本者乎？其以孝友稱於鄉也宜矣。張氏兄弟三人，曰通甫，曰欽甫，曰君甫。張氏之後，必有顯者，其自此三子者始歟。

魏宋兩文貞公祠堂記

虞集

至大四年七月，中山王公結，自集賢直學士出守順德。明年，郡以治聞，守居無事，乃按傳記而歎曰：魏文貞公徵，鉅鹿人，宋文貞公瓌，沙河人，今二邑隸順德，則二公皆郡人，守其土則祀其先民禮也。於是作宮學宮東南，考求當時衣冠之盛，肖二公儀形而合祠焉。郡人梁某、蘇某，各以財來助，司獄崔某、學正楊某，董其役。以延祐元年二月告成。泰定元年，天子始開經筵，王公在集賢侍讀，以經從，幸上都，集與在行間，以祠事語集，將篆諸石以識。集曰：治民者常示之以好惡，鄉背之正，則民志一而事有所據，特教之疏節耳。而世猶迂之甚矣，其不知本也。天下之患常出於巽懦無恥，巽懦者苟且無恥者無忌憚，苟且而無忌憚，人心始不可收，而至於無所不至。君子蓋深憂之。若二公者，誠足以表礪振起於斯人哉。唐有天下二

百餘歲。莫治於貞觀。莫盛於開元之初。一時名臣衆多。近代蓋莫之及。然而尙論剛正。能諫諍。有古大臣之風者。則未有踰於二公者也。苟以其事而論之。魏公言聽諫從。實終厥身。而宋公在相位數年耳。比其沒也。垂二十載。不復更任柄要。其得君行事。誠不侔矣。然而天下後世。信之無二。則固在於立志制行之相高者乎。夫二公之鄉。非有百里之遠也。二公之相。非有異世之隔也。邦人誦其事。而知其德。豈一朝一夕之積。而合祠之禮。曠久未舉。固亦有待也。邪。昔者仁宗皇帝在御。慨然閱習俗之弊於文法。頽壞淪靡。而莫之救。乃出獨斷以圖治。凡所簡拔。常出不次。一時作新之志。貞觀開元不足爲也。鄉使有若二公者。出乎其間。則氣類之合。風節所厲。庶幾少答聖明之萬一乎。始王公受知仁宗於東宮。及踐大統而已在外服。其祠二公也。特因其職分之所得爲而已。邇者論經之餘。亦嘗竊取二公言事之要。而陳之。辭之所達。萬不及一。徒想見其遺風餘烈之不可復作。南瞻祠宇。悠然有千載之歎焉。噫。豈吾二人之私也哉。故作享神之詩曰。

尊經堂記

虞集

侃侃正辭。高風相望。敬恭不忘。有合其鄉。於昭顧懷。庶其在此。以後民克享。世有君子。

吳君伯厚之上世。受學於陸文安公。文安公題其堂曰經德。而爲之記。歲久堂不存。伯厚之父更築之。不敢仍舊名。易之曰尊經堂。蓋言尊敬奉持。夫經德之訓也。它日伯厚述其先人之意。而求集記之。集謝不敏。至于再三。則爲之記曰。昔者嘗聞之。人有常尊。莫尊於天。國有常尊。莫尊於君。家有常尊。莫尊於親。是三者尊之不可踰者也。而孰知吾之有自尊其尊者。蓋有所受之矣。故能以眇然梯米之身。而與天地參。

立以贊其功用。而代其不及者焉。雖其氣欲之感。千汨萬變。而與上古聖神之所同者。終有所不泯。亦終不爲禽獸鬼蜮之歸者。良由此耳。今具耳目口鼻手足心思之體。而忽然易之。失其所常尊之者焉。其亦不思之甚矣。是故夙興夜寐。以匪懈也。靜養動存。以無貳也。樂行憂違。無時而不奉。以周旋也。生順死寧。以終始無違也。詩曰。不顯亦臨。無射亦保。傳曰。無有師保。如臨父母。嗚呼。昔之君子。蓋莫不尊之也。夫故夫前而千古。後而千古。億兆之人。豈不能以尊此也哉。容有所未知也。未知則必求諸其先知者焉。舍往聖之立言行事。奚適矣。然而以言乎事。則至簡也。以言乎言。則至微也。以億兆衆人之資。而欲求往聖於至微至簡。至難也。是故卽此而反求近思。以得之者。善學之能事也。自此而誦說援引。愈詳而愈遠者。支離之流弊也。故必有脫然真知其可尊而尊之焉。則天地同其大。日月同其明。江河同其行。寒暑同其信。孰得而易之。孰得而禦之也哉。後之志高材疏者。樂其超詣之速。而遽忘其反思密察之功。概以一言蔽其學。茫洋瀟落。幾入於狂簡之域。而不自反。賊害本心。反有甚於纏繞語言文字者。此豈非狎大人侮聖人之言。不知天命而不畏者哉。故使迂儒曲士。指其末。而目以異端之歸。則亦無怪其然矣。嗚呼。必有明識之士。出入其閒。而歷知異同之故。流弊之害。慨然而求之。有以盡其心體之大。而致其用焉。天地弗違也。鬼神無間也。此豈非振世之豪傑者乎。伯厚誠不移於習俗。不怵於時尚。奉承乃祖乃父之訓。而尊其所尊者焉。歸乎江山之上。搢紳先生。必有能爲伯厚言之者。延祐元年四月朔記。

西山書院記

虞集

建寧路浦城縣真文忠公之故居在焉。其孫淵子言其族人。用建安祠朱文公之比。築宮祠公。相率舉私

田給凡學於其宮者。而請官爲之立師。江浙行中書省。上其事。朝廷聽之。名之曰西山書院。列爲學官。實延祐四年四月也。是年天子命大司農晏翰林學士承旨某。譯公所著大學衍義。用國字書之。每章題其端曰真西山云。書成奏之。上常覽觀焉。昔宋臣嘗繕寫唐宰相陸宣公奏議以進。其言曰。若使聖賢之相契。卽如臣主之同時。識者以爲知言。由今觀之。宣公之論治道。可謂正矣。然皆因事以立言。至於道德性命之要。未暇推其極致也。公之書。本諸聖賢之學。以明帝王之治。據已往之跡。以待方來之事。慮周乎天下。憂及乎後世。君人之軌範。蓋莫備於斯焉。董仲舒曰。人主而不知春秋。前有讒而不知。後有賊而不見。此雖未敢上比於春秋。然有天下國家者。誠反覆於其言。則治亂之別。得失之故。情僞之變。其殆庶幾無隱者矣。公當理宗入繼大統之初。權臣假公之出。以定人心。旣而斥去之。十年復召。首上此書。當時方注意用之。未幾而公亡矣。詩云。人之云亡。邦國殄瘁。公再出而世終不獲被其用。豈非天乎。庸詎知百年之後。而見知遇於聖明之時也。然則公之祀。豈止食於其鄉而已乎。蓋嘗聞之。工師之爲宮室也。猶必有尺度。繩墨之用。樸斲締構之制。未有無所受其法者也。爲天下國家。其可以徒用其才智之所及者哉。今天子以聰明睿知之資。然能自得師。尊信此書。以爲道揆。況衆人乎。學者之游於斯也。思公之心而立其志。誦公之書而致其學。聖朝將得人於西山之下焉。不徒誦其言而已也。九月甲子朔十三日丙子。集賢修撰承事郎虞集記。

鶴山書院記

昔者儒先君子論道統之傳。自伏羲、神農、黃帝、堯、舜、禹、湯、文、武、周公。至於孔子。而後學者傳焉。顏子沒。其

虞集

學不傳。曾子以其傳授之聖孫子思。而孔子之微益以明著。孟子得以擴而充之。後千五百年。以至於宋。汝南周氏始有以繼顏子之絕學。傳至程伯淳氏。而正叔氏又深有取於曾子之學。以成己而教人。而張子厚氏又多得於孟子者也。顏曾之學均出於夫子。豈有異哉。固其資之所及。而用力有不同者焉。爾然則所謂道統者。其可以妄議乎哉。朱元晦氏論定諸君子之言。而集其成。蓋天運也。而一時小人用事。惡其厲己。倡邪說以爲之禁。士大夫身蹈其禍。而學者公自絕以苟全。及其禁開。則又皆竊取緒餘。徼倖仕進而已。論世道者。能無靈然于茲乎。方是時。蜀之臨邛有魏華父氏。起於白鶴山之下。奮然有以倡其說於摧廢之餘。拯其弊於口耳之末。故其立朝。惓惓焉以周程張朱四君子易名爲請。尊其統而接其傳。非直爲之名也。及旣得列祀孔廟。而贊書乃以屬諸魏氏。士君子之公論固已與之矣。及我聖朝。奄有區夏。至於延祐之歲。文治益盛。仍以四君子并河南邵氏。涑水司馬氏。新安朱氏。廣漢張氏。東萊呂氏。與我朝許文正公十儒者。皆在從祀之列。魏氏之曾孫曰起者。隱居吳中。讀詔書而有感焉。曰。此吾曾大父之志也。何幸親復見諸聖明之朝哉。今天下學校並興。凡儒先之所經歷。往往列爲學官。而我先世鶴山書院者。臨邛之灌莽。莫之翦治。其僑諸靖州者。存亦無幾。而曾大父實葬於吳。先廬在焉。願規爲講誦之舍。奉祠先君子。而推明其學。雖然不敢專也。泰定甲子之秋。迺來京師。將有請焉。徘徊久之。莫伸其說。至順元年八月乙亥。皇帝在奎章之閣。思道無爲某官某得侍左右。因及魏氏所傳之學。與其孫起之志。上嘉念焉。命臣集題鶴山書院。著記以賜之。臣聞魏氏之爲學。卽物以明義。反身以求仁。審夫小學文藝之細。以推致乎典禮會通之大。本諸平居屋漏之隱。而克極於天地鬼神之著。巖巖然立朝之大節。不以夷險而

少變而立六言垂範。又足以作新乎斯人。蓋庶幾乎不悖不惑者矣。若夫聖賢之書。實由秦漢以來。諸儒誦而傳之。得至于今。其師弟子所授受。以顯門相尚。雖卒莫得其要。然而古人之遺制。前哲之緒言。或者存乎其間。蓋有不可廢者。自濂洛之說行。朱氏祖述而發明之。於是學者知趨乎道德性命之本。廓如也。而從事於斯者。誦習其成言。惟日不足。所謂博文多識之事。若將略焉。則亦有所未盡者矣。況乎近世之弊。好爲鹵莽。其求於此者。或未切於身心。而考諸彼者。曾弗及於詳博。於是傳注之所存者。其舛譌牴牾之相承。既無以明辨其非是。而名物度數之幸在者。又不察其本原。誠使有爲於世。何以徵聖人制作之意。而爲因革損益之器哉。魏氏又有憂於此也。故其致知之日。加意於儀禮。周官大小戴之記。及取諸經注疏正義之文。據事別類。而錄之。謂之九經要義。其志將以見夫道器之不離。而有以正其臆說聚訟之惑世。此正張氏以禮爲教。而程氏所謂徹上徹下之語者也。而後人莫究其說。以兼致其力焉。昔之所謂鹵莽。日以彌甚。甘心自棄於孤陋寡聞之歸。嗚呼。魏氏之學。其可不講乎。今起之言曰。起幸甚。身逢聖天子文治之盛。追念先世。深惜舊名。起將于斯。與明師良友。教其族人子孫昆弟。及鄉黨州閭之俊秀。庶乎先君子之遺意。而魏氏子孫。世奉其祀事。精神血氣之感通。亦於是乎在。其有託於永久而不墜也。不亦悲乎。臣之曾大父。實與魏氏同學於蜀西。故臣得其粗者如此。敢輒書以爲記。魏氏名了翁。字華甫。臨邛人。故宋慶元己未進士。仕至資政殿大學士。參知政事。僉書樞密院事。都督江淮軍馬。贈太師。封秦國公。諡文靖。而學者稱爲鶴山先生云。

張氏新筮記

虞集

故資政大夫、中書左丞、樞密副使、贈推誠同德佐運功臣、太師、開府儀同三司、上柱國、追封魏國公、諡忠宣、張公諱文謙，字仲謙，世爲順德沙河人。大父諱宇，贈保節功臣、銀青光祿大夫、大司徒、柱國、魏國文愍公。父諱英，贈純德秉義功臣、太保、儀同三司、上柱國、魏國簡懿公。皆葬沙河之蓋里。公之子榮祿大夫、陝西諸道行御史臺御史中丞晏。次曰奉議大夫、侍儀引進使杲。次曰某官昇孫曰承事郎、曹州判官孝誠。次曰奉訓大夫、林州知州孝則。曾孫曰某。至元二十年三月壬申，公薨。葬先塋之次。晏病其土之隘且薄也，中心慊焉。以世家仕於朝爲大臣，不得在鄉里。至治元年，自陝西以病歸老。數徵用，輒謝不赴。家居十年，購得善地，郡城西八里，曰董村，掘深六十尺，始及泉。歎曰：吾親而得藏於斯也。庶乎其可以無悔焉爾矣。卜得天歷三年四月某日吉，將奉柩遷焉。魏國夫人劉氏、附張氏、新塋肇諸此。使孝則來京師，謁太史集徵文以識之。集嘗觀於世祖皇帝之世矣，自其在藩，至於卽位，文武小大之臣，乘運以興者，各自職事見功業，求其惛愒深厚，知爲國之本，造權輿於屯昧不寧者，於公見焉。太保劉公秉忠，學術通神明，機算若龜策，其所以爲上計者，審矣。當是時，軍國之重，則有宗親貴人，而書記徵發之責，取才金氏之遺而有餘也。乃獨薦公爲謀臣，在上左右。主儒者，使陳先王之道。雖若迂於智數，而世皇信用，以一天下，而貽子孫無疆，惟休其迹，無得而名焉。嗚呼！自孔子孟子沒，豪傑各以其資奮，而內聖外王之學，千數百年，無能道之者。生民況得被其澤乎？宋儒始有以遠接其端緒，而朱子爲能集其書之大成。然猶以是取怪時人，身幾不免。自其學者誦而習之，亦或莫究其旨。許文正公衡，生乎戎馬搶攘之間，學於文獻散逸之後，一旦得其書而尊信之，凡所以處己致君者，無一不取於此。而朱子之書，遂衣被海內，其功詎可量哉！夫孰

知先後扶持。時其進退久速。使其身安乎朝廷之上。而言立道行者。公實始終之也。嗚呼。微朱子聖賢之言。不明於後世。微許公。朱子書不著於天下。微公。則許公之說。將不得見進於當時矣。庸非天乎。中統建元以來。政術與時高下。獨成均之教。彝倫大農之興稼穡。歷象之授人時。凡出於公之所爲者。皆隱然而有不可變者。詩云。樂只君子。邦家之基。其公之謂乎。凡公歷官行事歲月。具見神道碑文。集輒掇其關於國家治教之大者。而表之如此云。

御史臺記

虞集

天歷元年十一月壬申。御史臺臣入見內殿。皇帝若曰。以予觀於天下之治。不有臺憲之司。布在中外。則何以肅綱紀。正風化。輔成朝廷之大政。而休息吾民乎。昔我世祖皇帝卽位之十年。始立御史臺。以總國憲。其憂深慮遠。使吾子孫。有以周防於隱微。禁制於暴著。其在斯乎。朕三復貽謀。究觀法意。懼無以彰皇祖創始之明。責任之重。其刻石內臺。儼有位於無窮焉。丁亥。御史大夫臣伯顏等言。謹具石請刻詔書。制詔國史。汝世延。汝集等。其製文。係以御史大夫以下。至監察御史姓氏。臣世延。自中丞行臺江南。臣集承詔。再拜稽首而言曰。我皇元之始。受天命也。建旗龍漠。威令赫然。小大君長。無有遠邇。師征所加。或克或附。於是因俗以施政。任地以率賦。出其豪傑而用之。禁罔疏闊。包荒懷柔。故能以成其大制作之事。蓋有待也。世祖皇帝。聖繇天縱。神武不殺。智詘羣策。取善無方。定天下而一之。乃攷帝王之道。酌古今之宜。建國紀元。而著令典焉。立官府置郡縣。各有其職。而上下相承。內外相維。聯屬貫通。以通功成務。丞相中書以統之。上承天子。出政令於天下。較若畫一。莫敢踰焉。其或任焉而非人。令焉而非法。近焉而弗察。遠焉

而弗達。交修其非。以輔其所不逮。則責諸風憲。它官雖貴且重。不得預。況乎朝廷百執事。郡縣小大之吏。作姦犯科。爲不善者乎。是故使其君子安焉。以盡心。使其小人懼焉。而遷善。而天下之治成矣。此其官所以不可一日闕歟。今上皇帝。以武皇之親子。久勞於外。入正統緒。罪人斯得。功成不居。克讓大位。故其觀乎事變之極。而知患得患失者。必至於無所不至。察乎民庶之隱微。知其蠹弊深刻。而無所告愬。故慨然當寧興歎。而屬意於斯者。豈偶然哉。謹按御史臺。至元五年。置秩從二品。二十一年。陞正二品。大德十一年。陞從一品。臺有大夫一人。後增一人。中丞二人。後又增二人。隨復故。侍郎御史二人。治書侍御史二人。殿中侍御史二人。治朝著之事。典事二人。掌幕府文書之事。後改爲都事三人。後又以都事之長。蒙古若色目一人。爲經歷。檢法二人。後廢。管勾三人。其一人兼照磨。監察御史十二人。後增至十六人。皆漢人。又增蒙古色目人。如漢人之數。今三十二人。至元十四年。旣取宋。置南行臺。二十七年。專蒞江南之地。號江南諸道行御史臺。官秩如內臺。而監察御史。今二十四人。西行臺。初由雲南廉訪司。陞行臺。大德元年。移治陝西。號陝西諸道行御史臺。蒞陝西。甘肅。四川。雲南之地。延祐間。暫廢。隨復。其官秩如南臺。而監察御史。今二十人。至元六年。初置各道提刑按察司。正三品。有使。副使。僉事。察判。經歷。知事。二十八年。改肅政廉訪司使。副使。僉事。各二人。大司農奏罷各道勸農司。以農事歸憲司。增僉事二人。經歷。知事。照磨。各一人。今天下凡二十二道。始建臺時。大夫則塔察兒也。今六十年。繼居其官者。名氏拜罷歲月。則有掌故在。謹記。

元文類卷之三十一

記

石田山房記

馬祖常

桐柏之水發爲淮。東行五百里。合御黃山谷諸流。左盤右紆。環繚陵麓。其南有州曰光。土衍而草茂。民勤而俗樸。故贈騎都尉開封郡伯浚儀馬公。實嘗監焉。公之子祖常。少賤而服田于野。以給饘粥。鄉之人思慕郡伯之政。念其子之勞而將去也。迺爲之卜里中地。亟其葺屋。而俾就家焉。屋之側有崇邱。可五七丈。溪水傍折而出岸。碕之上。嘉樹苞竹。蒼蔚蔽虧。前爲木梁。梁溪而行。周垣悉編菅葦。門屋覆之以茨。歲時里鄰酒食往來。牛種田器。更相賁貸。寒冬不耕。其父老各率子若孫。持書笈來問孝經論語孔子之說。其耕之土。雖磽瘠寡殖。不如江湖之沃饒。然猶愈於無業也。祖常者。因樂而居焉。於是名其屋曰石田山房。且自爲記與圖。以屬當世能言之士。請爲賦詩。異日使淮南人歌之。

小圃記

馬祖常

余環堵中。治方一畝地。橫縱爲小畦者二十一。塍崑崙奴頗善汲。晝日緝水十餘石。井新浚。土厚泉美。灌注四通。春陽土脈亦僨起。古所謂滋液滲漶。河生不育者。信矣哉。雜蘆蕨蔓菁葱薤諸種。布分其間。柵以稽薪。限狗馬。越入蹂躪。圃在前時爲故主馬廐。土有糞合水之膏澤。併漬之後。菜熟芼羹。以侑廩米之饋。

儲吾於世資蓋寡取也。如是可日計矣。學子汪瑄曰。鑄鐵作齒。綴于橫木。使土平細。尤宜菜。余謂不然。土之力完。則殖繁。若力盡。則亦不殖矣。因爲治小圃記。

上都分院記

馬祖常

天子歲省方。留都丞相待省中。率百官咸以事從。或分曹釐務。辨位考工。或陪扈出入起居。供張設具。或執臺鞬備宿衛。或視符璽金帛尙衣諸御物。惟謹其爲小心寅畏。趨走奉命。罔敢少怠。而必至給沐更上之日。迺得一休也。惟詞臣獨無它爲。從容載筆。給輶傳道。路續食持書數囊。吏空牘。旬日不一署文書。夙夜雖欲求細勞微勤。以自効。而亦無有。然後知上之人不欲役其心。使之研精於思慮。而專以文字爲職業。非如衆有司。務以集事爲賢者也。至治三年。汝陽曹公子真。分直學士院。實應從行。祖常攝官待制。聯屬以皆上。日懼譴薄。無以稱其官。幸遭逢國家治康。內外清謐。臣隣廉恥。不煩訓誨。蠻夷懷柔。不待約束。所以敷宣播告之辭。猶慎且簡。間爲民歲而祠。其祠之祝。亦不誣神而夸。故其意質而文。又寡。是以益積其蘊蓄。而不得肆發。而爲詩。以形容國家太平之功。乃更相與樂其秩之美。而喜其被光寵於明世也。吾徒之服是選者。良亦榮矣。夫良亦貴矣。夫可不研精於思慮。以俟上之召。必蹈渾噩之實。而列陳之則庶乎不戾於躬也。不戾於躬。則於古也近矣。志諸壁。因以存故實云。是歲六月。翰林待制承務郎兼國史院編修官馬祖常記。

績溪縣尹張公舊政記

宋本

徽之績溪人。程燧。走京師。致其邑之老之言曰。今江浙等處。行中書省參知政事張公。當大德十年。尹吾

邑有善政云。二十二年。吾民未嘗忘。使燧口其事之徵於神者一。徵於人者七。將求文章述載。刻金石以傳。吾子攻文辭。聞四方。敢請予曰。當在官樹碑頌功德。藉曰有禁。不爲於去之始。必待二紀之久何也。曰。吾邑之老曰。公之政著吾邑人之心。吾邑不必碑。故不謀之始去。去闕焉若是。而終將碑者。蓋天下行省十民物浩穰。莫吾江浙若。郡邑類千百守令廉墨。哲愚不齊。小民遠朝廷。被刻害者多。而守令率中人。十七八不能不計利功。公以良民。使獲知於上。歷顯要。來參預吾省政事。故將傳以警凡有民社者。俾慕以思。企及。則吾江浙類千萬人。庶日就安樂。不然。吾邑之人。蓋語壯壯語弱。弱語穉。固不忘也。奚求堅於石。曰。是故然。然徽江浙屬。獨不病識者之議。媚夫人乎。曰。吾儕小人。固嘗竊惑於是。吾邑之老曰。夫嫌賢者。不避。吾將以警在位。期吾東南民安樂。可以嫌遂已。曰。昔宋璟當國。廣州民刻石頌德。璟奏禁止。公法璟。碎女石。奈何。曰。苟得刻吾子文。一日卽碎。其事之傳。固不可遏。而足以警職字民者矣。吾邑之老。比羸糧主進以遣燧也。固已集閭巷。反復計之矣。以爲無不可。故來願無讓。曰。然則請其詳。曰。歲丙午。丁未。邑游饑民。或攘竊自活。胡寄者聚羣不逞。將據山林。負固嘯劫。爲公覺。皆就禽。且勸分振乏。民得不死。殍不魚肉於盜。邑歲貢金三錠。視民田多少爲賦。貧者或鬻永業富民。而不更籍。吏驗文書。徵貧者如故。往往被箠。楚破家負責遁逃。公一責諾。田今所主家貧者悉得蘇。舊徭役弗均。無條教繩墨。公召民俾度力所堪。第高下自承。皆不敢隱。列爲簿帳。始終相沿。民獲其平。國制用中原兵。戍江南列城。非大故不易。而兵若民異屬。萬夫長。千夫長。百夫長。恃世守。凌轢有司。欺細民。細民畏之過守令。其卒羣聚爲虐。或訟之。有司舉令甲。召其偏裨共蔽。則諾而不至。事率中廢。民苦無可柰。何。邑戍卒許來孫。尤縱暴。民陳亨愬之。公遣

吏語其長曰。若兵爲凶虐。速械以來。則罪止其身。不然。且具若姓名。以御衆無紀統。聞諸司憲。二者若擇之。其長皇恐。索來孫。縛致受罪。後或以徼巡當至村落間。亦必白。始敢出。雖出。民雞狗不驚。邑之十一都。有死比邱。棄谿中。不知主名。公以事道溪側。忽羊角風。擁馬首。旋不已。公顧吏。吾聞長老言。羊角風多異物。憑附。豈比邱有靈耶。因祝期三日。必索賊爾者。償死命。乃物色鉤致之。則死者爲慧能。竊其主僧。普成私藏。成殺之。成遂伏辜。邑之孔子廟壞。又無田食師生。公新廟。復出俸錢。率僚友與儒之富者。買田供祭祀。饘羞文教。以興邑。吏程汝楫。貪而險。以賊罷。居里中。無以生。偵民有少不平。嗾其訟。佐之請謁。己旁緣自資。且既餌臨政者。因持其短長。以蠹民。梗政。莫敢何問。公發其姦杖之。按法塗其門。垣爲赤方。大書識其惡。豪猾屏息。此徵於人者也。邑有神汪姓。自唐廟食。至宋得王封。甚靈。吏廉明敬共者。禱雨。陽災。福必應。有羣虎。繇無爲。絕江入宜歙境。食人畜。邑被害尤甚。罟穽無所施。公潔齋禱神。居無何。第五都里。齋夫上言。有異獸若彪然。逐虎食之。虎畏駭。悉去。不敢留。此徵於神者。曰。若此。已乎。曰。公之卹民。隱理民利。病甚多。故吏耆年。亭父落長。嘗奔走左右者。少日老以耄。老日病以死。今可一二日之者。此也。然耄壯弱。稚以公政之善著之心者。則不以能舉其迹多少爲在亡也。嗚呼。三代直道而行者。斯民也。徼俗厚矣。政之善。能使人不忘。宜也。無足異。予獨愛績溪之人。然其知有未盡者。夫尹是邑。嘗有善政。閱一十二年。來爲參知政事。以耳聽目視。相接。固可勸官東南者。而朝廷拔循良。至位宰執。使天下後世。知黜陟以道。不旣美乎。予初第時。已聞公廉直精吏事。爲聞人。入翰林。則又知公以左司郎中。鯁亮言天下事。積忤權姦。爲伎恨。至得禍。不避。遭中廢。士大夫翕然高之。及起而參議都省事。予爲兵部員外郎。則又見其臨事剛。

特不少懲以替。績溪之老烏知國家用其尹者。不翅善其邑之政也。昔裴均以故相臨藩方。其屬韓愈。第以其貴富爲記。其少時河南府同官。立石均故爲參軍舍庭中。則固不以媚自疑。且不以去之久而不之文也。用是爲記。公舊政。暨邑人所未知。俾歸刻之。以風勵字民者。公名毅。字彥弘。雒陽人。泰定四年二月。奉政大夫。中書省左司都事宋本記。

水木清華亭記

宋本

至治三年。予過朗。周君景春語予。吾白馬湖園田。予嘗觴其會心亭者。吾歲再三至。至輒留數十日。雖頗野逸。吾猶以近城郭。過客夥。往往聞官府里巷事。爲可厭。別買小山。敖山驛旁。築亭其上。距城六十里。而遠。非親戚故人來候。終歲無通刺者。其奇勝。岑蔚。視白馬湖。不啻什百。因共往臨觀。裴回忘歸。暮就宿亭下。既別。君以北懷其境。必形思夢。數數念君爲能自適。蓋親大林邱山者。莫樵牧農夫若然。其目不知書。詩。昧道理。勞斧斤。耜耒。指阡脛。腋無毛。以登陟。作業。雖日涉。祇見其苦。常試問之。將悼其生之在野。又烏知愜心目。高深耶。知者。獨士大夫。士大夫有良田美池。可以適者。詎止君。然不得如君者。恆多。苟名士大夫。率不甘湛澹稠人中。必振拔自豪。求尺寸名。詔九族儕類。西東馳騫。無已時。其鄉有十年廿年不至者。況良田美池。否則。暨至。集農夫耕穫。校斗斛合侖。詐欺不得自休息。又否則射。歎饑。發積。授枚。識出。布籌。會入窮日。疲極而睡。旦復乘車騎馬。還市中。視邸舍化居。自適之樂奪矣。君爵祿不入心。又不肯自嬰世。故聞人爭競是非。遠避如不及。至山中。納履策杖。儻然往來林下。遇田父道人坐談。或略具酒茗。資笑樂。種。陸豚雞。播若字如干。悉置不省。於是山林可愛而玩者。若皆効奇以出。不爲外奪故也。它士大夫能效。

君則其園田詎皆無奇。是非君擅有斯樂不讓。人不卽之耳。予雖知亦無田不能自還。今茲日戴星入曹局治文書。往往不遑食。暮歸脫冠帶。惓然就枕。當是時。思自適周氏亭中。邈不可得。旣以賢君。又恨樵牧農夫之悼在野也。初君求名亭以記。諾之三食新矣。弗果。其子鼎亨游京師。復以君意趣。亭歸。乃追思所履以睹者。名亭曰水木清華。而記之所買山在郡北。未至里許。卽行田間。蹠蹠騰眙。上若綠山。實小阜。隨而上。平穉杉數十章。秀竦可愛。前臨溪闊四五尺。夾溪苗松無數。若髮水泚然。歷沙石灣磴。瀏瀏有聲。又前則田疇迤邐。亭半出溪上。三楹頗加黜聖。敞潔以雅。亭右山鹿青篠赤棘中。得微行至一泓。號龍潭。山中人傳龍嘗起於是。樛條灌肄繞之。水淨淥。雨旱不登耗。阜之後泊旁高山。巨木彌望。勢皆走亭。泰定四年三月。朝列大夫禮部郎中宋本記。

湖南安撫使李公祠堂記

宋本

故宋朝散大夫。祕閣修撰。樞密院副都承旨。知潭州。湖南安撫使李公。以至元十二年冬。爲我師所圍。城守三閱月。隨方備禦。數戰無外救。不能支。明年正月四日。城破。公不肯屈。曰。吾死固分。家亦不可辱於俘。乃積薪州治雄湘閣。命妻孥十九人。登其上。召帳下沈忠曰。汝先殺吾家。次及我。然後縱火。忠不能強之。始如命。忠感公義。亦自剄。事載宋野史。湖湘間父老亦能道之。公衡人。宅在郡西南。至元間。有司以爲學。建祠學東偏。置公畫像其中。奉之久。頗壞。天歷二年。校官劉似上言。提舉儒學官曰。前政祠公號山主。謂學其宅也。是特細者。公盡心所事。一宜祠。衡爲公鄉校。鄉校嘗出忠義人。可增重。二宜祠。乞蒼公故祠。塑公像。且宜以故宋知衡陽縣穆君侑食。穆君諱擴。祖初尉縣。當憲宗皇帝之九年十月。大將兀良合台以

天兵繇大理交趾入廣南西道先鋒破永州衛守令丞暨民皆走穆君戍石灣聞難還救時所在盜充斥穆君緣道捕擊始得行比至先鋒入城見民大去餘空室火之而退十一月穆君達城中招散亡以守閩十一月兀良合台進駐青草渡聚舟欲絕湘夾攻穆君提兵水東岸楊林廟相拒七晝夜募死士沈所聚舟兀良合台遂舍去衛卒以完公薦諸朝超七資以承務郎知縣事穆君公故吏德同義比衛民又嘗賴以活似謂公宜祠穆君宜侑者以此提舉官報行迺修祠屋塑公像其中左以穆君配工畢似之父淳安縣尹壽翁走書京師求予記嗟乎當歲己未憲廟親幸蜀世祖皇帝以皇弟帥兵渡鄂將與兀良合台共會江左宋人號幹腹之師倚角擣虛勢急雷電穆君以一尉軍孤壘小敢與之抗克免於厄躄哉及淮安王伯顏受命南伐郢之沙陽新城戍將嘗一再戰及陽羅敗衄岸江郡邑小大文武將吏降走恐後其降者或自言未賞賚或又自言己雖得名位子弟部曲未官至或自言某郡某城有己屋室奴婢資業身先未降時行營嘗謂若納款俟下其地悉見還今已克其所乞如向所許可羞可惡之狀百出死城郭封疆者間有一二求如李公之死之明白偉特蓋鮮累聖下詔書郡國及忠臣烈士之祀者十九公與君合食一祠信宜矣然予又有告衛校官者昔金將亡其威勝軍節度使兼沃州管內觀察使右監軍行元帥府事趙愨與天兵戰高邑被禽怒罵不屈以死其子嵩汝招撫使良貴孫十人長讜弟子忠勇軍提控良材皆以戰敗死國事至元六年愨次子良弼以祕書監使日本將行上奏曰臣家世仕金源死事者四人嘗欲紀其行實以事在前朝無裨聖代造次未敢謹昧死上聞乞聖慈矜憫上曰人臣各爲其主父忠於所事雖在前朝亦朕心所嘉況有賢子爲吾盡臣何嫌何疑不以立石哉命中書省傳旨翰林學士王磐撰

文刻其贊皇家廟。嗟乎。世祖之心。惟天似之。今皇上神聖文明。動法祖宗。而學校清議所根。苟能援慝比。言之朝曰。公與慝皆亡國人。慝家死者四人。公自殘一家。節不下慝。乞褒寵如慝。萬一開可。敕詞臣紀其事。則既可爲公光耀。又能作沈忠像。其側以侍。所勸將益廣。而祠爲大備矣。試思之。公諱芾。字叔章。號肯齋先生。其先洛之永年縣萬頃鄉招農里人。穆君字公有天彭人。仕至湖北僉憲。壽翁名彭壽。郡人。延祐二年進士。於予爲先達。至順二年七月一日記。

都水監事記

宋本

都水監丞張君子元。致其長颯八耳君之言曰。吾職古爲澤衡。元制秩三品。所以列朝著者。有典掌。有屬。有事功。而廢置有沿革。然設官四十一年矣。嘗蒞是者。無慮百餘人。其勤勞職業。豈少哉。曹署老吏。日以簿書歲畀。掌故日以蠹爛。有所徵考。則茫然昧所嚮。殆非所以謹官常。備遺忘也。幸文以紀其概。將刻石聽事。爲方來益。敢最其事於牘。以瀕子讀之。則知監始以至元二十八年。丞相完澤奏置於京師。監少監丞各二員。歲以官一令史二。奏差二。壕寨官二分。監于汴。理決河。又分監壽張。領會通河。官屬如汴監。皆歲滿更易。泰定二年。改汴監爲行監。設官與內監等。天歷二年罷。以事歸有司。岸河郡邑守令。給銜知河防事。而壽張監至今不廢。此其沿革。大都河道提舉司官三。幕官一。通惠河。牘官二十。又八會通河。牘官三十。又三。此其屬。通惠金水。盧溝。白溝。御清。會通。七河。通惠之廣源。會川。朝宗。澄清。文明。惠和。慶豐。平津。溥濟。通流。廣利。會通之會通。土壩。李海。周店。七級。阿城。京門。壽張。土山。三义。安山。開河。岡城。兗州。濟州。趙村。石佛。新店。師莊。棗林。孟陽。泊金溝。沽頭。五十五牘。阜通之千斯。常慶。西陽。郭村。鄭村。王村。深溝。七壩。

都城外內百五十六橋。皇城西之積水潭。隸焉。凡河若壩填淤。則測以平而浚之。牐橋之木朽斃裂。則加理。牐置則水至則啓。以制其涸溢。潭之冰共尙食。金水入大內。敢有浴者。滌衣者。弃土石。甌觶其中。驅馬牛往飲者。皆執而笞之。屋于岸道。因以陋病牽舟者。則毀其屋。碾磧金水上游者。亦撤之。或言某水可渠。可塘。可捍。以奪其地。或某水墊民田廬。則受命往視。而決其議。禦其患。大率南至河東。至淮。西泊北盡。燕晉朔漠。水之政皆歸之。此其典掌。至元二十九年。鑿通惠河。繇京師東北昌平之白浮村。導神山泉。以西轉而南會一畝焉。眼二泉繞出。瓮山後。匯爲七里灤。東入西水門。貫積水潭。又東至月橋。環大內之左。與金水合。南出東水門。又東至于潞陽。南會白河。又南會沽水入海。凡二百里。立牐二十四。役工二百八十五萬。費以鈔計。百五十二萬。米三萬八千七百石。木十六萬三千八百章。銅鐵二十萬斤。灰油。葉稱是。八月經始。三十年七月畢事。以便公私。至治二年七月。石麗正門南之第一。又南第二橋。以壯郊祀御道。蓋京師橋牐。舊皆木。宰相謂不可以久。嘗奏命監漸易以石。今牐之石者已九。橋之石者八十。又九。餘將次第及之。役之用洎勞。蓋可臆度。茲略不書。泰安元年七月。釦積水潭之南岸。以石。袤千二百五十尺。繚以赤闌。風雨湍浪。不崩不淖。以利往來。至治元年七月。大霖雨。盧溝決。金口勢頽。王城補築隄百七十步。崇四十尺。水以不及天邑。此其事功。嗚呼。明典掌。建事功。在位者事也。若曹署之廢置。屬之衆寡。則亦當究知。繼官是監者。能惓惓於此。則無負數君子意矣。我世祖以上聖。膺開物之運。建邦設都。樹官府國中。與列聖之文致。太平更植。疊立。使佩印綬。食奉錢廩。稍秩三品。及過而上者。將數十百所。詎皆無沿革典掌。與屬與事功哉。未聞出意見。求措紳先生紀之者。則數君子敬事以近文可知矣。矧徒有典掌有屬。而

無事功。稽其沿革。以不能道者哉。抑水之利害在天下。可言者甚夥。姑論今王畿。古燕趙之壤。吾嘗行雄莫鎮定間。求所謂督亢陂者。則固已廢。何承矩之塘堰。亦漫不可迹。漁陽燕郡之戾陵諸竭。則又併其名未聞。豪傑之意。有作以興廢補弊者。恆慨惜之。或又謂潔之沽口。田下可勝以稻。亦未有舉者。數君子能職。思其憂若是。是殆濟矣。故以是卒記之。監者潭側。北西皆水。廳事三楹。曰善利堂。東西屋以棲吏。堂右少退曰雙清亭。則幕官所集之地。堂後爲大沼。漸潭水以入。植夫渠荷芰。夏春之際。天日融朗。無文書可治。龍食啓窗牖。委蛇騁望。則水光千頃。西山如空青。環潭民居。佛屋龍祠。金碧勦堊。橫直如繪畫。而宮垣之內。廣寒。饑天。瀛洲諸殿。皆歸然得瞻仰。是又它府寺所無。至順三年三月。宋本記。

滋溪書堂記

宋本

延祐六年。予初來京師。聞國學貴游。稱諸生蘇伯修。以碣石賦中公試。釋褐授薊州判官。往往誦其警句。名籍甚。欲一識。則已赶上。及還。始與交。因得知伯修多藏書。習知遼與金故實。暨國朝上公碩人家。伐閱譜系。事業碑刻文章。既久。又見其嗜學不厭。嘗疑胄子有挑達城闕者。已仕卽棄。故習者。伯修獨爾。其淵源必有出師友外者。詢之。則果自其先世曾大父。少長兵間。郡邑無知爲學者。己能教子爲人先。其大父威如先生。教其考郎中府君尤嚴。或曰。君纔一子。盍少寬。輒正色曰。可以一子故廢教耶。先生學廣博。嘗因金大明歷。積算爲書數十篇。歷家善之。府君旣爲時循吏。又好讀書。教伯修如父教己。有餘俸。輒買書遺之。於是予疑益信。又久之。則其所著書曰遼金紀年。曰國朝名臣事略者。皆脫橐。而今之諸人文章。方類粹未已。士大夫莫不歎其勤。伯修汲汲然。至不知饑渴之切己也。日謂予。昔吾高王父玉城翁當國初。

自汴遠真定。買別墅縣之新市。作屋三楹。置書數十卷。再傳而吾王父威如先生。又手自鈔校。得數百貯之。因名屋曰滋溪書堂。蓋滋水道其南也。歲久堂壞。先人葺之。而不敢增損。且漸市書益之。又嘗因公事至江之南。獲萬餘卷以歸。吾懼族中來者。不知堂若書之始。幸文之。將刻石嵌壁。以示嗚呼。有子不知教。不論教而不克如志者。如志而不得及子者。皆是也。求若蘇氏。四世知爲學。難哉。世之致爵祿金玉良田美地者。其傳期與天地相終始。然有身得身失者。況其後萬有一能振奮過祖禰者。則又鄙昔之人無聞知。撤敵廬。創甲第。矜貴富。病先世之微。不肯道。而翁之堂。府君能葺之。伯修能求記之。翁之書。先生能加多。府君又益增之。伯修之購求方始。不第能守也。非有以將之。能若是乎。府君葺堂。不敢有加以求勝前人。伯修有屋京師。真定。皆不敢求記。獨惓惓是區區之三楹者。又可以爲薄俗警矣。抑蘇氏雖世爲學。獨威如先生有著述。伯修著述益富。豈聞祖風而興耶。然予聞自先生至伯修。三世皆一子。惟其能教。故悉克自樹立。今伯修亦一子阿瑣。甫龢。而穎拔可就傳。伯修能繩先生義方以造之。則堂暨書之傳。邈乎未可概也。是爲記。伯修名天爵。今以翰林修撰。拜南行臺監察御史云。至順二年十二月廿六日。大都宋本記。

臨高縣龍壇記

范 梈

距臨高縣西二十里。曰西村。有龍壇。宋故事。令天下旱。擇郡縣地爲壇。刺史縣令帥諸史奉祭具如法。茲其遺也。壇三成長一丈。廣半之。北有潭。東西廣七百尺。北南少東西廣七之二。中潭有穴二。水碧黑色。探之無底。父老傳天聖間。嘗有白龍出焉。其在祀典者以此。潭水西灌千畝。大旱不殺。甚雨不涌。或曰地

近海穴與海通。故然。天久乾。青白氣上騰。禱者以爲雨應。延祐元年。安豐牛君某來尹是縣。會旱禱之。雨三日。旣祭。又雨。穀大熟。思所以修靈報。惟是表章。先時民有侵壇側地以食者。墾鑿四起。褻汗不虔。君盡復而樹之。注汲有塗。奠瘞有坎。泓涵澄映。勃鬱葱蒨。歲時祈報。贊拜跪起。祀官以嚴。神靈以欣。二年。又旱。余錄囚歷縣。尹請述其事。刻諸石。欲往察不果。命吏翦叢翳。審面勢以來。且與龍約曰。庶余文哉。以神視余。吏反而雨。隨至。禾乃大起。吁亦靈已。夫宰百里。所以治夫人也。神依人者也。依乎人者。事之猶若是。備至。則治人之道。何以尙之。況山川之功。在禮有足稱者。迺授以樂龍之章。俾其人世。歌以承祀。且并刻焉。辭曰。

僊僊兮舞羽。坎坎兮拊鼓。龍之居兮有宮。棟白雲兮下爲宇。湛湛兮天門。龍之徠兮從繽紛。去莫去兮回皇洞。簫亮兮須君。蹇須君兮日復夜。梓有蒸兮芳有藉。折素馨兮揚眉。玄天矯兮上下。我有大田兮海之隅。藷積充實兮黍稻于于。終古兮介祉。子孫兮樂胥。

懷友軒記

杜本

余少時喜遊名山川。聞武夷最勝而最遠。嘗按圖指畫。擊几爲節。詠九曲權歌。想昔人之餘韻。謂不得遂其願慕之心矣。皇慶初元。以御史大夫朮公薦在京師。獲託姓名於四方之士。于時張君伯起以童子科校書祕省。詹君景仁亦辟掾三公府。三人者。暇輒相從。以問學切磋爲事。迺二君皆粵產。而景仁世家武夷。嘗極道其谿山高深環合千態萬狀。有終身不得窮其趣者。先世有田數十區。有書數百卷。足爲賓客一日之具。吾子其將有意於斯乎。余聞而識之。延祐間。景仁出貳浙東憲幕。伯起亦佐郡三山。余以微言

迂執事之臣書不報而去。遂得挾冊山中。償夙所願。蓋二君之力也。因欲結茅谿濱。而山石犖确。自非仙人道士。餐霞茹芝。乘風馭氣者。罕得居之。遂泝流至星村。則開廓平衍。有詹氏之故居焉。然與市井相滯綜。又泝流而至建峯。地皆良田。美竹有類嵩邱。麴穀之間。稍憩息南湖之履堂。遇一儒者。與敍語。欣然若故人。同行未五里許。平川廓然。問之。百年榛莽矣。自九曲至是。僅半舍。而遊者已罕至。然水益深緩。山益磅礴。西南諸峯。巉絕出霄漢。其最峭拔者。爲雲巖。雲氣起伏其下。鄉人於此候雨。暘焉。天高氣肅。時一登望。江之左右。溯之東西。三山海日。七閩煙靄。皆隱約于指顧間。武夷諸峯。並列于下。巖巒林壑。澗谷淵渚。泉池潭洞。曾見疊出。不可致詰。無不稱遊觀之志焉。余與景仁。顧而樂之。請景仁贖其榛莽之虛。而剗薙蕪植之。擬卜居未暇。乃卽其東偏。構堂室。攜妻子。讀書其中。又得莽地而蕃之。植兩楹爲軒。以舍余其間。戶牖簡朴。藏修游息在焉。然每一俯仰。輒思平生故交。多海內名士。或道德之高深。或文章之雄雅。或政事之明達。或翰墨之神奇。或節操之堅峻。或信義之昭白。或譚論之該綜。或考覈之精審。或出處之慎重。或神情之閒曠。乃皆在神京大府湖江之外。不得相觀。以成其志。寧不重有所懷邪。因題其軒曰懷友。以著余心。尚幸所藏舊書。可以朝夕搜玩。而余之所懷。因得以考正於斯焉。重惟聖人載道之經。與夫百家子史所錄。開極以來。明聖之君。昏暴之主。忠良之臣。貞節之士。酷虐貪殘之吏。是非善惡之跡。以及天官地志。禮樂制度。律歷名數。龜筮醫方。營繕種藝。方言野錄。仙佛變化之事。至於厓鑄野刻。塔寺宮廟。彝鼎柱石。井臼虛墓。詭異之辭。悉次於是。庶開卷有得。亦可謂益友之明效矣。則雖親舊之交遠。江海之跡疎。然神會於文字之間。猶能友于千古。況同一寰宇而並世者哉。因輯其詞翰。列氏名而記之。以寓吾懷。然

其出處存歿雖異。而余之所慕。則不在於斯也。

安先生祠堂記

歐陽玄

所貴乎處士者。能以一己之所守。爲一國之所慕。雖當世英君誼辟。操其總攬豪傑。包舉宇內之柄。一旦遇夫爵祿慶賞。所不可致之人。於是怛然企乎先王道德之懿。真有貴於己之所負挾者。而後上之趣向。定下之習俗成。斯人者。功下韓孟哉。元有國以來。學者言處士。必宗容城劉靜修先生。方是時。聞其風而起者。曰真定安氏敬仲焉。敬仲未嘗一造劉也。顧得其傳於濂洛考亭者。知之爲甚篤。行之爲甚堅。由是推宗以合於祖一也。劉氏高亢明爽。梯級峻絕。士親炙者寡。安氏簡觀和靜。襟韻敞夷。士樂附者衆。異時有祠宜乎。抑自先世石峯恕齋兩先生。以學淑其鄉。蓋三世百餘年于茲矣。此又祠之所由作歟。敬仲既歿。門人蘇君伯修。貽書同舍囊城西管鎮李君士興。請祠爲鄉先生。士興議克合。乃築於鎮。作三室而奉之。自敬仲上。而至於石峯恕齋。咸有位焉。明世美也。落成帥里塾子舍萌。歲時具蠲所事。至是伯修請余記之。然余記安氏祠。而本以容城者。亦猶論東漢名節。而始嚴光乎。漢至孔張。末之儒也矣。微光。東都士何自作新哉。光未必知道也。而且如彼。而況吾濂洛考亭乎。而況吾容城乎。夫警宗祠於學。鄉先生祠於社。古典也。警宗久無聞。鄉先生有祭。自伯修士興始。以是知古道無難復。人患不爲爾。繼自今西管鎮之俗。日益以厚。其民敬學而賤利。其士樂道而遠執。安氏之澤其旣乎。讀是文者。尙知所始。石峯諱滔。恕齋諱松。敬仲諱熙。出處詳見家集云。

趙忠簡公祠堂記

歐陽玄

臨川王安石以新學誤宋。致天下騷然。河南程氏兩夫子出而救之。卒不勝其說。既而蔡京爲相。宗王氏說。黜程氏學。宋遂大壞。京客張巖。教京亟召程氏門人楊中立用之。庶幾救其半。及宋中興。解人趙忠簡公鼎爲相。首罷王安石孔廟配享。尊尙二程子書。凡其門人之僅存者。悉見召用。江左乃復振。不幸秦檜相。忠簡公斥。程氏門人散亡。洎中興業衰。又不幸韓侂胄相。禁建安朱文公熹之徒。之爲程氏學者。其後禁稍弛。宋已日削。皇元熠興。江漢趙氏復能倍誦程朱書。北度江。私筆以授學者。許文正公衡神明其書。進以所得。相世祖興禮樂。文太平。後是四十年。貢舉法行。非程朱學不式於有司。於是天下學術凜然。一趣於正。時相尋定濂洛以下九儒。及衡爲十人。祀孔子廟庭。天子從之。至順二年春。趙忠簡公六世孫篋翁請卽解之。聞喜縣學爲忠簡祠。其辭曰。公當宋南度。排王氏邪說。崇程子正學。以至於今。有功於斯世甚大。宜祠其鄉。胄監集賢是其議。中書禮部吉晉寧。路以符屬其同年歐陽玄記之。玄平居讀孟子。至承三聖一章。未嘗不掩卷汗下。以爲何至是烈也。及略攷近世儒者學術之邪正。有關於國家之隆替。氣化之盛衰。民物之榮悴。其可徵者。蓋如是。烏虜是祠。豈細故哉。公師邵伯溫。友胡寅。其問學源委。措諸行事。詳見宋史。篋翁延祐二年進士。卓然有志先正。亦可概見于斯。

